

A titolla anuna Aposella

A warwara talapor nigo

A buk ne, e Luk i tumusi. I han taum ana nuna ningnigo na buk ning i tumusi, a Wakak a Warwara oe Iesu Karisito. Ting na buk Aposel dala oroi mang a Talngan Tabu i arakrakai a kakak a asaerla sur lar warawai ana Wakak a Warwara oe Iesu.

A buk ne i warwara ana lotu ane Karisito, ning i turpasi tumo na papar Judia pa lamur i han sarara uting na pukpuknala rop ting na rakrakan hanua. A ningnigo na te Karisito, la miting na tarai Juda ka. La nuki mang a lotu ane Karisito anunla ka, pa bel anuna tarai masak otleng. Ika lamur e God i asangani mang a lotu anuna taraila rop (Aposel 10). A te Karisitola miting na tarai Juda la mang sur a te Karisitola ning bel a tarai Juda la otleng lar mur a warkuraila ting na lotu Juda. A kot talilis a palaona kaklik barsan, i ning a warkurai ning la mang sur a tarai masak otleng lar muri. Ika ning la kes taum ana tnan kiwung la warkurai pasi mang dingla na warkuraila ka a te Karisitola ning bel a tarai Juda lar muri (Aposel 15).

Ning a tnan utna ning a buk ne i warwara onoi, a titol anuna Talngan Tabu, a inguna e God. A Talngan Tabu i hanot nigo tetek a tarai a asaer ane Iesu ana pukakiar a Pentikos. A

Talngan Tabu ot i nigon a nuknukinla pa i saran a rakrakai tetek la.

Ona dingla na tinan ane Pol e Luk i han taum onoi (Aposel 16:10-17; 20:5-21; 27:1–28:16).

A tinan ana buk Aposel:

A ararop a warwara ane Iesu tetek a kakak a asaerla (1:1-26)

A kakak a asaer la warawai saot e Jerusalem (2:1–8:3)

A kakak a asaer la warawai tumo na papar Judia pa papar Samaria (8:4–12:25)

A ningnigo na tinan ane Pol (13:1–14:28)

A kiwung anuna aposella saot e Jerusalem (15:1-35)

A munaur a tinan ane Pol (15:36–18:22)

A munatol a tinan ane Pol (18:23–21:16)

Di akas tar e Pol uting na karabus saot e Jerusalem (21:17–23:22)

E Pol i kes tumo e Sisaria (23:23–26:32)

E Pol i han utumo e Rom (27:1–28:30)

¹⁻³ Tetek e Tiopilus,

Ana nuk a ningnigo na buk a tumus a ututnala rop ning e Iesu ka tol tari, pa ka asaer tar a taraila onoi, turpasi ana kamkama titol anunai, tuk ana pukakiar ning e God i los pasi usaot na langit. Lamur tan anuna minat, i hananot ulak tetek anuna aposella, pa a ututnala ning i toli i amomol tari mang ka laun ulak kusun a minat. Diat a bonot a pukakiar ning i kes ulak pasi te lapiu, i sira hananot tetek la, pa i warwara ana matanitu ane God. I asaer tar anuna aposella

ana rakrakai ana Talngan Tabu, a aposella ning ka aslang pas la.

⁴ Ona ning a pukakiar miting na pukakiarla ning, ning ka kamtur ulak kusun a minat, la hangan taum pa i sairas la mang, “Gong mulo han kusun e Jerusalem, mulor kes nanan esaning e Tata ka lele tar onoi, ning ia ka atai tar mulo ono.

⁵ E Jon i baptais ana malum, pa bel i bongnani ning dir baptais mulo ana Talngan Tabu.”

E Iesu i han kas usaot na langit

⁶ Ning a aposella la kes taum oe Iesu, la dekeni mang, “Leklek, onone ur saran ulak a matanitu tetek mila, a tarai Israel, sur milar kes langolango kusun a matanitu Rom?”*^{*}

⁷ I keles la mange, “Bel a utna anumuloi sur mulor tasman a pukakiar pa rau ning e Tata i warkurai tari sur ir sarani ono.

⁸ Ning a Talngan Tabu ir kes omulo, mulor kibas a rakrakai, pa ututnala ning mulo oroi tak mulor warwara talapor ono saot e Jerusalem, pa ting na hananuala rop tumo na naur a papar Judia pa e Samaria, pa ting na rakrakan hanua rop.”

⁹ Ning i arop anuna warwara, e God i los kas pasi usaot na langit na matmatanla. Lamur a laukap i poroi alari kusun la.

1:4: **1:4** Luk 24:49; Jon 14:16-17; Aposel 2:33 **1:5:** **1:5** Matiu 3:11 **1:6:** **1:6** Luk 24:21 * **1:6:** **1:6** Ana raula ning, a tarai Israel la kes nahai a matanitu Rom. La nuki mang e Iesu ir tolsot pas e Rom pa lar langolango. **1:7:** **1:7** Mak 13:32 **1:8:** **1:8** Matiu 28:19; Luk 24:48

¹⁰ Kaning ot la tadai murmur e Iesu, ning i han kusun la usaot na langit, naur a barsan dia mermer taum ana kokok a kaenla, dia turot kakat ting na risinla.

¹¹ Pa dia atongi mang, “A tarai Galili, sur asaning mulo tur pa mulo tadai tikin usaot na langit? E Iesu ning di ka los pasi kusun mulo usaot na langit, ir hanot ulak ute, larotne mulo ka oroi i, ning i han usaot.”

E Matias i keles e Judas Iskariot

¹² Lamur a aposella la ulak usaot e Jerusalem, misaot na mangir di atongi a Mangir Oliw. I milau ka e Jerusalem, i arlar ka ana takai a kilomita.

¹³ Ning la hanot saot e Jerusalem, la kas usaot na tuka rumai, ning la borborbora pa la keskes ia. La ne, la kes taum tingia: E Pita, Jon, Jems, Endru, Pilip, Tomas, Batolomiu, Matiu, Jems a nat e Alpius, e Saimon ning tagun a kunum Silot, pa e Judas, a nat a maskan a Jems.

¹⁴ La taum ma e Maria, e tana e Iesu, pa na tastasna e Iesu, pa dingla na gurarala otleng. La rop bel la manah ona niaring ana pukakiarla.

¹⁵ Ona ning a pukakiar na arpotor tana pukakiarla ning, a tena tortorotla la kes taum, la rop la arlar ana takai a mar pa pisir naur a bonot. E Pita i tur pa i atongi mang,

¹⁶ “Na tastasikla, a warwara anuna Talngan Tabu, ning e Dewit i warwara tar onoi nating ting na Buk Tabu, onone di ka tolsot pasi. I

1:11: 1:11 Matiu 26:64; Luk 21:27 **1:12: 1:12** Luk 24:50-53

1:13: 1:13 Matiu 10:2-4 **1:16: 1:16** Buk Song 41:9

warwara oe Judas esaning i nigon la ning la tong pas e Iesu.

¹⁷ I ning a halimila, pa i arnangai ana titol ne.”

¹⁸ E Judas i lou pas ning a puka kabalapiu ana mani tagun anuna toltol laulau. Tingia na nuna kabalapiu i punga purum, pa balana i tapuros potor, pa suan na balana i purum rop.

¹⁹ La rop ning la kes tisa e Jerusalem, la longori, pa la atong a kabalapiu ning ana nunla warwara mang Akeldama, a kamkamna mange, a kabalapiu a suluk.

²⁰ E Pita i atongi mang, “Di ka tumus tari ting na Saksakla ane Dewit mang,

‘Anuna rumai ir belbel,

pa gong tik i kes tingia.’

Buk Song 69:25

Pa di tumusi otleng manglarne,

‘Tik ir kelesi ana nuna titol.’

Buk Song 109:8

²¹⁻²² I wakak ning dalar aslang pas ta barsan sur i otleng a tena warwara talapor taum ondala oe Iesu, ana nuna kamkamtur ulak kusun a minat. I wakak ning ta halindala, ning dala keskes taum oe Iesu. A barsan ning i kes taum ondala turpasi ning e Jon i baptais tuk ana pukakiar ning di los pas e Iesu kusun dala usaot na langit.”

²³ Pa la atong otnan pas naur: E Josep, di atongi e Barsabas, pa ning a risana otleng e Jastus, diau ma e Matias.

²⁴ Pa la araring mang, “Leklek, u tasman a balana taraila rop, ur asangan mila, esi na halindiau momol ning u ka aslang tari,

²⁵ sur ir kibas a titol na aposel, ning e Judas ka mat pas kusuni pa ka han uting na hanua ning i arlar taum ana nuna toltol laulau.”

²⁶ Pa la tol a titol na aslang ana naur a hat, pa hat ane Matias i hanot. Pa la was taman e Matias tetek ning a bonot pa pisir takai a aposella.

2

A tinanot anuna Talngan Tabu ana pukakiar a Pentikos

¹ Ning a pukakiar a Pentikos i hanot, a tena tortorotla rop la kes taum ting na ning a rumai.

² Pa unga misaot na langit i arlar ana unga ana tnan wuwu, i hanot kulkulan tetek la, pa i abukus pas a rumai ning la kes ono.

³ Pa la oroi a ututnala la arlar ana irnga na iah, la han sarara pa la kes saot onla taktakai.

⁴ Pa la rop la bukus ana Talngan Tabu, pa la turpas a warwara ana urmatana warwarala, ning a Talngan Tabu i sarani tanla.

⁵ Pa galis a te Judala otleng la kes tisaot e Jerusalem, la na tena lotu miting na matanitula rop te na rakrakan hanua.

⁶ Ning la longor a unga ne, la dun ot taum, pa i loklokron a nuknukinla onoi, anasa la taktakai la longor anunla na warwara, ning a tena tortorotla la warwara ono.

⁷ Pa la rop la kulkulan pa la nuknuk kol ana utna ne, pa la atongi mange, “Oroi, la ne, ning la warwara, a tarai Galili rop ka!

⁸ Asa kamkamna ning dala rop taktakai, dala longor lalan anundala na warwara?

⁹ Dala na te Partiala, a te Midiala, a te Elamla, pa dala mitumo na paparla ne Mesopotemia, Judia, Kapadosia, Pontus, Esia,

¹⁰ Prigia, Pampilia pa e Ijip. Dala mitumo na papar Libia ning i milau e Sairini, pa dingla na tarai mitumo e Rom. Dala na tarai Juda pa dingla ondala ning la kas ting na lotu Juda.

¹¹ Pa dala miting e Krit pa papar Arebia. Dala rop dala longor la ning la warwara ana tatatnan titol ane God ana nundala na warwara.”

¹² Pa la kulkulan, pa i loklokron a nuknukinla, pa la deken artalai la mang, “Asa kamkamna a utna ne?”

¹³ Ika dingla na tarai la morot onla, pa la atongi mang, “La gang a wain pa la sipak ono.”

A warawai ane Pita

¹⁴ Lamur e Pita i tur taum ana ning a bonot pa pisir takai aposella, pa i warwara kol tetek a taraila mange, “Mulo a tarai Juda, pa mulo rop ning mulo kes te Jerusalem, ar atalapor a utna ne tamulo, pa mulor longor wakaki.

¹⁵ Mulo atongi mang la sipak. Ika bel, anasa i 9 kilok ot ne ana kobot.

¹⁶ A utna ne mulo oroi, a propet Joel ka warwara nigo tar onoi mang,

¹⁷ ‘E God i atongi mange:

Ana ararop a pukakiarla

ar saran purum a Inguk tetek a taraila rop.

A natnatumulola, a taraila pa gurarala, lar warwara na propet.

Anumulo na barmanla lar oroi a tatataila,

pa numulo na bun lar resnan a reresala.

18 Ana pukakiarla ning, ar saran a Inguk tetek la otleng ning anuk na tena titol oros, a taraila pa gurarala, pa lar warwara na propet.

19 Par asangan a ututnala na kulkulan saot na langit, pa akinalangla te lapiu na rakrakan hanua, lar a suluk, a iah, pa a tnan sasawan.

20 A kamis ir mormorom, pa kalang ir kubar, lar a suluk, pa lamur a pukakiar ana Leklek ir hanot, a tnan pukakiar ning, a pukakiar a matatar.

21 Pa la rop ning la araring tetek a Leklek, ir alaun la.' *Joel 2:28-32*

22 "A tarai Israel, mulor longor iau. Ar atai mulo oe Iesu, a te Nasaret. Mulo ot mulo tasmani mang ana rakrakai e God, i tol a ututnala na kulkulan, pa rakrakai a titolla pa akinalangla. I toli na arpotor imulo, sur e God ir asangani tetek mulo mang i ot i sune seni.

23 Di saran tar e Iesu tamulo, pa mulo taum ana laulau a taraila, mulo sai ahati saot na rakai kutus. E God ka tasman nigon tari mang a ututnala ne ir hanot arlar ana nuknukna.

24 Ika e God i akamtur ulak pasi, pa i kepsen a kankan a minat kusuni, anasa a minat bel i tolsot sur ir tong akesi.

25 E Dewit ka atong tari oe Iesu mang, 'A tasmani mang a Leklek i kes bolbolos na matak.
Bel ar koloron,
anasa i kes te na sot a kuk.

- 26 A balak i gas kol, pa a warwara taum ana gasgas,
pa a tortorot mang ur alaun a palaok,
- 27 anasa bel ur noren sen iau ting na kulam a minat,
pa bel ur noren tar a Tena Totoh anumi sur ir marase.
- 28 U ka asangan tar iau ana ngasla sur a lalaun.
Ning ar kes taum hom, ur abukus iau ana gasgas.’ *Buk Song 16:8-11*
- 29 “Na tastasikla, ar warwara talapor tetek mulo oe Dewit, a tubundala tagun nating. I mat pa di akasi ting na kulam a minat, pa anuna kulam a minat kanet tandala tuk onone.
- 30 Ika e Dewit ai a propet, pa i tasmani mang e God ka lele tar teteki mang i ot ir akes tar tik miting na mangis a tarai anunai, sur ir kelesi ana nuna keskes a king.
- 31 E Dewit ka tasman nigon tar a utna ning ir hanot, pa i atong a warwara ne ana kamkamtur ulak ane Karisito, mang bel di noren seni ting na kulam a minat pa a palaona bel i marase.
- 32 E Iesu ot ning, e God i akamtur pasi kusun a minat, pa mila rop mila oroi pa mila warwara talapor onoi.
- 33 Di aleklek pasi pa di akesi ting na sot a kuna e God, pa e God e Tamana ka saran tar a Talngan Tabu teteki larning i lele tari, pa onone e Iesu ka saran purum tar a utna ne mulo oroi pa mulo longori.

34 E Dewit bel i han usaot na langit, ika i atongi mange,

‘A Leklek i atongi tetek anuk a Leklek,

“Ur kes te na sot a kuk,

35 tuk ning ar tolsot pas anum na hiruala

sur lar kes nahaim.” ’ * *Buk Song 110:1*

36 “ Mulo a tarai Israel rop mulor tasman wakaki, mang e Iesu ning mulo sai ahati saot na rakai kutus, e God ka akes tari sur ai a Leklek pa Karisito otleng.”

37 Ning la longor a warwara ne, i so na balanla, pa la deken e Pita pa dingla na aposel mang, “Na tastasimila, asaning milar toli?”

38 E Pita i keles la mang, “Mulo rop taktakai mulor lingir a nuknukimulo, pa dir baptais mulo ana risana e Iesu Karisito, sur dir kepsen anumulo na toltol laulaula, pa mulor kibas a Talngan Tabu.

39 A artabar ne e God ka lele tar ono, ir han tetek mulo, pa na natnatumulo, pa la otleng ning la kes bakbak. Pa ir han tetek la rop, ning a Leklek anundala a God, ir kabah pas la teteki.”

40 Pa i atumarang la ana galis a warwara otleng, pa i nunung rakrakai la mang, “Mulor tai alar mulo, pa mulor tur masik kusun a toltol laulau anuna tarai tagun onone, sur gong e God i saran a warkurai a arkeles tetek mulo.”

41 La ning la kibas a warwara ane Pita di baptais la. La arlar ana natol a rip, pa di was taman la ana tena tortorotla.

* **2:35: 2:35** “ A Leklek” i warwara oe God, pa “anuk a Leklek” i warwara oe Iesu. **2:36: 2:36** Aposel 5:30-31 **2:38: 2:38** Aisaia 57:19 **2:41: 2:41** Aposel 2:47; 4:4

⁴² Pa la saran tar la ot ana asaer anuna aposella, ana keskes taum ana marmaris, pa ana keskes taum ana utna na hangan, pa ana niaring.

A tena tortorotla la kes taum

⁴³ A aposella la tol a galis a utna na kulkulan, pa galis a akinalang otleng, pa taraila rop la hanrawai e God.

⁴⁴ A tena tortorot rop la kes taum, pa ututnala rop ning anunla taktakai, anunla rop ka.

⁴⁵ La siuran anunla na puka kabalapiu pa nunla na ututnala, pa mani taguni la salari tetek esining i kapan.

⁴⁶ La sira kes taum ting na woroh na rumai artabar ana pukakiarla rop. La hangan taum ting na nunla na rumaila ana gasgas pa momolna ting na balanla.

⁴⁷ Pa la rakan aleklek pas e God, pa taraila rop la gas onla. Pa ana pukakiarla rop a Leklek i alaun a galis a tarai, pa di was taman la ana tena tortorotla.

3

Di alangolango pas a barsan ning bel i sira han

¹ Ning a pukakiar e Pita pa e Jon dia han usaot na rumai artabar, sur a lotu na niaring, ona 3 kilok ana rah.

² A tarai la los ning a barsan bel i sira han, di agon pasi mang ot larning. Pa ana pukakiarla rop, la akakesi ting na taman na rumai artabar, di atongi mang a wakak a taman, sur ir nununung utna tanla ning la kas.

³ Ning i oroi e Pita pa e Jon dia mang sur diar kas, i nunung diau sur al mani.

⁴ Pa dia tai tostos teteki, pa e Pita i atai i mang, “Ur ngoson miau!”

⁵ I ngoson diau, pa i kes nanan diau sur al utna tandiaiu.

⁶ Pa e Pita i atai i mange, “Iau bel al mani, ika ar tabar u ana utna ning anuki. Ana risana e Iesu Karisito, a te Nasaret, ur tur pa ur han!”

⁷ E Pita i tong pas a sot a kuna, i dat atur pasi, pa ano otning naur a hana dia rakrakai.

⁸ I tur kapit, pa i han. Pa ditol kas uting na woroh na rumai artabar, i hanan, i sirsirok pa i rakan aleklek e God.

⁹ Ning a taraila rop la oroi ning i han, pa i rakan aleklek e God,

¹⁰ la oroi lalani mang i ka, esaning i keskes, pa i sira nunung utna ting na wakak a taman, pa la kulkulan kol ana utna ne di toli onoi.

¹¹ Pa barsan ne i tong akes e Pita pa e Jon, pa taraila rop la kulkulan kol pa la dun tetek ditol ting na parada na rumai artabar, ning di atongi mang a Parada ane Solomon.

E Pita i warawai ting na rumai artabar

¹² Ning e Pita i oroi la, i atai la mang, “Mulo a tarai Israel, sur asaning mulo kulkulan ana utna ne pa mulo ngoson rakrakaimiau? Mangasa, mulo nuki mang mia alangolango pas a barsan ne ana rakrakaimiau ot, o anasa mia tol a toltol ning e God i mang suri? Bel!

¹³ E God ot i toli. A God ane Abaram, Aisak pa e Jekop, a God anuna nundala mangis a tarai tagun nating, i aleklek e Iesu anuna tena titol. Mulo saran tari sur dir sai koli, pa mulo puain seni na matana e Pailat, ning i mang sur ir pak seni.

¹⁴ Mulo puain sen a Tena Totoh pa Tena Tostos, pa mulo nunung sur dir pak sen a tena umkol a tarai tetek mulo.

¹⁵ Pa mulo umkol e Iesu, ning a kama lalaun, ika e God i akamtur ulak pasi kusun a minat. Pa mila oroi i, pa mila warwara talapor onoi.

¹⁶ Ana tortorot ana risana e Iesu, di arakrakai pas naur a hana barsan ning mulo oroi i, pa mulo tasmani. Ana tortorot ana risana e Iesu di alangolango pas a barsan ne na matamulo rop.

¹⁷ “Na tastasik, a tasmani mang mulo taum ana numulo na ningnigo otleng bel mulo tasman asaning mulo toli oe Iesu.

¹⁸ Ika ana ututnala ne mulo toli, e God i tolsot pas a ututnala ning ka atong tari nating ana warwara anuna propetla rop mang, anuna Karisito ir mat.

¹⁹ Mulor lingir a nuknukimulo, pa mulor han tetek e God, sur ir kepsen anumulo na toltol laulau.

²⁰ Pa mulor kilang a wakak a lalaun tana Leklek, pa ir sune a Karisito tetek mulo, e Iesu ning e God ka aslang tari.

²¹ Ir kes saot na langit, tuk ana pukakiar ning e God ir atona ulak a ututnala rop, ning ka lele

nigo tar onoi ana warwara anuna tostos a propetla anunai.

²² Anasa e Moses i atongi mang, ‘A Leklek anumulo a God ir sune ta propet arlar hok tetek mulo, miting na numulo a mangis a tarai. Mulor longor a ututnala rop ning ir atongi tamulo.

²³ Esining bel i longor tana propet ning, dir umsem onoi kusun a taraila ane God.’ *Lo 18:15, 18-19*

²⁴ “A propetla rop ning la warwara ana warwara ane God, turpasi oe Samuel, pa la ning la hanot lamur tana, la warwara nigo ana pukakiarla ne.

²⁵ A warwara anuna propetla anumuloi ka, pa kunubus otleng ning e God i tol tari tetek anumulo a mangis a tarai nating, ning i atongi tetek e Abaram mang, ‘Oe tubum ar angis a mangis a tarai rop te na rakrakan hanua.’ *Stat 22:18*

²⁶ Ning e God i sune sen anuna Tena Titol, i sune nigoni tetek mulo, sur ir angisngis mulo, ning ir ben ulak mulo rop kusun anumulo na toltol laulau.”

4

E Pita pa e Jon dia tur ana warkurai

¹ Ning e Pita pa e Jon dia warwara tetek a taraila, a tena artabarla tetek e God, pa ningnigo anuna tena tai alarla miting na rumai artabar, pa Sodusila, la han tetek diau.

² La balakut diau, anasa dia asaer a taraila mange, a minatla lar kamtur ulak kusun a minat, arlar lar a kamkamtur ane Iesu.

³ La dat pas diau pa la akas diau uting na karabus, sur diar kes tuk latu, anasa ka rah.

⁴ Ika, a galis ning la longor a warwara ane Pita pa e Jon, la tortorot. Pa wawas ana taraila ka ning la tortorot i arlar ana dilima na rip.

⁵ Ana pukakiar lamur tana, a ningnigola, pa tarai a kiwung pa tena asaerla tagun a warkurai, la kes taum saot e Jerusalem.

⁶ La taum ma e Anas, a ningnigo na tena artabar tetek e God, pa na maina ne: E Kaiapas, e Jon, e Aleksanda, pa dingla na tarai otleng.

⁷ La ben pas e Pita pa e Jon pa dia tur na matanla, pa la deken diau mang, “Esi na ngas a rakrakai, pa ana risana esi, ning mu tol a utna ne onoi?”

⁸ E Pita i bukus ana Talngan Tabu, pa i atai la mang, “Mulo a ningnigola anuna taraila pa tarai a kiwung otleng,

⁹ onone mulo deken miau ana wakak a titol ne mia toli ana barsan, ning bel i sira han pa di alangolango mangasa pasi.

¹⁰ Mulo taum ana tarai Juda rop, mulor tasmani mang, a barsan ne i tur salanigo tamulo, di alangolango pasi ana risana e Iesu Karisito a te Nasaret, esaning mulo sai ahat tari saot na rakai kutus, pa e God i akamtur ulak pasi kusun a minat.

¹¹ E Iesu ‘A hat ning mulo na tena tol rumai mulo kepseni,

i ot ning a wakak a hat kes, ning di tol a rumai
saot ono.’ *Buk Song 118:22*

¹² Bel tik masak ir alaun dala, pa bel ta risana tik
otleng te na rakrakan hanua, ning e God i saran
tari tetek a taraila sur dir alaun dala onoi.”

¹³ La tasmani mang e Pita pa e Jon naur a
barsan oros ka, bel dia asaer pas on ta tnan
asaer. Pa la kulkulan kol ondiau ning dia
warwara pa bel dia matmataut. Pa la tasmani
mang nating ditol sira armuri taum ma e Iesu.

¹⁴ Ika ning la oroi a barsan ning di
alangolango pasi, i tur taum ondiau, bel al
warainla ma sur lar keles diau.

¹⁵ La sune maskan sen ditol kaba kusun a
kiwung, pa la warwara taum pas mange,

¹⁶ “Dalar tol asa ana naur a barsan ne? Anasa
dia ka tol tar ning a tnan utna na kulkulan, pa ka
talapor tetek la rop ning la kes te e Jerusalem. Pa
dalar puai mangmangasa?

¹⁷ Dalar sairas rakrakai diau, sur gong ulak ma
dia warwara tetek tik ana risana e Iesu, sakana a
warwara ne ir han sarara tetek a taraila rop.”

¹⁸ Lamur la kabah ulak pas diau, pa la sairas
diau sur gong ma dia warwara pa dia asaer
halala ana risana e Iesu.

¹⁹ Ika e Pita pa e Jon dia keles la mange,
“Mangasa, i tostos na matana e God ning miar
longor tetek mulo, pa tetek e God gong? Mulo ot
mulor oroi sursuri.

²⁰ Ika miau, bel mia tolsot sur miar sairas
miau ana warwara ona ututnala ning mila ka
oroi tari, pa mila ka longor tari.”

21 Ning la ka sairas rakrakai tar diau, la pak sen diau. Bel la pastek ta utna ning lar um diau onoi, anasa a tarai la rakan aleklek pas e God ana utna na kulkulan ning dia ka tol tari.

22 Anasa a barsan ning di tol tar a utna na kulkulan onoi pa i langolango, anuna rau a lalaun ka bolos tar diat a bonot a rau.

Na tena tortorot la araring

23 Ning di ka pak sen e Pita pa e Jon, dia ulak tetek na halalindiau, pa dia atai la ana warwarala rop ning a leklek a tena artabarla tetek e God pa ningnigola la ka atong tari tandiau.

24 Ning la longori, la araring taum tetek e God mange, "Leklek, u akes a langit, a rakrakan hanua, a tasi, pa ututnala rop tingia onditol.

25 Pa ana Talngan Tabu u warwara tetek a tubumila e Dewit anum a tena titol mange, 'Asa kamkamna ning a taraila ning bel a tarai Israel la balakut kol, pa la pinpidaiwol sur lar tol na toltol laulau? Ika anunla pinpidaiwol i utna oros ka.

26 A kingla mite na rakrakan hanua la tur na harum, pa ningnigola la han taum, sur lar alaulau a Leklek pa anuna Mesaia, ning i aslang pasi.' *Buk Song 2:1-2*

27 A momolna, e Herot pa e Pontius Pailat la han taum ana taraila ning bel a tarai Israel, pa tarai Israel otleng, te na hanua ne, sur lar alaulau

anum a Totoh na Tena Titol e Iesu, ning u ka aslang pasi.

²⁸ Ning la toli manglarning, la tolsot pas a ututnala ning nating u ka sang tari ana rakrakaim pa nuknukim sur ir hanot.

²⁹ Leklek, onone ur nuk pas anunla na rakrakai a warwara, pa ur arakrakai mila, anum a tena titol orosla, sur gong mila matmataut ning milar warwara talapor ana num a warwara.

³⁰ Pa ur nangan mila ana rakrakaim sur a tinsamanla lar langolango, a ututna na kulkulan pa akinalangla lar hanot ana risana e Iesu, anum a Totoh a Tena Titol.”

³¹ Ning la ka araring pas, a rumai ning la kes onoi, i gulgule, pa la rop la bukus ana Talngan Tabu, pa la warwara ana warwara ane God, pa bel la matmataut.

Na tena tortorot la asauran anunla na ututna

³² A tena tortorotla rop, takai ka a nuknukinla pa balanla, pa bel tik ta halinla i atong tar ta utna mang anunai ka. La suah taum a ututnala sur anunla rop.

³³ A aposella la warwara talapor taum ana tnan rakrakai, ana lalaun ulak ana Leklek e Iesu kusun a minat ning la ka oroi tari. Pa tnan marmaris ane God i kes onla rop.

³⁴ Bel tik ta halinla i kapan sur ta utna, anasa la ning anunla na puka kabalapiula pa la otleng ning anunla na rumaila, la siuran la, pa mani ono,

³⁵ la losi tetek a aposella. Pa la salari tetek esining i kapan.

³⁶ Pa e Josep otleng, a barsan misaot na lolo Saiprus, i miting na mangis a tarai Liwai, ning a aposella la atongi e Barnabas, a kamkamna mang a Tena Wunan.

³⁷ I siuran pas ning a puka kabalapiu anunai, pa i los a mani onoi tetek a aposella.

5

E Ananias pa e Sapaira

¹ Ning a barsan a risana e Ananias taum oe nuna hane a risana e Sapaira dia otleng dia siuran ning a puka kabalapiu.

² Pa dia malmaling taum sur diar tong akes ta tuka mani ning di lou tar a kabalapiu ono, pa ta tuka mani ka e Ananias i losi tetek a aposella.

³ Pa e Pita i atai i mang, “Ananias, sur asaning u malmaling pas e Satan sur ir solong a balam pa u asongo a Talngan Tabu? Sur asaning u bunur pas a tuka mani ning di lou tar a puka kabalapiu onoi?”

⁴ Ning a kabalapiu kaning ot tam, anumi ot. Pa ning u siuran pasi, u ot u warkurai sur a mani onoi. Asa kamkamna ning u nuk pas a laulau a toltol ne? Bel u asongo a taraila, u asongo ot e God.”

⁵ Ning e Ananias i longor a warwara ne, i punga purum pa i mat. Pa la rop ning la longor a arkaltai onoi, la matmataut kol.

⁶ A kakak tarai la hanot, la poroi pas a minatna, la los purumi, pa la pori.

⁷ Ning natol a awa alar tar a minat e Ananias, e nuna hane i kas, ika bel i tasman a utna ning i hanot.

⁸ Pa e Pita i dekeni mang, “Ur atai iau, a matana kabalapiu rop ot ne, ning mu siuran pasi?” Pa i kelesi mang, “Momol, a matana ot ning.”

⁹ E Pita i atongi tana mang, “Sur asa mu taum ma e num mese mu malmaling pas sur mur lar a Ingun a Leklek? Oroi, la ning la por e num mese, la kane na taman, onone lar los purum u otleng.”

¹⁰ Ano otning i punga purum salanigo ta e Pita, pa i mat. Pa kakak tarai la kas, la oroi mang ka mat, la los purum a minatna, pa la pori ting napir e nuna mese.

¹¹ Pa tarai a lotula rop la matmataut kol, pa la rop otleng ning la longor a ututnala ne.

A akinalangla pa ututnala na kulkulan

¹² A aposella la tol a galis a akinalang pa galis a utna na kulkulan tana taraila. Pa tena tortorotla rop la sira kes taum ting na parada na rumai artabar ning di atongi mang a Parada ane Solomon.

¹³ A taraila masik, la hanrawai kol la, ika la matmataut sur lar kes taum onla.

¹⁴ Ika a galis, a taraila pa gurarala kale, la bot tortorot ona Leklek, pa di was taman la ana tarai a lotula.

¹⁵ Ning a tarai la oroi a titol anuna aposella, la los la ning la kurah pa di aborbor la ting na ris a

ngas saot na logo ngasinla pa ting na matla, sur ning e Pita ir bolos la, a manarna ir han saot on hala onla pa lar langolango.

¹⁶ Pa galis a taraila mitumo na hananuala milau e Jerusalem, la hanot. La los a tinsamanla pa la ning a motla la alaulau la, pa di alangolango arop la.

A aposella la tur ana warkurai

¹⁷ A ningnigo na tena artabar tetek e God, pa halalnala rop miting na kunum a Sadusila, la bal laulau kol ona aposella.

¹⁸ Pa la dat pas a aposella, pa la akas la utingui na karabus.

¹⁹ Ika ana morom, ning a angelo anuna Leklek i sapang a tamanla ting na karabus, pa i ben purum la pa i atongi mang,

²⁰ “Mulor han, pa mulor tur ting na woroh na rumai artabar, pa mulor atai a taraila ana warwarala rop ana tona lalaun ne.”

²¹ Pa kobot ning ot, la kas uting na woroh na rumai artabar pa la asaer a taraila, larning di ka atai tar la.

Ning a ningnigo na tena artabar tetek e God pa halalnala la hanot, la kabah taum a tarai a kiwung rop, a ningnigola anuna tarai Israel. Pa la arsune utumo na karabus sur dir ben pas a aposella.

²² Ika ning a tena tai alarla miting na rumai artabar la hanot, bel ma la oroi la ting na karabus. La ulak, pa la warwara mang,

²³ “Ning mila hanot ting na karabus, mila oroi mang di ka tagar rakrakai tar ot, pa tena tai alarla kaning ot la tur ting na tamanla, ika ning mila sapang a tamanla, bel ma mila oroi la.”

²⁴ Ning a ningnigo anuna tena tai alarla pa leklek a tena artabarla tetek e God la longor a warwara ne, i loklokron a nuknukinla onoi, mang asa ma ir hanot.

²⁵ Lamur ning a barsan i hanot, pa i atai la mang, “Oroi, a tarai ning mulo akas tar la te na karabus, la kanumo ma na woroh na rumai artabar, pa la asaer a taraila.”

²⁶ A tena tai alarla taum ana nunla ningnigo la ben pas a aposella. La ben wakak pas la ka, anasa la matatan a taraila, sakana lar wolot la.

²⁷ Ning la ka ben pas a aposella, la atur la na matana tarai a kiwung. Pa ningnigo na tena artabar tetek e God i atai la mang,

²⁸ “Mila ka sairas rakrakai tar mulo mang gong mulo asaer a taraila ana risana e Iesu. Ika onone, a hanua Jerusalem ka bukus ana numulo na asaer, pa mulo mang sur mulor tiu mila ona minat e Iesu.”

²⁹ E Pita pa aposella la kelesi mang, “Milar longor ot ta e God, pa bel milar longor tana tik.

³⁰ A God anuna nundala mangis a tarai tagun nating i akamtur ulak e Iesu, esaning mulo ka umkol tari saot na rakai kutus.

³¹ I ot ning e God i aleklek pasi pa i akesi ting na sot a kuna, sur a Ningnigo pa Tena Alaun, pa ir tol a ngas sur a tarai Israel lar lingir a

nuknukinla, pa dir kepsen anunla na toltol laulau.

³² Mila oroi a ututnala ne, pa mila warwara talapor onoi, pa Talngan Tabu i amomol tar anumila na warwara. A Talngan Tabu, ai a artabar ane God tetek la ning la longor tana.”

³³ Ning la longor a warwara ne, la balakut kol, pa la mang sur lar umkol a aposella.

³⁴ Ika ning a Parisaio, a risana e Gamaliel, a tena asaer ana Warkuraila ane Moses, esaning a taraila rop la hanrawai i, i tur ting na kiwung, pa i atongi mang a aposella lar purum kaba.

³⁵ Pa i atai a tarai a kiwung mang, “Mulo a tarai Israel, mulor nuknuk wakak ana saning mulor toli ona taraila ne.

³⁶ Dingla na rau nating e Teudas i hanot, pa i iaunani mang i itna, pa galis a tarai, ngandek i arlar ana diat a mar, la muri. Ika ning di umkoli, la rop ning la muri la han sarara, pa anuna titol i rop oros ka.

³⁷ Lamur ta e Teudas, ning kale, e Judas, a te Galili, i hanot ana rau na tumus risandi, pa i ben maskan pas dingla na tarai sur lar harum taum ana matanitu. I otleng i hirua, pa la rop ning la muri, la han sarara.

³⁸ “I maining, onone a atai mulo mang: Gong mulo tol ta utna onla, mulor pak sen la. Ning a utna ne la toli i kamna ka tana taraila, ir rarop ka.

³⁹ Ika ning i kamna ot oe God, mulor tol panai sur mulor sairas la. Sakana lamur ir talapor tetek mulo mang mulo harum taum oe God.”

⁴⁰ La malmaling ana nuna warwarala, pa la kabah ulak a aposella, la miras la, pa la sairas la mang gong ma la warwara ana risana e Iesu. Pa lamur la pak sen la.

⁴¹ Pa a aposella la purum miting na kiwung, la gas, anasa e God i oroi la mang, la wakak sur lar kilang a meme ana risana e Iesu.

⁴² Ana pukakiarla rop ting na woroh na rumai artabar, pa ting na rumai ngasinla, bel la manah ana asaer pa warawai ana Wakak a Warwara mang e Iesu ai a Karisito.

6

Di aslang pas mais a barsan sur na titol na artabar

¹ Ana pukakiarla ning, a tarai a asaerla la galis amon. Dingla na tarai Juda la warwara ana warwara Grik, pa dingla onla la warwara ana warwara Hibru. La ning la warwara Grik la warwara na ururai onla ning la warwara Hibru, anasa la hanan lakai a laola anuna Grikla, ning la sira asauran a utna na hangan tana laola ana pukakiarla rop.

² Pa ning a bonot pa pisir naur a aposel la kabah taum a tarai a asaerla rop, pa la atai la mang, “Bel i tostos ning milar molot ka ana artabar ana utna na hangan, pa bel milar tol a titol na warwara talapor ana warwara ane God.

³ Na tastasimila, mulor aslang pas ir mais a wakak a barsan miting omulo, ning la tastasman

pa la bukus ana Talngan Tabu, sur milar saran tar a titol na artabar ne tanla.

⁴ Pa mila, milar molot ka ana niaring pa titol na warwara talapor ana warwara ane God.”

⁵ Pa la rop la gas ana warwara ne. Pa la aslang pas e Stiwen, a barsan ning i bukus ana tortorot pa a Talngan Tabu. Pa la aslang pas otleng e Pilip, e Prokorus, e Nikano, e Timon, e Pamenas, pa e Nikolas, a barsan mitumo e Antiok ning bel a te Juda, ika i kas uting na lotu Juda.

⁶ La ben la tetek a aposella. Pa la suah a kunla saot onla, pa la araring.

⁷ A warwara ane God i han sarara, pa tarai a asaerla la galis amon saot e Jerusalem. Pa galis a tena artabar tetek e God la tortorot pa la longor ana Wakak a Warwara.

Di tiu e Stiwen

⁸ E Stiwen i bukus ana rakrakai pa marmaris ane God, pa i tol a tatatnan utna na kulkulanla, pa akinalangla na arpotor a taraila.

⁹ Ika dingla na tarai Juda la arngaras taum oe Stiwen. A taraila ne miting na ning a kunum ning di atongi A Rumai Lotu anuna Langolango na Tarai. La miting na naur a hanua, e Sairini, pa e Aleksandria pa mitumo na naur a papar Silisia pa e Esia.

¹⁰ La tol panai sur lar keles anuna warwara anasa a Talngan Tabu ot i saran a mananos tana.

¹¹ Pa la arakrakai kumnan pas dingla na tarai, sur lar atongi mang, “Mila longor tari ot ning i warwara laulau oe Moses pa oe God otleng.”

¹² Pa la akutkut balan a ningnigola, pa tena asaerla tagun a warkurai pa taraila oros otleng. La han tetek e Stiwen, la tong akes pasi, pa la beni sur ir tur salanigo tana tarai a kiwung.

¹³ Pa la ben pas a taraila, ning lar tiwi ana asasongo na warwarala mang, “A barsan ne bel i manah ana warwara laulau ana totoh a rumai artabar pa ana Warkuraila otleng anun e Moses.

¹⁴ Mila longori i atongi mang e Iesu, a te Nasaret, ir regen sen a rumai ne, pa ir keles sen a toltolla ning e Moses ka asaer tar dala onoi.”

¹⁵ Pa la rop ning la kes ana kiwung la ngoson rakrakai e Stiwen, pa la oroi mang a patarna i arlar ana patar a angelo.

7

A warawai ane Stiwen

¹ A ningnigo na tena artabar tetek e God i deken e Stiwen mange, “I momol ot a warwarala ne?”

² Pa i kelesi mange, “Na tastasik pa na tamang, mulor longor tak. A God a matatar i hanot tetek a tubundala e Abaram, ning kaning ot i kes ting e Mesopotemia, pa belot i kes tumo e Haran.

³ Pa e God i atongi tana mang, ‘Ur han kusun anum a hanua, pa na maimla otleng, pa ur han uting na hanua ning ar asangan u onoi.’ *Stat 12:1*

⁴ “Pa i han kusun a hanua anuna Kaldiala, pa i kes tumo e Haran. Lamur tana minat ane tamana, e God i sune ulaki sur a hanua ne, onone dala kes ono.

⁵ Belot i saran ta puka kabalapiu tana sur

anunai, o ta natar a pukna kama. Ika, i lele tari mang lamur ir saran tar a kabalapiu ne tana pa tetek na tumtubunala. Ning e God i lele, e Abaram belot ta natnalik.

⁶ Pa e God i atai i mang, ‘Na tumtubum lamur tam lar kes na wasira ting na ta wasira na hanua, pa lar titol na karabus, pa dir alaulau la ona diat a mar a rau.

⁷ Ika ar akadik a taraila miting na matanitu ning la dat pas na tumtubum sur lar titol na karabus. Pa lamur la ning la titol na karabus lar han kusun a hanua ning, pa lar lotu tetek iau te na hanua ne.’

Stat 15:13-14

⁸ E God i saran tar a kunubus ta e Abaram. Pa asilang ana kunubus ning, a kot talilis a palaona kaklik barsan. E Abaram i aitna e Aisak, pa ning ka siwal a pukakiar anoi, e Abaram i kot talilis a palaona e Aisak. Lamur e Aisak i aitna e Jekop, pa e Jekop i aitna pas ning a bonot pa pisir naur a tumtubundala.

⁹ “Na tubundala tagun nating la bal laulau oe Josep, a tasinla, pa la siurani sur ir titol na karabus tumo e Ijip. Ika e God i kes taum onoi,

¹⁰ pa i alauni kusun a mamahatla ning i kilangi. I saran a wakak a mananos tana, pa i nangani sur e Pero, a king mitumo e Ijip, ir gas onoi. E Pero i suahi sur ir ningnigo ting na hanua Ijip pa ir ningnigo otleng ting na rumai ane Pero.

¹¹ “Pa tnan munurak i hanot rop tumo e Ijip,

pa e Kenan otleng, pa galis a mamahat i kibas a taraila, pa bel al utna na hangan ana tumtubundala.

¹² Ning e Jekop i tasmani mang a wit kanumo e Ijip, i sune na natnatnala, a tumtubundala, la han mitumo e Kenan uto e Ijip a ningnigo na tinan.

¹³ Ning ka munaur a tinan anunla, e Josep i atai talapor la mang ai a tasinla. Pa e Pero otleng i talapor bot ana tastasna e Josep.

¹⁴ Lamur e Josep i arsune sur e tamana, e Jekop, la taum ana mainala. La rop mais a bonot pa pisir dilima.

¹⁵ Pa e Jekop taum ana mainala la han pa la kes tumo e Ijip. Lamur e Jekop pa na natnatna la mat tumo ia.

¹⁶ A galis a raula lamur di los pas a sursurinla pa di akas la ting na kulam a minat tumo e Kenan ting na hanua Sikem. A kulam a minat ning e Abaram ka lou tari tana natnatna e Hamor.

¹⁷ “Ning i milau amon a taim sur e God ir tolsot pas anuna lele tetek e Abaram, anundala na tarai la ka galis rop tumo e Ijip.

¹⁸ Pa ning a tona king i turpasi sur ir warkurai e Ijip, pa bel i talapor ana titol ane Josep nating.

¹⁹ Pa i asongo tar anundala na tarai, pa i alaulau la, pa i warkurai tari sur lar kepsen anunla na kakak betbetela sur lar mat.

²⁰ “Ana rau ning, di agon e Moses. Ai a wakak

7:13: 7:13 Stat 45:1-4, 16 **7:14: 7:14** Stat 45:9-11; 46:27 **7:15:**
7:15 Stat 46:1-7; 49:33 **7:16: 7:16** Stat 23:2-20; 33:19; Josua 24:32
7:17: 7:17 Kisim Bek 1:7 **7:19: 7:19** Kisim Bek 1:11-22 **7:20:**
7:20 Kisim Bek 2:2

a kaklik kol na matana e God, pa di tai alari ana natol a kalang ting na rumai ane tamana.

²¹ Ning di apurumi tumo lapiu, a natna hane e Pero i los pasi, pa i lawati sur a natnalik.

²² Pa di asaer e Moses ana ngas a mananosla rop anuna tarai Ijip, pa ai a rakrakai a barsan ana nuna na warwara pa titolla.

²³ “Ning ka diat a bonot a rau a lalaun ane Moses, i nuknuk sur ir han pa ir oroi anuna tarai Israel.

²⁴ I oroi ning a te Ijip i um laulau ning a te Israel, i dun tetek diau pa i umkol a te Ijip, sur ir keles pas ning a halna.

²⁵ E Moses i nuki mang anuna tarai lar tasman lalani mang e God i sune i sur ir alaun pas la, ika bel la tasmani.

²⁶ “Ning a pukakiar lamur tana, i oroi naur a te Israel dia harum, pa e Moses i mang sur ir amolmol diau mange, ‘Naur a barsan, mu ka. Mangasa ning mu alaulau artalai mu?’

²⁷ Pa esaning i um laulau tar ning a halna i sugut sen e Moses, pa i atai i mang, ‘Esi i suah tar u sur ningnigo pa ur tena warkurai anumila?’

²⁸ U mang sur umkol iau, larning u umkol a te Ijip nabong, gepi?’ *Kisim Bek 2:14*

²⁹ Ning e Moses i longor a warwara ne, i liu kumna utumo na hanua Midian. Ana nuna keskes na wasira tumo, i aitna naur a natna, naur a kaklik barsan.

³⁰ “Ning ka diat a bonot a rau ana nuna keskes tumo e Midian, ning a angelo i hanot teteki ana

7:21: 7:21 Kisim Bek 2:3-10 **7:24:** 7:24 Kisim Bek 2:11-15

7:29: 7:29 Kisim Bek 2:21-22; 18:3-4 **7:30:** 7:30 Kisim Bek 3:1-4

irnga na iah tingui na natar a rakai ning i irnga, ting na hanua bel milau a mangir Sinai.

³¹ Ning e Moses i oroi, i kulkulan ono. I han milau sur ir oroi wakaki, pa i longor a elngena Leklek i mang,

³² ‘Tau a God anuna tumtubumla tagun nating, a God ane Abaram, Aisak pa e Jekop.’ *Kisim Bek 3:6*

Pa e Moses i koloron, pa i matmataut sur ir oroi.

³³ Pa Leklek i atai i mange, ‘Ur pak sen naur a su kusun naur a ham, anasa a kabalapiu ne u tur onoi, anuki.

³⁴ Ia ka oroi a mamahatla ning i kibas anuk a tarai ning la kes tumo e Ijip, pa ia ka longor anunla na tinangis. Pa ia ka han purum, sur ar alangolango pas la. Lamut, par sune ulak u utumo e Ijip.’ *Kisim Bek 3:5, 7-8, 10*

³⁵ “A tarai Israel ning la aliu sen e Moses ana nunla na warwara mang, ‘Esi i suah tar u sur ningnigo pa ur tena warkurai anumila?’ Ika, e God ot i sune i sur ir ningnigo pa ir alangolango a taraila. I sune i ana warwara anuna angelo ning i hanot teteki ting na natar a rakai.

³⁶ E Moses i nigon purum la mitumo e Ijip, i tol a ututnala na kulkulan, pa akinalangla tumo e Ijip pa tumo na Tasi Kubar, pa ting na hanua bel otleng, arlar ana diat a bonot a rau.

³⁷ E Moses, esaning i atai tar a tarai Israel mang, ‘E God ir saran ta propet arlar hok miting ot na numulo a mangis a tarai.’ *Lo 18:15*

³⁸ E Moses i kes taum ona maindala tagun nating,

a tarai Israel, ting na hanua bel, pa angelo i warwara teteki saot na mangir Sinai. Pa i kibas a warwara ning i laun pa i tumus akesi sur dala.

³⁹ “Ika na maindala tagun nating bel la mang sur lar longor ta e Moses. La gilam ris kusuni, pa la nuknuk ulak utumo e Ijip.

⁴⁰ Pa la atai e Aron mang, ‘Ur tol pas anundala al god sur lar nigon dala, anasa e Moses, esaning i nigon purum pas dala mitumo e Ijip, bel ma dala tasman asaning ka hanot onoi.’ *Kisim Bek 32:1*

⁴¹ Ana pukakiarla ning, la tol pas a natar a bulumakau ana gol, pa la gas ana ngen kunla pa la artabar teteki.

⁴² Pa e God i talingir kusun la, pa i noren la, sur lar lotu tetek a nangnangla, larning di ka tumus tari ting na buk anuna propetla mange, ‘Mulo a tarai Israel,

diat a bonot a rau ning mulo kes ting na hanua bel,

bel mulo artabar, pa bel mulo umkol ta inagoi sur mulor artabar onoi tetek iau.

⁴³ Mulo los a rumai lotu anuna asasongo na god Molek,

pa manar a nangnang anuna numulo a asasongo na god Repan.

A ututnala ning mulo toli, sur mulor lotu tetek la.

Ar kepsen sen mulo’ *Amos 5:25-27*
pa mulor han bolos e Babilon pa utumot.

⁴⁴ “Na maindala tagun nating la los amon a rumai a sel ting na hanua bel. A rumai a sel

ning, i apuasa i mang e God i kes taum onla. Di toli muri ot a warwara ane God tetek e Moses arlar ana manar ning i oroi tari.

⁴⁵ Pa na tubundala tagun nating la sarani tetek na natnatunla. Pa la male la los amoni ning e Josua i nigon la, sur lar kibas a hananuala kusun a taraila miting na matanitula ning e God i lu sen la. Pa i kes tingia tuk ana rau ane Dewit,

⁴⁶ esaning e God i mang kol suri. Pa e Dewit i nunung e God sur ir malmaling sur ir tol ta rumai, sur a tarai lar lotu tingia tetek e God, a God ane Jekop.

⁴⁷ A rumai ning, e Solomon i toli.

⁴⁸ Ika e God ning i Leklek Kol bel i kes ting na rumaila ning a tarai la toli, larning a propet i atongi mange,

⁴⁹ ‘A Leklek i atongi mange: A langit anuk a keskes a king,
pa rakrakan hanua a utna ning a suah naur
a hak saot ono.

Esi na ngas a rumai ning mulor toli anuki?

Kanaha anuk a pukna na manah?

⁵⁰ Mangasa, bel a ngen kuk ana ututnala rop
ne?’ ” *Aisaia 66:1-2*

⁵¹ Pa e Stiwen i atai a tarai a kiwung mange,
“Mulo na tabun longorla, a balamulo i bakbak
kusun e God pa talngamulo i kutkut. Mulo sairas
liknan a Talngan Tabu, arlar ana numulo na
mangis a tarai tagun nating.

⁵² Esi na propet ning anumulo a mangis a tarai tagun nating, bel la alaulau i? La umkol la, ning la warwara nigo ana tinan ot anuna Tena Tostos ute, ning mulo ka saran tari uting na kuna hiruala, pa mulo ka umkol tari,

⁵³ mulo ning mulo ka los a Warkuraila ane God, ning a angelola la sarani tetek mulo, ika bel mulo muri.”

Di wolot amat e Stiwen

⁵⁴ Ning a tarai a kiwung la longor a warwarala ane Stiwen, la balakut kol, pa la harat pap suri.

⁵⁵ E Stiwen i bukus ana Talngan Tabu, i tadai usaot na langit, pa i oroi a matatar e God, pa e Iesu ning i tur ting na sot a kuna e God.

⁵⁶ Pa i atongi mang, “Oroi! A oroi a langit i sapang, pa a Nat a Barsan i tur ting na sot a kuna e God.”

⁵⁷ Pa la bari ana tnan elngenla, la tong alar a talnganla, pa la dun alari.

⁵⁸ La rihi kusun a hanua, pa la wololoti. Pa la ning la tiu e Stiwen, la pak sen anunla na kaenla ning la polpol alar anunla na mermer ono, pa la suahi ting na naur a hana ning a barman a risana e Sol.

⁵⁹ Ning kaning ot la wololoti, e Stiwen i araring mange, “Leklek e Iesu, ur los pas a inguk.”

⁶⁰ Pa i kes ana bokona hana, pa i kukuk mang, “Leklek, gong u keles a toltol laulau ne la toli.” Ning ka atong aropi larne, i mat.

8

¹ E Sol i malmaling taum onla sur dir umkol e Stiwen.

E Sol i alaulau a tarai a lotula

Ana pukakiar ning di umkol e Stiwen, a tarai la turpasi sur lar alaulau a tarai a lotula saot e Jerusalem, pa tarai a lotula la han sarara ting na naur a papar Judia pa e Samaria. Ika, a aposella bel la han.

² Na tena lotu ning la mur a nuknuk e God, la por e Stiwen, pa la domos rakrakai suri.

³ Ika e Sol i alaulau a tarai a lotula, i kas uting na nunla na rumai, pa i dat a taraila pa gurarala, pa i akas la uting na karabus.

Di warawai ana Wakak a Warwara tumo na papar Samaria

⁴ La ning la han sarara misaot e Jerusalem, la warawai ana Wakak a Warwara ting na hananuala ning la han ia.

⁵ Pa e Pilip i han uting na ning a tnan hanua tumo na papar Samaria, pa i warawai oe Karisito tetek la.

⁶ Ning a kunum a tarai la longor a warwara ane Pilip, pa la oroi a ututnala na kulkulan ning i toli, la mang kol sur lar longor a warwarala ning i atongi.

⁷ I kepsen a motla kusun a galis, pa ning a motla la purum, la kukuk rakrakai. Pa i alangolango pas a galis ning a palaonla i mat, pa la ning bel la tolsot pas a tinan.

⁸ Pa taraila misaot na hanua ning, la gas kol.

E Saimon a tena wah

⁹ Ning a barsan mitingia, a risana e Saimon, i sira wah pa i akulkulan a tarai Samaria ana ututnala ning i toli. Pa i iaunani na matana taraila.

¹⁰ Pa taraila rop, a leklekla pa tarai oros ka, la hanrawai i, pa la atongi onoi mang, “A barsan ne i tong akes a rakrakai ane God, a rakrakai ning di atongi mang A Tnan Rakrakai.”

¹¹ Pa la longor wakaki, anasa ka bongnan la, la sira kulkulan ana nuna toltol na wahla.

¹² Ika ning e Pilip i warawai ana matanitu ane God, pa ana risana e Iesu Karisito, a taraila pa gurarala la tortorot pa di baptais la.

¹³ E Saimon otleng i tortorot, pa ning di ka baptais tari, i mur mokos e Pilip. Ning e Saimon i oroi a akinalangla pa a ututna na kulkulan i toli, i kulkulan kol onoi.

¹⁴ A aposella ning la kes saot e Jerusalem, la longori mang a tarai Samariala otleng la ka longor ana warwara ane God, pa la sune e Pita pa e Jon tetek la.

¹⁵ Ning dia hanot, dia araring sur la, sur lar kibas a Talngan Tabu,

¹⁶ anasa belot i kes on ta halinla, di baptais tar la ka ana risan a Leklek e Iesu.

¹⁷ Pa e Pita pa e Jon dia suah a kundiau saot onla pa la bot kibas a Talngan Tabu.

¹⁸ Ning e Saimon i oroi mang di tabar la ana Talngan Tabu ning naur a aposel dia suah a kundiau saot onla, i los a mani tetek diau.

19 Pa i atongi mang, “Mur saran a rakrakai ning tak, sur iau otleng ar suah a kuk saot on tik, pa dir tabari ana Talngan Tabu.”

20 Pa e Pita i kelesi mang, “U taum ana num a mani mur hirua, anasa u nuki mang ur lou a artabar ane God ana mani.

21 Bel anum ta tiniba pa ta tukna ana titol ne, anasa a balam bel i tostos na matana e God.

22 Ur lingir a nuknukim kusun a laulau a ginim ne, pa ur araring tetek a Leklek. Ngandek ir kepsen a laulau a nuknukim.

23 Anasa a oroi u mang u bukus ana laulau a nuknuk, pa laulau a ginim i dot akes u.”

24 Pa e Saimon i kelesi mang, “Mur araring tetek a Leklek sur iau, sur gong ta utna ning mu atong tari, ir hanot hok.”

25 Ning e Pita pa e Jon dia ka warwara talapor tar ana ututnala ning a Leklek i toli, pa dia ka warawai tar ana nuna warwarala, dia ulak usaot e Jerusalem. Ning dia han, dia warawai amon ana Wakak a Warwara ting na galis a hanua ting na papar Samaria.

E Pilip dia arsongo taum ana te Itiop

26 Ning a angelo anuna Leklek i atai e Pilip mang, “Ur tur, pa ur han utumo na matana tobar sur a ngas misaot e Jerusalem utumo e Gasa, a ngas ning i han potora hanua bel.”

27 Pa e Pilip i kamtur, pa i han. Pa dia arsongo taum ana ning a barsan mitumo e Itiop, a ningnigo na tena tai alar ana ututna anuna Kandake, a kwin anuna tarai Itiop. A barsan ne

ka han pas saot e Jerusalem pa ka lotu pas tetek e God.

²⁸ Ning i ulak sur uting na hanua ngasna, i kes saot na karis, pa i was a buk ana propet Aisaia.

²⁹ Pa Talngan Tabu i atai e Pilip mang, “Ur han uting na karis ning, pa ur han amon taum ono.”

³⁰ Pa e Pilip i dun teteki, pa i longor a barsan ning i was a buk ane propet Aisaia, pa i dekeni mang, “I mangmangasa, u talapor ot ana saning u wasi?”

³¹ Pa i kelesi mang, “Ar tasman mangmangasa i, ning bel tik ir atalapor tetek iau?” Pa i nunung e Pilip sur ir abit teteki pa diar kes taum.

³² Ine a warwarala ting na Buk Tabu ning i wasi:

“Di beni arlar ana sipsip,
sur dir umkoli.

Bel i warwara,
arlar ana barman a sipsip ning i tur
longoroi tetek esining ir kumur a hihna.

³³ Di ame tari, pa bel di atostos a warkurai onoi.
Bel tik i tolsot sur ir warwara ana tumtubunala
lamur.

Anasa di kepsen anuna lalaun mite na
rakrakan hanua.”

Aisaia 53:7-8

³⁴ A te Itiop i deken e Pilip mange, “Ur atai iau, a propet i warwara o esi? Ono i ot, o ana tik masak?”

³⁵ Pa e Pilip i turpas a papak teteki. I atai i ana Wakak a Warwara oe Iesu, turpasi ot ana buk ning a te Itiop i wasi.

³⁶⁻³⁷ Ning dia han amon ting na ngas, dia hanot ting na ning a malum, pa te Itiop i atai e

Pilip mange, “Oroi, a malum ne. Asa ir sairas iau sur gong di baptais iau?”*

³⁸ Pa i sairas a karis sur ir tur. Pa dia han purum uting na malum pa e Pilip i baptais.

³⁹ Ning dia saur kusun a malum, a inguna Leklek i kepsen e Pilip. Pa te Itiop bel ma i oroi ulaki, pa i han ana nuna tinan taum ana tnan gasgas ting na nuna lalaun.

⁴⁰ Pa e Pilip i oroi mang i kanumo ma na hanua Asdot. Pa ning i han mitingia, i warawai amon ana Wakak a Warwara ting na hananuala tuk ning i hanot tumo e Sisaria.

9

E Sol i lingir a nuknukna
(Aposel 22:6-16; 26:12-18)

¹ Ana pukakiarla ning, e Sol i mang kol sur ir um amat a tarai a asaer anuna Leklek. I han tetek a ningnigo na tena artabar tetek e God,

² pa i nunungi mang, “Ur tumus al pas sur ar losi utumo na rumai lotula to e Demaskas. Ur tumusi mang, ning ar pastek al tarai pa al gurarala ning la mur a Ngas ane Karisito, ar dat pas la usaot e Jerusalem, sur lar karabus.”

³ Ning i han milau e Demaskas, a tnan talapor misaot na langit i hanot kulkulan pa i sasai talilisi.

* **8:36-37: 8:36-37** Dingla na tena tastasmai ana Buk Tabu la nuki mang dingla na warwarala otleng i kes te na ves ne. I manglarne: *Pa e Pilip i atongi mange, “Ning u tortorot ana balam rop, i wakak ka sur dir toli.” Pa a te Itiop i kelesi mang, “A tortorot mang e Iesu Karisito a Nat e God”.* **8:40: 8:40** Aposel 21:8 **9:1: 9:1** Aposel 8:3

4 I punga purum tumo lapiu, pa i longor a elngena mainla i atai i mange, “Sol, Sol, sur asa u alaulau iau?”

5 Pa e Sol i dekeni mange, “Leklek, esi u?” Pa i kelesi mange, “Iau e Iesu ning u alaulau iau*.”

6 Onone ur tur pa ur han utumo e Demaskas, pa dir atai u ana saning ur toli.”

7 Pa taraila ning la armuri, la kulkulan pa la matmataut pa bel la warwara, anasa la longor a elngena mainla, ika bel la oroi.

8 E Sol i kamtur miting lapiu, pa ning i palpalas matana, bel i oroi sot pas ta utna. Pa la tong benben tari kama utumo e Demaskas.

9 Pa i kes tingia natol a pukakiar, a matana i kut, bel i hangan pa bel i gang.

10 Ning a barsan miting na tarai a asaer, a risana e Ananias, i kes tumo e Demaskas. A Leklek i kabahi ana tatatai mange, “Ananias!” Pa e Ananias i kelesi mange, “Leklek, iau ot ne.”

11 Pa a Leklek i atai i mange, “Ur tur, pa ur han uting na rumai ane Judas, ting na ngas ning di atongi a Tostos a Ngas. Pa ur kabah sur e Sol, a te Taso, kanumo i araring.

12 Ana tatatai, e Sol i oroi ning a barsan, a risana e Ananias, i kas teteki, pa i suah naur a kuna saot onoi sur ir tai ulak.”

13 Pa e Ananias i kelesi mang, “Leklek, ia ka longor tar a galis a warwara ana barsan ne, pa toltol laulau ning i toli ana num a tarai saot e Jerusalem.

* 9:5: 9:5 Ning e Sol i alaulau a tarai anuna Leklek i alaulau ot a Leklek.

¹⁴ Pa leklek a tena artabarla tetek e God la malmaling seni sur ir dat la rop ning la lotu ana risam. Pa i hanot te e Demaskas.”

¹⁵ Ika a Leklek i atai i mange, “Ur han ka, anasa ia ka aslang tari sur i anak a tena titol, ir warwara talapor ana risak tetek a taraila ning bel a tarai Israel, tetek a kingla, pa tetek a tarai Israel otleng.

¹⁶ Par asangani mang ir kilang a galis a kankan ana risak.”

¹⁷ Lamur e Ananias i han, pa i kas ting na rumai ning e Sol i kes ia. I suah naur a kuna saot onoi, pa i atai i mange, “Sol, tasiklik, a Leklek e Iesu, i ning i turot tetek u ting na ngas ning u han ute, i sune iau ute sur ur tai ulak, pa ur bukus ana Talngan Tabu.”

¹⁸ Pa ning a utna i arlar ana palakotoi a sis i punga purum kakat kusun naur a matana, pa i tai ulak. I tur pa di baptais.

¹⁹ Ning i hangan pas, a palaona i rakrakai ulak.

E Sol i warawai tumo e Demaskas

E Sol i kes ulak pas napir a tarai a asaer tumo e Demaskas.

²⁰ Ono otning i turpasi sur ir warawai ting na rumai lotula anuna tarai Juda, mang e Iesu a Nat e God.

²¹ Pa la rop ning la longori, la kulkulan onoi pa la atongi mang, “A barsan kaning, i umkol la ning la lotu tetek e Iesu saot e Jerusalem. Pa onone i hanot ute sur ir dat pas a tarai a lotu ane Iesu, tetek a leklek a tena artabarla tetek e God.”

²² Ika a warawai ane Sol i rakrakai pa i atong a ututnala ning i amomol pasi mang e Iesu ot a Karisito. Pa tarai Juda ning la kes tumo e Demaskas la nuknuk kol ana nuna warwarala, pa bel la tolsot sur lar kelesi.

²³ Ning a galis a pukakiar ka rop, a tarai Juda la warwara taum sur lar umkol e Sol.

²⁴ Ika e Sol ka tasmani mang la warwara taum suri. Ana moromla pa kabakiarla a matanla i makas ting na tamanla ana hanua sur e Sol, sur lar umkoli.

²⁵ Ika anuna kakak a asaer la ben pasi ana morom, pa la alorong purumi ana rat ting na mosol ting na ris a woroh ning di tol alar a hanua ono.

E Sol i kes saot e Jerusalem

²⁶ Ning e Sol i hanot saot e Jerusalem, i tohoi sur ir kes taum ana tarai a asaerla, ika la rop la matatani, anasa bel la tortorot onoi mang i otleng ning a hala tarai a asaer.

²⁷ Ika e Barnabas i ben pasi, pa dia armuri tetek a aposella, pa i atai la mang, “E Sol ka oroi tar a Leklek, pa Leklek i warwara teteki ana nuna tinan utumo e Demaskas. Pa ning i kes tumo e Demaskas, i warawai ana risana e Iesu pa bel i matmataut.”

²⁸ Pa e Sol i kes taum ana tarai a lotu saot e Jerusalem, i han taltal, pa i warwara ana risana Leklek, pa bel i matmataut.

²⁹ I warwara pa i keles a kabahla anuna tarai Juda ning la warwara Grik, ika la mang sur lar umkoli.

³⁰ Ning na tastasna ana tortorot la longori, la beni utumo e Sisaria, pa lamur la sune seni utumo e Taso.

³¹ Lamur a tarai a lotu ting na hananuala rop ting na natol a papar Judia, e Galili pa e Samaria, la kes ana balmolmol. Pa lotu i rakrakai, pa la kes na hanrawai tetek a Leklek, a Talngan Tabu i wunan la, pa wawas ana tarai a lotu i han kas.

E Pita i kes tumo e Lida pa e Jopa

³² Ning e Pita i han amon ting na hananuala, i geren a tarai ane God otleng tumo e Lida.

³³ Tingia, i pastek ning a barsan, a risana e Aineas, a palaona i mat. Ka arlar ana siwal a rau, i borbor ka ting na logo ngasna.

³⁴ Pa e Pita i atai i mange, “Aineas, e Iesu Karisito i alangolango u. Ur tur, pa ur hin a logo ngasim.” Pa i tur kakat.

³⁵ La rop ning la kes ting na hanua Lida pa e Saron, la oroi a barsan ning, pa la lingir a nuknukinla tetek a Leklek.

³⁶ Ning a hane miting na tarai a asaer i kes tumo e Jopa, a risana e Tabita, ana warwara Grik mang e Dokas. A hane ne, ka tol tar a galis a wakak a titol, pa tena artabar tetek a kapan a tarai.

³⁷ Ana pukakiarla ning e Pita i titol tumo e Lida, e Dokas i kurah, pa i mat. Ning la ka pukur tari, la aborbor tari ting na ning a tuka rumai saot.

³⁸ E Lida i kes milau e Jopa, pa ning a tarai a asaer miting e Jopa la longori mang e Pita kanumo e Lida, la sune naur a barsan teteki pa dia angongosi mang, “Maris mila, ur lamut kapit tetek mila.”

³⁹ E Pita i han taum ondiau. Ning i hanot, la beni usaot na tuka rumai. Pa laola rop la tur talilisi pa la domos. Pa la asangan a kolosla pa kaenla, ning e Dokas i suk tar la ning kaning ot i laun.

⁴⁰ E Pita i sune purum la rop miting na tuka rumai ning, pa i kes ana bokona hana, pa i araring. I talingir tetek a hane ning i mat, i atongi mang, “Tabita, ur tur.” Pa e Tabita i palpalas matana, pa ning i oroi e Pita, i kes kakat.

⁴¹ Pa e Pita i tuslan a kuna teteki, pa i dat aturi. Pa i kabah pas a tena tortorotla pa a laola, pa i saran tar e Tabita tetek la, ka laun.

⁴² A utna ne i talapor pa la rop tumo e Jopa la tasmani, pa galis la tortorot ona Leklek.

⁴³ E Pita i kes suai ulak ting e Jopa taum ning a barsan a risana e Saimon, a tena toltol utna ana palaona inagoila.

10

E Konilius ning bel a te Juda i arsune sur e Pita

¹ Ning a barsan kanumo e Sisaria, a risana e Konilius, i ning a ningnigo anuna ning a mar a tarai a harum, la miting na tnan kunum a tarai a harum mitumo e Itali.

² E Konilius pa la rop ning la kes ting na nuna rumai la na momol a tena lotu pa na tena hanrawai tetek e God. E Konilius ning a tena

artabar tetek a kapan a tarai, pa pukakiarla rop i araring tetek e God.

³ Ning a rah ana 3 kilok i oroi ning a tatatai. I oroi talapor a angelo ane God i hanot teteki pa i kabah i mang, “Konilius!”

⁴ Pa e Konilius i ngoson rakrakai i ana matmataut, pa i dekeni mang, “Leklek, asaning?” Pa angelo i kelesi mange, “Anum a niaringla pa artabarla tetek a kapan a tarai la han usaot tetek e God, pa la tur na matana, pa i gas ana saning u toli.

⁵ Onone ur sune al tarai utumo e Jopa, sur lar ben pas ning a barsan, e Saimon, esaning a risana otleng e Pita.

⁶ Kaning i kes napir e maurana e Saimon, esaning a tena toltol utna ana palaona inagoila. Anuna rumai i tur milau a tasi.”

⁷ A angelo ning i warwara teteki i han, e Konilius i kabah pas naur miting na nuna tena titolla, pa ning a tena lotu miting na nuna tarai a harum.

⁸ I atai ditol ana ututnala rop ne, pa i sune ditol utumo e Jopa.

A tatatai ane Pita

⁹ Ana pukakiar lamur tana, ditol han, pa ana tnan Kamis ning ditol han milau sur a hanua Jopa, e Pita i abit kas usaot na pukul a rumai, sur ir araring.

¹⁰ Ning i araring, i kilang a munurak pa i mang sur ir hangan. Kaning ot di sang a utna na hangan, i oroi a tatatai.

11 I oroi a langit i sapang, pa ning a utna i arlar ana tnan kaen a polpol, di tong pas diat a ris ono pa di alorong purumi teteki.

12 Tingui onoi a urmatana inagoi, pa la ning la kawar, pa manila otleng.

13 A elngen takai i atai e Pita mange, “Pita, tur, ur umkol la, pa ur ien la.”

14 Pa e Pita i kelesi mange, “Leklek, bel! Bel a ien tar ta utna ning di arsairas ono pa i dur na matam.”

15 Pa elngen takai i keles ulaki mange, “A utna ning e God ka atotoh tari, gong u atongi mang a dur a utna.”

16 A utna ne di toli munatol, pa di dat kas kakat a kaen usaot na langit.

17 Kaning ot e Pita i nuknuk kol ana kamkama tatatai ne, natol a barsan, ning e Konilius i sune ditol, ditol ka seren pas a rumai ane Saimon, pa ditol tur ting na taman.

18 Ditol arkabah kas mange, “E Saimon ning a risana otleng e Pita kaningui?”

19 Kaning ot e Pita i nuknuk ana tatatai, a Talngan Tabu i atai i mange, “Oroi! Natol a barsan kaning ditol tai sur u.

20 Tur, pa ur han purum. Gong u nuknuk kol, ur han pa mulor armuri, anasa iau ot a sune ditol ute.”

21 E Pita i purum tetek ditol pa i atai ditol mange, “Iau kane ning mutol seren iau. Asaning mutol seren iau suri?”

²² Ditol kelesi mang, “E Konilius, a ningnigo anuna ning a mar a tarai a harum i sune mitol. E Konilius i ning a tena tostos pa tena hanrawai tetek e God, pa tarai Juda rop la hanrawai i. A angelo ane God i atai tari mang ir arsune pas u utumo na nuna rumai, sur ir longor anum ta warwara.”

²³ E Pita i ben kas ditol sur ditol ar borbor pas.

E Pita i hanot ting na rumai ane Konilius

Ning ka kabakiar ot, e Pita i tur pa la han, pa dingla na tarai ning la tas ana tortorot misaot e Jopa la armuri.

²⁴ E Konilius i tasmani mang lar hanot, i ben taum pas na mainala, pa na halalna, pa la kes nanan e Pita. Pa ning ka takai a pukakiar alar tar a tinan ane Pita la, la hanot tumo e Sisaria.

²⁵ Ning e Pita i kas, e Konilius i han barati, pa i punga purum ana hanrawai ting na naur a hana.

²⁶ Ika e Pita i dat atur pasi, pa i atai i mange, “Ur tur, iau otleng a barsan ka.”

²⁷ Ning dia warwara amon, e Pita i kas tar tetek a kunum a tarai kaning la ka kes taum.

²⁸ Pa i atai la mange, “Mulo tasmani mang di arsairas ting na warkurai mang mila na te Judala, milar lasan taum tik ning bel miting na tarai Juda, pa milar gereni otleng. Ika e God ka asangan tar iau mang gong a atong tik mang i dur na matana e God, pa gong a nuki mang di arsairas tetek mila mang milar lasan taum onoi.

²⁹ Pa bel a ngongoio ning di arsune sur iau ute. Pa ar deken mulo: Mulo arsune sur iau sur asa?”

³⁰ Pa e Konilius i kelesi mange, “Ka diat a pukakiar alar tar anuk a niaring ting na nuk a rumai ana taim larne, ana 3 kilok ana rah. A oroi ning a barsan i mermer ana kaen ning i pilpil, i hanot kulkulan pa i tur salanigo tak,

³¹ pa i mang, ‘Konilius, e God ka longor anum na niaring, pa ka tasman anum na artabarla tetek a kapan a taraila.

³² Ur arsune utumo e Jopa, sur e Saimon, ning a risana otleng e Pita. I wasira ting na rumai ane Saimon, a tena toltol utna ana palaona inagoila, i kes milau a tasi.’

³³ “Pa a arsune kakat sur u. I wakak kol ning u hanot te. Onone mila rop mila kes na matana e God, sur milar longor a warwarala rop ning a Leklek ka atai tar u sur ur atai mila ono.”

E Pita i warawai ting na rumai ane Konelius

³⁴ Lamur e Pita i atongi mange, “A tasman momoli mang, e God bel i sira purpurngis.

³⁵ I sira gas pas a taraila miting na matanitula rop, ning la hanrawai i pa la titol ana tostosna.

³⁶ Mulo tasmani mang e God ka saran sen anuna warwara tetek a tarai Israel. A warwara ne, a Wakak a Warwara ana balmolmol kamna oe Iesu Karisito, i ning a Leklek anuna tarai rop.

³⁷ Mulo ka tasman asaning i hanot ting na hananuala tumo e Israel, turpasi tumo e Galili lamur tana baptais ning e Jon i warawai ono.

³⁸ Mulo tasmani mang e God ka saran tar a Talngan Tabu pa rakrakai tetek e Iesu, a te

Nasaret. Ning i han taltal, i tol a wakak a titolla, pa i alangolango pas la, ning la kes nahai a warkurai ane Satan. E Iesu i tol a ututnala ne, anasa e God i kes taum onoi.

³⁹ “Pa mila na tena warwara talapor ana ututnala rop ning mila oroi, ning i sira toli ting na hananuala anumila a tarai Juda, pa saot e Jerusalem. Di umkoli saot na rakai kutus,

⁴⁰ ika natol a pukakiar lamur, e God i akamtur ulak pasi kusun a minat, pa i asangani tetek a tarai.

⁴¹ Bel tetek a tarai rop, tetek la ning e God ka aslang nigon tar la sur lar oroi pa lar warwara talapor ono, mila ning mila hangan pa mila gang taum onoi, ning i kamtur ulak kusun a minat.

⁴² I sune mila, sur milar warawai pa milar warwara talapor tetek a tarai, mang i ot ning e God ka aslang pasi sur ir tena warkurai anunla ning la laun pa la ning la ka mat.

⁴³ A propetla rop la warwara oe Iesu, mang esining i tortorot onoi, dir kepsen anuna toltol laulaula ana risana.”

A Talngan Tabu i han purum onla ning bel a tarai Juda

⁴⁴ Kaning ot e Pita i warwara ting na rumai ane Konilius, a Talngan Tabu i han purum onla rop, ning la longor a warwara ne.

⁴⁵ Dingla na tena tortorot miting na tarai Juda ning la armuri taum oe Pita, la kulkulan, mang e

10:41: 10:41 Aposel 1:8; Luk 24:42-43 **10:42: 10:42** Aposel 17:31; 1 Pita 4:5 **10:43: 10:43** Aisaia 53:5-6; Jeremaia 31:34
10:44: 10:44 Aposel 11:15; 15:8 **10:45: 10:45** Aposel 2:4; 19:6

God i artabar otleng ana Talngan Tabu tetek a tarai ning bel a tarai Juda.

⁴⁶ Anasa la longor la, ning la warwara ana urmatana warwara, pa la atong leklek pas e God.

⁴⁷ Lamur e Pita i atongi mange, “Bel tik i tolsot sur ir sairas la ne sur gong di baptais la ana malum. Anasa a Talngan Tabu ka kes onla arlar larning i kes ondala.”

⁴⁸ Pa i arsune sur dir baptais la ana risana e Iesu Karisito. Lamur la nunung e Pita sur ir kes taum onla al pukakiar.

11

E Pita i warwara talapor ana nuna titol

¹ A aposella pa la ning la tas ana tortorot ning la kes tumo e Judia, la longori mang a tarai otleng ning bel a tarai Juda la ka tortorot ana warwara ane God.

² Pa ning e Pita i han usaot e Jerusalem, a taraila ning la mang sur a tena tortorotla rop dir kot talilis a palaonla, la bori.

³ La atai i mange, “U kas uting na rumai anuna tarai ning bel di kot talilis a palaonla, pa u hangan taum onla.”

⁴ E Pita i papak tostos tetek la ana ututnala rop ning i hanot mange,

⁵ “Ning a kes ting na hanua Jopa, a araring, pa a oroi ning a tatatai. A oroi ning a utna i arlar ana tnan kaen a polpol ning di tong pas diat a ris pa di alorong purumi misaot na langit tetek iau.

⁶ Ning a tai tingui ono, a oroi a inagoila, la ning di lawat la pa dingla na rokoiona, pa la ning la kawar, pa manila.

⁷ Pa a longor a elngen takai i atai iau mange, ‘Pita, ur tur, ur umkol la, pa ur ien la.’

⁸ Pa kelesi mange, ‘Leklek, a momolna ot! Bel a ien tar ta utna ning di arsairas ono pa i dur na matam.’

⁹ Pa a elngen takai misaot na langit i atong ulaki mange, ‘A utna ning e God ka atotoh tari, gong u atongi mang a dur a utna.’

¹⁰ A utna ne di toli munatol, pa di dat kas ulaki usaot na langit.

¹¹ “Ono otning, natol a barsan ning di sune ditol mitumo e Sisaria tetek iau, ditol hanot ting na rumai ning a kes ia.

¹² Pa Talngan Tabu i atai iau sur ar han taum onditol, pa gong a nuknuk kol. Diono na barsan otleng ne, ning mila tas ana tortorot, mila han taum onditol utumo e Sisaria pa mila kas uting na rumai ane Konilius.

¹³ Pa i atai mila mang i oroi a angelo i hanot ting na nuna rumai pa i atai i mange, ‘Ur arsune utumo e Jopa sur e Saimon, ning a risana otleng e Pita.

¹⁴ Pa ir atai u on al warwara ning ir alaun u pa la rop ning la kes ting na num a rumai.’

¹⁵ Ning a turpas a warwara, a Talngan Tabu i kes onla, larning i toli ondala nating.

¹⁶ Pa nuk pas a warwara anuna Leklek, ning i atongi mange, ‘E Jon i baptais ana malum, pa

lamur dir baptais mulo ana Talngan Tabu.’

¹⁷ E God ka saran tar a artabar tanla, larning ka saran tari tandala, ning dala tortorot ana Leklek e Iesu Karisito. Pa esi na ngas a barsan iau, ning ar sairas e God?”

¹⁸ Ning la longor a warwara ne, bel ulak ma la warwara, pa la atong leklek e God mange, “E God ka tol tar a ngas sur la ning bel a tarai Juda lar lingir a nuknukinla pa lar laun.”

A Wakak a Warwara i hanot tumo e Antiok

¹⁹ A tarai a lotu ning la han sarara misaot e Jerusalem anasa a tarai la alaulau la lamur tana minat e Stiwen, la han bakbak utumo na papar Ponisia, a lolo Saiprus, pa hanua Antiok. La warwara ka tetek a tarai Juda ana Wakak a Warwara oe Iesu.

²⁰ Ika dingla na tarai miting na tarai a lotu ning, a tarai Saiprus pa tarai Sairini, la hanot tumo e Antiok pa la atai a tarai ning bel a tarai Juda otleng ana Wakak a Warwara ona Leklek e Iesu.

²¹ A rakrakai ana Leklek i kes onla ning la warwara talapor, pa galis kol la tortorot pa la lingir a nuknukinla tetek a Leklek.

²² Ning a tarai a lotu saot e Jerusalem la longor a warwara ne, la sune e Barnabas utumo e Antiok.

²³⁻²⁴ E Barnabas, esaning a wakak a barsan, i bukus ana Talngan Tabu pa tortorot. Ning i hanot pa i oroi a marmaris ane God ning i titol onla, i gas ono, pa i wunan la rop sur lar tur

momol ana tortorot ana nunla lalaun tetek a Leklek. Pa galis a tarai la lingir a nuknukinla tetek a Leklek.

²⁵ Lamur e Barnabas i han utumo e Taso, sur ir tai sur e Sol.

²⁶ Ning i seren pasi, i beni utumo e Antiok. Ning a kidol a rau dia kes taum ana tarai a lotu tumo, pa dia asaer a galis a tarai. A rising “a te Karisitola”, di atong nigoni ana tarai a asaer tumo e Antiok.

²⁷ Ana taim ning, dingla na propet la han misaot e Jerusalem utumo e Antiok.

²⁸ Ning a halinla, a risana e Agabus, i tur, pa i warwara ana rakrakai ana Talngan Tabu. I warwara nigo tar ana tnan munurak ning ir kibas a hananuala rop. A munurak ne i hanot ning e Klodius i warkurai tumo e Rom.

²⁹ Pa a tarai a asaer la warkurai pas mang la rop taktakai lar artabar arlar ana nunla na gongonla tetek a tarai a lotula ning la kes ting na papar Judia.

³⁰ La migen taum tar a mani, pa e Barnabas diau ma e Sol dia losi tetek a ningnigola ana lotu saot e Jerusalem.

12

Di akas tar e Pita uting na karabus

¹ Ana pukakiarla ning, king Herot i dat pas dingla na tarai miting na tarai a lotu, sur ir alaulau la.

² I arsune tar sur e Jems, a tas e Jon, pa di umkoli ana liwan a harum.

³ Ning i oroi a tarai Juda la gas ana minat e Jems, i dat pas e Pita otleng ana ning a pukakiar arpotor ana tatatnan pukakiar ana lotu na bret ning bel al is ono.

⁴ Ning ka dat pas e Pita, lamur i akasi uting na karabus. Pa diat a kunum a tarai a harum la tai alari, la areiat ana ning a kunum. E Herot i mang sur ir beni sur dir warkurai i na matana tarai, lamur tana lotu na Han Lakai.

⁵ Ning e Pita i kes ting na karabus, a tarai a lotu rop bel la manah ana niaring tetek e God suri.

A Leklek i alaun pas e Pita kusun e Herot

⁶ Ana morom lanigo tana pukakiar ning e Herot ir ben pas e Pita sur a warkurai, e Pita i borbor tar na arpotor tana naur a tena harum. La ka dot tar naur a kuna taum ana naur a sen. Pa dingla na tena harum la tur ting na taman pa la tai alar a karabus.

⁷ A angelo anuna Leklek i hanot kulkulan teteki, pa talapor i sasai tingui na karabus. I dapis amata e Pita ting na risna, pa i atai i mange, “Tur kapit!” Pa naur a sen i tapapak kusun naur a kuna.

⁸ Pa angelo i atai i mange, “Ur mermer, pa ur suah pas anum naur a su.” Pa i toli larning. Pa angelo i atai ulaki mange, “Ur polpol alar u ana num a kaen, pa ur mur iau.”

⁹ E Pita i mur purumi kusun a karabus. E Pita i nuki mang a utna ne a angelo i toli, bel a momolna, i nuki mang i oroi a tatatai ka.

¹⁰ Dia bolos a ningnigo na tena tai alar, pa munaurna otleng, lamur dia hanot ting na taman a aen, ning di purpulum onoi utumo na tnan hanua. Ning dia tur tingia, a taman i sapang oros ka, pa dia purum. Ning dia hanot ting na pukna ning a ngas i han sarara, angelo i rorom kakat kusuni.

¹¹ Ning a nuknukna e Pita i talapor, i atongi mange, “A tasman momoli mang a Leklek i sune anuna angelo, pa i alaun pas iau kusun a kuna e Herot, pa ututnala ning a tarai Juda la mang sur lar toli hok.”

¹² Ning i tasman lalani mang ka langolango, i han uting na rumai ane Maria, tana e Jon ning a risana otleng e Mak. A galis a tarai la kes taum tingia, pa la araring.

¹³ E Pita i pinpidir ting na taman, pa ning a tena titol a basbas, a risana e Roda, i dun sur a taman.

¹⁴ Ning i longor lalan pas a elngena e Pita, i gas. Pa ana nuna gasgas, bel i sapang pasi, i dun ulak, pa i atai la mange, “E Pita kanumo na taman i tur.”

¹⁵ Pa la atai i mang, “U longlong.” Pa i ngongos mang, “I momol ot, i ot ne lapiu.” Pa la atai i mang, “Ngandek anuna angelo ka.”

¹⁶ Ika e Pita i pinpidir ngongos, pa ning la sapang pa la oroi i, la kulkulan onoi.

¹⁷ Pa i sairas la ana kuna, sur lar kes longoroi, pa i atalapor la ana ngas ning a Leklek i ben purum pasi kusun a karabus. Pa i atai la mang, “Mulor atai e Jems pa na tastasindala ana

tortorot ana utna ne.” Pa i han kusun la sur ning a hanua masak.

¹⁸ Ana kobot a tena harumla la tai sur e Pita pa nuknukinla i loklokron mang kanaha i ma.

¹⁹ Ning e Herot i longori mang bel ma i kes ting na karabus, i arsune sur lar tai suri. Ika bel la seren pasi. Lamur i warkurai a tena harumla ning la tai alar a karabus, pa i arsune sur la sur dir umkol la. Lamur e Herot i han miting na papar Judia utumo e Sisaria, sur ir kes tumo.

E Herot i mat

²⁰ E Herot i balakut tetek a tarai ting na naur a hanua Tair pa e Saidon. Pa tarai miting na naur a hanua ning, la han taum sur lar oroi i, pa lar nunungi sur a balmolmol. Anasa anunla naur a hanua la laun ka ana utna na hangan miting na papar anuna king Herot. La baltaum nigo taum oe Blastus, a tnan tena tai alar anuna king, pa i nangan la sur lar oroi a king.

²¹ Ana pukakiar ning e Herot i kubus tari tanla, i mermer pas ana kaenla anuna king, pa i kes tar ana keskes a king, pa i warwara tetek a tarai.

²² Pa tarai la kukuk na gasgas, pa la atongi mang, “A elngen a god ot ne, bel a barsan i.”

²³ Ono otning, a angelo anuna Leklek i umi, anasa bel i atong leklek e God, pa pompobola la ien a palaona, pa i mat.

²⁴ Ika a warwara ane God i gomo, pa i han sarara uting na hananuala.

²⁵ Ning e Sol pa e Barnabas dia titol rop saot e Jerusalem, dia ulak utumo e Antiok. Dia ben e Jon, ning a risana otleng e Mak, pa ditol han taum.

13

Di aslang pas e Barnabas pa e Sol

¹ A propetla pa tena asaerla tagun a tarai a lotu tumo e Antiok a risanla ne: e Barnabas, e Simion ning a risana otleng e Niger, pa e Lusius a te Sairini, e Sol pa e Manain ning di lawat taum diau ma e Herot a ningnigo.

² Ning la lotu tetek a Leklek pa la tamai, a Talngan Tabu i atongi mang, “Mulor aslang tar e Barnabas pa e Sol sur anuki, sur a titol ning a kabah pas diau suri.”

³ Lamur tana tamai pa niaring, la suah a kunla saot ondiau, pa la sune sen diau.

A titol ane Barnabas pa e Sol tumo e Saiprus

⁴ A Talngan Tabu i sune e Barnabas pa e Sol, pa dia han utumo e Selusia. Dia kas ana sip pa dia han utumo na lolo Saiprus.

⁵ Ning dia hanot tumo e Salamis, dia warawai ana warwara ane God ting na rumai lotula anuna tarai Juda. Ditol armuri taum ma e Jon, anundiau a tena arnangai.

⁶⁻⁸ Ditol han taltal ting na lolo rop ning, tuk tumo e Papos. A ningnigo miting na lolo ning, a risana e Sergius Pol, a tena tastasmai, i arsune pas e Barnabas pa e Sol anasa i mang sur ir

longor a warwara ane God. Ika ning a hal e Sergius Pol, a risana e Bar-Iesu, i sairas diau. I ning a te Juda, a asasongo na propet, pa di atongi mang e Elimas, a kamkamna mang a tena wah. I mang sur ir sairas a ningnigo sur gong i tortorot.

⁹ Pa e Sol ning di atongi otleng mang e Pol, i bukus ana Talngan Tabu, i ngoson rakrakai e Elimas,

¹⁰ pa i atai i mange, “U a nat e Satan, u a hirua ana tostos a toltol rop. U bukus ana urmatana asasongo pa ana asobor. Nangse ma ur manah kusun anum a toltol ning u lingir kol a tostos a ngas anuna Leklek?

¹¹ Onone a warkurai anuna Leklek ir hanot tetek u, a matam ir kut bongnani ot, pa bel ur oroi a talapor ana Kamis.” Ono otning a laukap taum ana mormorom i hanot teteki, pa i tabah taltal sur tik ning ir tong pas a kuna pa ir beni.

¹² Ning a ningnigo i oroi a utna ne i hanot, i tortorot, anasa i kulkulan ana asaer ana Leklek.

Tumo e Antiok ting na papar Pisidia

¹³ E Pol pa naur a halna ning ditol han taum, ditol kas ana sip miting e Papos, pa ditol han utumo e Perga, ting na papar Pampilia. Pa e Jon i han kusun diau tingia, pa i ulak usaot e Jerusalem.

¹⁴ E Pol pa e Barnabas dia han mitumo e Perga sur e Antiok ting na papar Pisidia.* Pa ana

13:11: 13:11 Aposel 9:8 **13:13: 13:13** Aposel 15:38 * **13:14: 13:14** Naur a hanua a risandiau e Antiok. Takai ting na papar Pisidia pa takai otleng ting na papar Siria.

Pukakiar Sabat dia kas uting na rumai lotu anuna tarai Juda, pa dia kes.

¹⁵ Ning di ka was tar a warwarala ting na Buk a warkurai ane Moses pa tumtumus ana propetla, a ningnigola ana rumai lotu la arsune tetek diau mang, “Naur a tasimila, ning ta warwara na wunan kaning sur mur atai a taraila ono, mur warwara ka ono.”

¹⁶ E Pol i tur, pa i sairas la taum ana kuna sur lar kes longoroi, pa i atongi mange,

“A tarai Israel pa mulo a tarai masik otleng ning mulo lotu tetek e God, mulor longor iau.

¹⁷ E God anumila a tarai Israel i aslang pas na tumtubumila, pa i aburese pas la ning la kes tumo e Ijip, pa i ben purum pas la mitumo ana rakrakaina.

¹⁸ Ana diat a bonot a rau ning la kes ting na hanua bel, i noren la ana toltolla anunla.

¹⁹ Pa ning ka kamar sen tar a taraila miting na mais a matanitu ning la kes tumo e Kenan, lamur i saran tar a kabalapiu Kenan sur anuna tarai Israel.

²⁰ A ututnala rop ne i hanot na arpotor diat a mar pa dilima na bonot (450) a rau.

“Lamur e God i suah tar a tena warkuraila sur lar nigon la, tuk ana propet Samuel.

²¹ Lamur la nunung sur ta king, pa e God i saran tar e Sol tetek la. E Sol, a nat e Kis, miting na mangis a tarai Benjamin, pa i nigon la diat a bonot a rau.

13:17: 13:17 Kisim Bek 1:7; 6:6; 12:51 **13:18: 13:18** Namba 14:34; Lo 1:31 **13:19: 13:19** Lo 7:1; Josua 14:1 **13:20: 13:20** Hetman 2:16; 1 Samuel 3:20 **13:21: 13:21** 1 Samuel 8:5, 19; 10:20-24

²² Ning e God ka kepsen tar e Sol, i suah tar e Dewit sur ir king anunla. Pa i atongi onoi mang, ‘A oroi e Dewit a nat e Jesi, a barsan ne a katnani, i sot ana nuknukik, pa ir tol arop a ututnala ning a mang suri.’

²³ “Pa miting na mangis a tarai ane Dewit, e God i saran a Tena Alaun, e Iesu, tetek a tarai Israel, arlar ana nuna lele.

²⁴ Lanigo tana tinan ot ane Iesu, e Jon a Tena Baptais i warawai tetek a tarai Israel rop sur lar lingir a nuknukinla pa dir baptais la.

²⁵ Ning milau ma anuna titol ir rarop, i atai la mang, ‘Mulo nuki mang iau esi? Iau bel esaning mulo harnanai suri. Ika esaning ir mur tak, bel a tolsot sur ar pak sen a inau ana nuna su. A natarna kol tana.’

²⁶ “Tastasikla, a mangis a tarai ane Abaram, pa mulo a tarai masak otleng ning mulo lotu tetek e God, di ka saran tar a warwara tetek dala mang e God i alaun a tarai.

²⁷ A tarai Jerusalem, pa nunla na ningnigola, bel la oroi lalan e Iesu mang ai a Tena Alaun ning a propetla la ka tumus tari ono. Ika ning la warkurai tar e Iesu sur ir mat, la tolsot pas a warwara anuna propetla, ning di wasi ana Pukakiar Sabatla rop.

²⁸ Bel la pastek pas ta laulau a ginina e Iesu sur ir mat ono, ika la nunung e Pailat sur ir saran tar e Iesu sur dir umkoli.

²⁹ Ning la ka tolsot rop tar a warwarala ning la

13:22: **13:22** 1 Samuel 13:14; 16:12; Buk Song 89:20 **13:23:**
13:23 2 Samuel 7:12-16 **13:24:** **13:24** Matiu 3:1-2 **13:25:** **13:25**
Jon 1:20, 27 **13:28:** **13:28** Matiu 27:22-23 **13:29:** **13:29** Matiu
27:59-60

ka tumus tari onoi, la pak purumi kusun a rakai kutus, pa la aborbori ting na kulam a minat.

³⁰ Ika e God i akamtur ulaki kusun a minat.

³¹ Pa galis a pukakiar, la ning nating la armuri taum onoi mitumo e Galili usaot e Jerusalem la oroi. Pa onone la warwara talapor onoi tetek a tarai Israel.

³² “Pa mila atai mulo ana Wakak a Warwara mange: A lele ning e God ka saran tari tetek na tumtubundala tagun nating,

³³ onone ka tolsot pasi tetek dala, na tumtubunla, ning i akamtur ulak pas e Iesu. Larning di ka tumus tari ting na areur a Saksak mange,

‘U a Natuklik,

pa onone ia ka hanot e Tamam.’ *Buk Song 2:7*

³⁴ E God ka akamtur pas e Iesu kusun a minat, pa bel ir marase. Larning e God ka atong tari mange,

‘A wakak a ututna ning a lele tar onoi tetek e Dewit,
ar angisngis mulo onoi.

A angisngis ne i totoh pa ir hanot momol ot.’

Aisaia 55:3

³⁵ Pa ka atong tari otleng ting na ning a Saksak mange,

‘Bel ur noren tar a Tena Totoh anumi sur ir marase.’ *Buk Song 16:10*

³⁶ “E Dewit i tolsot rop pas a nuknuk e God ana nuna pukakiarla na lalaun. Lamur i mat, pa di pori taum ana dingla na tumtubunala, pa palaona i marase.

³⁷ Ika, esaning e God i akamtur pasi kusun a minat bel i marase.

³⁸ “Manglarning, na tastasik, mila warawai tetek mulo mange: Mulor tasmani mang e Iesu i hanot sur ir kepsen anumulo na toltol laulau.

³⁹ A Warkuraila ane Moses bel i tolsot sur ir kepsen anumulo na toltol laulau, sur dir atong mulo mang na tena tostos. Ika, la rop ning la tortorot oe Iesu, dir atong la mang na tena tostos.

⁴⁰ Mulor tai alar mulo sakana a ututnala ning a propetla ka warwara tar onoi ir sot omulo. La atongi larne,

⁴¹ ‘Oroi, mulo na tena morot laulau,
mulor kulkulan pa mulor hirua,
anasa ar tol ta utna ting na numulo na pukakiar
a lalaun.

Ning tik ir atai mulo ana utna ning ar toli,
bel mulor tortorot onoi.’ ” *Habakuk 1:5*

⁴² Ning e Pol pa e Barnabas dia purum miting na rumai lotu, a tarai la nunung diau sur diar warwara ulak ana ututnala ne ana Pukakiar Sabat lamur.

⁴³ Ning a tarai la han sarara miting na rumai lotu, a galis a te Juda pa dingla na tarai masik ning la kas uting na lotu Juda pa la lotu ana momolna, la mur e Pol pa e Barnabas. Dia warwara tetek la, pa dia arakrakai la, sur lar tur rakrakai ana marmaris ane God.

⁴⁴ Ana Pukakiar Sabat ning la ka kubus tari, milau sur la rop miting na hanua ning la hanot taum, sur lar longor a warwara anuna Leklek.

⁴⁵ Ning a te Judala la oroi a kunum a tarai, a balanla i laulau tetek e Pol pa e Barnabas, pa la

lingir ka a warwarala ning e Pol i warwara ono, pa la atong saksakani.

⁴⁶ Ika bel dia matmataut pa dia keles la mange, “I wakak, mia ka atalapor nigon tar a warwara ane God tamulo. Ika ning mulo gilam ris kusuni pa mulo san alar mulo sur gong mulo los a lalaun tikin, onone, miar han tetek a tarai ning bel a tarai Juda.

⁴⁷ Anasa a Leklek, i sune miau mange, ‘A suah tar u sur u a talapor tetek a tarai ning bel a tarai Juda, sur ur los a warwara tetek a taraila te na rakrakan hanua rop mang, ar alaun pas la.’ ” *Aisaia 49:6*

⁴⁸ Ning a taraila ning bel a tarai Juda la longor a warwara ne la gas kol, pa la atong lekkek pas a warwara anuna Leklek. Pa la ning e God ka aslang pas la sur a lalaun tikin, la tortorot.

⁴⁹ A warwara anuna Leklek i han sarara uting na hananuala rop ting na papar ning.

⁵⁰ Ika a te Judala, la akutkut balan a ningnigo na gurarala ning la sira hanrawai e God, pa ningnigo na tarai otleng miting na hanua ning. La akutkut balan dingla otleng, sur lar balakut tetek e Pol pa e Barnabas, pa la alulu sen diau kusun anunla papar.

⁵¹ Pa dia tang sen a kubus kusun a handiau sur a akinalang mang a toltol ning la toli i laulau, pa dia han utumo e Ikonion.

⁵² Pa tarai a asaer tumo e Antiok la bukus taum ana gasgas, pa Talngan Tabu.

14

Tumo e Ikonion

¹ E Pol pa e Barnabas dia kas uting na rumai lotu anuna tarai Juda tumo e Ikonion, larot ning dia sira toli ting na hananuala. Ning dia warwara, anundia na warwara i talapor, pa galis a tarai Juda pa dingla na tarai otleng, la tortorot.

² Ika dingla na tarai Juda ning bel la mang sur lar tortorot, la akamtur a balan dingla na tarai ning bel a tarai Juda, pa la alaulau a nuknukinla sur a nuknukinla ir laulau tetek la ning la tas ana tortorot.

³ E Pol pa e Barnabas dia kes bongnan diau tumo e Ikonion, pa bel dia matmataut, dia rakrakai ana warwara ana risana Leklek. Pa Leklek i amomol tar anundia na warwara ana nuna tnan marmaris ning i saran a rakrakai tandiau sur diar tol a ututnala na kulkulan, pa akinalangla.

⁴ A tarai miting na hanua ning la taptapagal, dingla la tur taum ana tarai Juda ning bel la tortorot, pa dingla la tur taum ana naur a aposel.

⁵ Dingla na tarai Juda pa dingla na tarai otleng ning bel a tarai Juda pa anunla na ningnigola, la warwara taum pas sur lar alaulau e Pol pa e Barnabas, pa lar wolot amat diau ana hatatla.

⁶ Ika, ning e Pol pa e Barnabas dia longori, dia han masik uto na papar Likonia, sur uting na naur a hanua Listra pa e Derbe, pa dingla na hananua otleng ning la kes milau.

⁷ Pa dia warawai amon tetek la tingia ana Wakak a Warwara.

Tumo e Listra

⁸ Tumo e Listra, ning a barsan i kes, naur a hana dia mat. Di agon pasi ot larning, bel i tolsot sur ir han.

⁹ I longor e Pol i warwara. Pa e Pol i ngosoni, pa i oroi mang a barsan ning i tortorot sur dir alangolango i.

¹⁰ Pa e Pol i warwara kol teteki, “Ur tur tostos ana naur a ham.” Ono otning i sirok kas pa i turpas a han.

¹¹ Ning a kunum a tarai la oroi asaning e Pol i toli, la warwara kol ana warwara Likonia mange, “Naur a god dia ka han purum arlar ana naur a momolna tetek dala!”

¹² La atong e Barnabas a god Sus pa e Pol a god Hermes, anasa ai a tena warwara tandiau.

¹³ A rumai artabar anuna god Sus i tur tumo lapiu milau a ris a hanua ning. Pa tena artabar tetek a god Sus i ben a barsan a bulumakaula sur uting na taman na hanua pa i los otleng a purpurla ning di ka suk tari. I toli larning suri taum ana kunum a tarai lar artabar tetek e Pol pa e Barnabas sur lar lotu tetek diau.

¹⁴ Ika ning naur a aposel dia ka tasman a utna ning a tarai la mang sur lar toli, dia silir anundiau na kaenla, * pa dia dun potora taraila, pa dia kukuk kol mange,

14:11: 14:11 Aposel 28:6 **14:14: 14:14** Aposel 10:26; Buk Song 146:6 * **14:14: 14:14** A tarai Israel la sira silir anunla na kaen sur lar asangani mang a utna ne i laulau kol na matanla.

¹⁵ “Mulo a taraila, asa kamkamna ning mulo tol a ututnala ne? Mia naur a barsan ka, mia arlar ka omulo! Mia hanot ka ana Wakak a Warwara tetek mulo, pa mia atai mulo sur mulor talingir kusun a ututna oros ka, ning mulo sira lotlotu tetek la, sur mulor mur e God, esaning i laun. Esaning i tol a langit, a rakrakan hanua, a tasi, pa ututnala rop tingia onditol.

¹⁶ Nating i noren tar a taraila miting na matanitula rop sur lar laun arlar ana nuknukinla.

¹⁷ Ika e God i akes tar a ututnala sur mulor tasmani mang i ot e God. Ana nuna marmaris i tabar mulo ana kiar misaot na langit, a rakaila la wai ana kalang inla ot, i tabar mulo ana galis a utna na hangan, pa i abukus mulo ana gasgas.”

¹⁸ Dia atong a warwara ne, ika a tarai la mang ot sur lar lotu tetek diau taum ana artabar ning di tun tari. Pa dia sairas rakrakai la tuk ning la manah.

¹⁹ Lamur dingla na te Judala la han mitumo e Antiok pa e Ikonion, la lingir a nuknuk a kunum a tarai kusun e Pol pa e Barnabas. La wolot e Pol ana hatatla, pa la riñ purumi kusun a hanua, pa la nuki mang ka mat.

²⁰ Ika ning a tarai a asaer la tur talilis pasi, i tur, pa i kas ulak uting na hanua. Ana pukakiar lamur, i han taum oe Barnabas utumo e Derbe.

Dia han utumo na naur a papar Pisidia pa e Pampilia

14:16: **14:16** Aposel 17:30 **14:17:** **14:17** Jeremaia 5:24 **14:19:**
14:19 Aposel 17:13; 2 Korin 11:25

21 Ning e Pol pa e Barnabas dia ka warawai pas ana Wakak a Warwara tumo e Derbe pa dia ka asaer tar a galis a tarai sur la a kakak a asaerla, dia ulak utumo e Listra, Ikonion, pa e Antiok.

22 Dia arakrakai a tarai a asaer miting na natol a hanua ning, pa dia wunan la, sur lar tur rakrakai ana nunla tortorot. Dia atai la mange, “A galis a mamahat ir kibas nigon tar dala, lamur dalar kas ting na matanitu ane God.”

23 Dia aslang tar dingla na tarai sur lar ningnigo anuna tarai a lotu ting na taktakai hanua. Dia araring pa dia tamai, pa dia saran tar la tetek a Leklek, esaning la tortorot ono.

24 Ning dia ka han pas ting na hananuala ting na papar Pisidia, lamur dia hanot tumo na papar Pampilia.

25 Ning dia ka warawai pas tumo e Perga, dia han utumo e Atalia.

Dia ulak utumo e Antiok ting na papar Siria

26 Dia kas ana sip mitumo e Atalia sur uto e Antiok. E Antiok a hanua ning a tena tortorotla la saran tar diau ana marmaris ane God, sur a titol ne dia ka arop tari.

27 Ning dia hanot, dia kabah taum pas a tarai a lotu, pa dia atai la ana ututnala rop ning dia toli ana rakrakai e God. Dia atai la otleng mang e God ka tol a ngas sur a tarai ning bel a tarai Juda lar tortorot.

28 Pa dia kes bongnan diau tingia taum ana tarai a asaerla.

15

A tarai a lotu la kes taum saot e Jerusalem

¹ Dingla na tarai misaot e Judia la han uto e Antiok, pa la asaer la ning la tas ana tortorot mange, “Ning bel di kot talilis a palaona ta kaklik barsan arlar ana warkurai ane Moses, bel dir alaun mulo.”

² E Pol pa e Barnabas dia arlak kol taum onla. Pa tarai a lotu la aslang tar e Pol pa e Barnabas pa dingla na tarai a tortorot otleng, sur lar han usaot e Jerusalem tetek a aposella pa ningnigola anuna tarai a lotu, sur lar deken la ana utna ne.

³ A tarai a lotu la tur tulan la, pa la solong naur a papar Ponisia pa e Samaria. Ning la han, la warwara amon tetek a tarai a lotu ting na hananuala, mang a tarai ning bel a tarai Juda la lingir a nuknukinla. Pa la ning la tas ana tortorot, la gas kol ning la longori.

⁴ Ning la hanot saot e Jerusalem, a tarai a lotu pa aposella pa ningnigola ana lotu la agasgas pas la. Pa dia atai la ana ututnala ning dia toli ana rakrakai e God.

⁵ Dingla na Parisaio ning la tortorot oe Iesu, la tur pa la atongi mang, “I tostos ot sur dir kot talilis a tarai ning bel a tarai Juda ning la lingir a nuknukinla. Pa dir asaer la sur lar mur a Warkuraila ane Moses.”

⁶ A aposella pa ningnigola la kes taum sur lar nuknuk wakak ana utna ne.

⁷ Ning la ka warwara kol pas onoi, e Pita i tur pa i atai la mange, “Na tastasik, mulo tasmani

mang nating ot, e God i aslang pas iau, a halimulo, sur ar warawai ana Wakak a Warwara tetek la ning bel a tarai Juda, sur lar longori pa lar tortorot ono.

⁸ E God, esaning i tasman a nuknuk a taraila rop, i asangani tetek dala mang i gas pas la ning bel a tarai Juda, ning i saran a Talngan Tabu tetek la, larning i sarani tetek dala.

⁹ Anuna titol tetek dala pa tetek la bel i maskana. I atotoh la otleng ning la tortorot.

¹⁰ Sur asaning mulo mang sur mulor lar e God, ning mulo saran tar a mamahat a titol tetek a tarai a asaer ning mulo atongi mang lar mur a Warkuraila ane Moses? Anundala mangis a tarai tagun nating bel la tolsot sur lar muri, pa dala otleng onone bel dala tolsoti.

¹¹ Ika dala tortorot mang dir alaun dala anasa ana marmaris ana nundala Leklek e Iesu, arlar ka otleng onla.”

¹² Pa tarai rop ning la kes taum, la kes longoroi, ning la longor e Pol pa e Barnabas, dia warwara ana akinalangla pa ututna na kulkulan ning dia toli ana rakrakai e God tetek a taraila ning bel a tarai Juda.

¹³ Ning dia manah ana warwara, e Jems i atongi mang, “Na tastasik, mulor longor iau.

¹⁴ E Saimon i atai dala ana ningnigo na pukakiar ning e God i maris la ning bel a tarai Juda, pa i ben pas dingla na tarai onla sur la anunai ot.

15:8: **15:8** Aposel 10:44; 11:15 **15:10:** **15:10** Matiu 11:30; Galesia 3:10 **15:11:** **15:11** Galesia 2:16; Epeses 2:5-8 **15:13:** **15:13** Galesia 2:9

¹⁵ A utna ne e God i toli i arlar ana warwara anuna propetla. Larning di ka tumus tari mange,

¹⁶ ‘Lamur tana, ar ulak,
par tol ulak a rumai ane Dewit, ning ka taroh.

Par atur ulak pas a rumai ning i taroh,
par tol wakak ulaki.

¹⁷⁻¹⁸ Pa tarai masik otleng,
a tarai ning bel a tarai Juda,
lar talingir tetek a Leklek,
la ning ia ka kabah pas la sur anuki.

A warwarala ne ana Leklek,
esaning ka warwara talapor tar ana
ututnala ne’ *Amos 9:11-12*
nating ot.

¹⁹ “Pa a nuknukik i manglarne, gong dala saran a mamahat tetek a taraila ning bel a tarai Juda, ning la talingir tetek e God.

²⁰ Dalar tumtumus tetek la, pa dalar atai la mang gong la ien ta utna ning di ka artabar tar ono tetek a اساسongo na godla, anasa a lotu ning i adur a utna na hangan, gong la tol a toltol a pamuk, gong la ien ta utna ning bel di gos wakak a suluk kusuni, pa gong la ien ta inagoi ning di pos koli ka, anasa a suluk kaning ot ono.

²¹ Anasa tagun nating ot ting na hananuala rop, di was a Warkuraila ane Moses, pa la warawai onoi ting na rumai lotula ana Pukakiar Sabatla.”

Di tumtumus tetek a tarai a tortorotla ning bel a tarai Juda

²² A aposella pa dingla na ningnigo, taum ana tarai a lotu rop, la warwara taum sur lar aslang pas ir naur a barsan miting onla, sur diar han taum oe Pol pa e Barnabas utumo e Antiok. La aslang pas e Judas, ning a risana otleng e Barsabas, pa e Sailas, naur a ningnigo miting onla ning la tas ana tortorot.

²³ Pa la tumus tar a pas sur lar losi. A pas i atongi mange:

Mila a aposella pa ningnigola, na tastasimulo, mila tumtumus tetek mulo a tena tortorotla miting na tarai ning bel a tarai Juda ning mulo kes tumo e Antiok, pa ting na naur a papar Siria pa e Silisia:

A marmaris tetek mulo,

²⁴ Mila ka longori mang dingla na tarai omila, la atongi mang mulor mur a Warkuraila rop ane Moses, pa la aloklokron a nuknukimulo ono. Bel mila sune la.

²⁵ Onone mila ka warwara taum pas, pa mila rop mila nuki mang i wakak sur milar aslang pas naur a barsan, pa milar sune diau tetek mulo taum ana naur a halimila, e Barnabas pa e Pol,

²⁶ naur a barsan ning bel dia mangan alar anundiau a lalaun ana risana anundala Leklek e Iesu Karisito.

²⁷ I maining milar sune e Judas pa e Sailas tetek mulo, pa diar atai mulo ana warwarala ne mila tumusi te na pas ne.

²⁸ A Talngan Tabu i asangan mila sur gong mila saran tar ta mamahat tetek mulo. Dingla na

ututnala ka ne mulor muri:*

²⁹ Gong mulo ien ta utna ning di artabar ono tetek a asasongo na godla. Gong mulo ien ta utna ning bel di gos wakak a suluk kusuni, pa ta inagoi ning di pos koli ka, anasa a suluk kaning ot ono. Pa gong mulo tol a toltol a pamuk. Ir wakak kol tetek mulo ning bel mulor tol a ututnala ne.

Ai ka, pa marmaris tetek mulo.

³⁰ Di sune sen la pa la han utumo e Antiok. Pa la kabah taum pas a tarai a lotu, pa la saran tar a pas ning tanla.

³¹ Ning la wasi, la gas kol ana wakak a warwara na wunan.

³² E Judas pa e Sailas dia wunan la pa dia arakrakai la ning la tas ana tortorot ana galis a warwara, anasa diau naur a propet.

³³⁻³⁴ Ning dia ka kes bongnan diau tingia, na tastasindiau ana tortorot la tur tulan diau taum ana balmolmol, sur diar ulak usaot e Jerusalem tetek la ning la sune diau.†

³⁵ Ika e Pol pa e Barnabas dia kes ot tumo e Antiok. Dia taum ana galis a tarai onla, la asaer a tarai, pa la warawai ana warwara anuna Leklek.

E Pol pa e Barnabas dia han sarara

³⁶ Dingla na pukakiar lamur, e Pol i atai e Barnabas mang, “Dar ulak uting na hananuala

* **15:28: 15:28** A kamkama warwara ne, mang a tarai ning bel a tarai Juda la langolango kusun a Warkuraila anuna tarai Juda, larning gong di kot talilis a palaonla. † **15:33-34: 15:33-34** Dingla na tena tastasmai ana Buk Tabu la nuki mang dingla na warwara otleng i kes te na ves ne. I manglarne: *Ika e Sailas i mang sur ir kes ot tingia.*

rop, ning da ka warawai pas tingia ana warwara anuna Leklek, sur dar oroi na tastasindau ana tortorot mang la ka mangmangasa.”

³⁷ Pa e Barnabas i mang sur diar ben e Jon, ning a risana otleng e Mak.

³⁸ Ika e Pol i nuki mang bel i wakak ning diar beni, anasa i han kusun diau tumo e Pampilia, pa bel i mur diau tuk ning a titol i rop.

³⁹ Pa dia warwara na balakut kol ono, pa lamur dia han sarara. E Barnabas i ben pas e Mak, pa dia kas ana sip uto na lolo Saiprus.

⁴⁰ Pa e Pol i aslang pas e Sailas, sur diar han. Pa na tastasindiau ana tortorot la saran tar diau ana marmaris ana Leklek.

⁴¹ Dia solong naur a papar Siria pa e Silisia, pa dia arakrakai a tarai a lotu ting na hananuala.

16

E Timoti i han taum oe Pol pa e Sailas

¹ Ana tinan ane Pol pa e Sailas dia hanot tumo e Derbe pa lamur tumo e Listra. Ning a hala tarai a asaer i kes ting na hanua Listra, a risana e Timoti, a nat a hane Juda, a tena tortorot, pa e tamana a te Grik.

² La ning la tas ana tortorot tumo e Listra pa e Ikonion la warwara oe Timoti mang ai a wakak a barsan.

³ Pa e Pol i mang sur ditol ar han taum. I ben pasi, pa i kot talilisi, anasa a te Judala ning la kes

15:37: 15:37 Aposel 12:12, 25 **15:38: 15:38** Aposel 13:13; Kolosi 4:10 **16:1: 16:1** Aposel 14:6; 2 Timoti 1:5 **16:2: 16:2** Pilipai 2:19-22

ting na hananuala ning, la tasmani mang e tamana a te Grik.

⁴ Ning ditol han uting na hananuala, ditol warwara amon ana warkurai anuna aposella pa ningnigola saot e Jerusalem, sur a tarai lar muri.

⁵ Di arakrakai a tortorot anuna tarai a lotu ting na hananuala, pa wawas onla i han kas amon ana pukakiarla rop.

A tatatai ane Pol tumo e Troas

⁶ A Talngan Tabu i sairas ditol sur gong kaba ditol warawai ana Wakak a Warwara tumo na papar Esia. Ditol han ka utumo na naur a papar Prigia pa e Galesia.

⁷ Ning ditol hanot ting na ararop a papar Misia, ditol mang sur ditol ar han uto e Bitinia, ika a Inguna e Iesu bel i malmaling sur ditol ar han uto.

⁸ Pa ditol bolos a papar Misia, pa ditol han uto e Troas.

⁹ Ana morom, e Pol i oroi a tatatai. I oroi pas ning a barsan a te Masedonia i tur pa i nunungi mange, “Ur lamut ute e Masedonia, pa ur nangan mila.”

¹⁰ Ning ka oroi tar a tatatai, ono otning mila* sang sur a tinan uto e Masedonia, anasa mila tasmani mang e God ot i kabah pas mila, sur milar warawai tetek la ana Wakak a Warwara.

E Lidia i lingir a nuknukna tumo e Pilipai

¹¹ Ning mila han mitumo e Troas mila kas ana sip, pa mila han tostos uto na lolo Samotres.

16:4: 16:4 Aposel 15:23-29 **16:6: 16:6** Aposel 18:23 * **16:10: 16:10** E Luk i tumus “mila”, anasa i han taum oe Pol.

Ning a pukakiar ulak mila han kale uto e Neapolis.

¹² Pa mila han miting e Neapolis uto e Pilipai, a tnan hanua kol tana hananuala tumo na papar Masedonia, pa tarai Rom la kes tingia. Mila kes pas dingla na pukakiar tingia.

¹³ Ana Pukakiar Sabat mila purum ting na taman a hanua ning, sur a malum, anasa mila nuki mang ta pukna na niaring kaning ia. Mila kes, pa mila warwara tetek a gurarala ning la kes taum tingia.

¹⁴ Ning a halinla ning la longor mila a risana e Lidia, a hane mitumo e Tiatira, a tena siuran pepol a kaen, pa tena lotu tetek e God. Pa Leklek i lingir anuna lalaun sur ir longor ana warwarala ning e Pol i atongi.

¹⁵ Ning di ka baptais tar e Lidia, pa la otleng ning la kes ting na nuna rumai, i ben pas mila, pa i atongi mang, “Ning mulo nuki mang a tortorot ana Leklek, mulor kas ute na nuk a rumai, pa mulor kes napirik.” Pa i angongos pas mila tuk ning mila malmaling.

E Pol pa e Sailas dia karabus tumo e Pilipai

¹⁶ Ning a pukakiar mila han sur uting na pukna na niaring, mila songo pas ning a tena titol oros, a hane, a mot kaning onoi, pa i tolsot pasi sur ir warwara nigo ana utna ning ir hanot lamur. Anuna ningnigola la sira kibas a tnan mani ana nuna titol.

¹⁷ A hane ne i mur mila ma e Pol, pa i warwara kol mange, “A taraila ne, la na tena titol oros ane

God i Leklek Kol, pa la atai mulo ana ngas ning dir alaun mulo ono.”

¹⁸ A galis a pukakiar i toli larné. Ning e Pol i ngoro onoi, i talingir, pa i atai a mot mange, “A atai u ana risana e Iesu Karisito, ur purum kusun a hane ne.” Pa ono otning, a mot i purum kusuni.

¹⁹ A ningnigola anuna hane ne la tasmani mang bel ma lar oroi ulak ta mani taguni. La tong akes pas e Pol pa e Sailas, pa la dat diau uting na tinine hanua, pa la atur diau na matana ningnigola.

²⁰ La ben diau tetek a tena warkuraila pa la atongi mange, “Naur a barsan ne, naur a te Juda, dia tol a tnan mamahat te na anundala hanua.

²¹ Pa dia asaer a tarai ana ututnala ning bel i tostos sur dala a tarai Rom dalar longor ono, pa dalar muri.”

²² A kunum a tarai otleng la warwara kol ana artitiu ondiau, pa tena warkuraila la arsune sur dir silir sen anundiau na kaenla pa dir miras diau.

²³ Ning di ka miras rakrakai tar diau, di akas diau ting na karabus, pa di atai a tena tai alar mang ir tai alar rakrakai diau sur gong dia purum.

²⁴ Ning a tena tai alar i longor a warwara ne, i akas diau ting na tuka rumai na arpotor ana karabus, pa i suah alar tar diat a handiau ana palang.

²⁵ Ana tnan morom, e Pol pa e Sailas dia araring, pa dia saken a saksakla tetek e God, pa

tarai otleng ning la karabus, la longor diau.

²⁶ Bel i bongnani, pa tnan mamais i hanot kulkulan, pa i gulen a kaba pos na rumai. Ono otning a tamanla rop la sapang, pa senla miting na kuna tarai a karabus rop la tapapak.

²⁷ A tena tai alar i mata, pa ning i oroi a tamanla i sapang, i dat pas anuna liwan a harum sur ir umkol i ot onoi, anasa i nuki mang a tarai a karabus la ka liu rop.

²⁸ Ika e Pol i arkabah rakrakai teteki mange, “Gong u alaulau u, mila rop kanet.”

²⁹ Pa tena tai alar i arkabah sur a lamla, i dun kas kapit, i matmataut pa i koloron, i punga purum salanigo ta e Pol pa e Sailas.

³⁰ Pa i ben purum pas diau, pa i deken diau mange, “Naur a barsan, asaning ar toli sur dir alaun iau?”

³¹ Pa dia kelesi mange, “Ur tortorot ana Leklek e Iesu pa dir alaun u, pa la otleng ning la kes ting na num a rumai.”

³² Pa dia warwara ana warwara anuna Leklek tetek la rop ning la kes ting na nuna rumai.

³³ Ana morom ot ning, a tena tai alar i ben pas diau, pa i gos a mangmangrasla kaning na palaondiau. Pa ana pukakiar ot ning di baptais a tena tai alar, pa la rop ning la kes ting na nuna rumai.

³⁴ I ben pas diau uting na nuna rumai, pa i tabar diau ana utna na hangan. Pa i bukus ana gasgas, la taum ana nuna tarai, anasa la tortorot oe God.

³⁵ Ana kobot ning ot a tena warkuraila la sune naur a polis tetek a tena tai alar ana warwara mange, “Ur pak sen naur a barsan ning.”

³⁶ Pa tena tai alar i atai e Pol mange, “A tena warkuraila la arsune sur dir pak sen mu. Onone mur purum, mur han taum ana balmolmol.”

³⁷ Ika e Pol i atai naur a polis mange, “Belot tik i warkurai miau, la miras miau na matana tarai, ika miau naur a te Rom ot. La akas tar miau uting na karabus, pa onone la mang sur lar pak kumnan sen miau. Ika bel! I wakak sur la ot lar lamut pa lar pak sen miau.”

³⁸ Naur a polis dia ulak, pa dia atai a tena warkuraila ana warwarala ne. Ning la longori mang diau naur a te Rom, la matmataut.

³⁹ Pa la han, la apuasa anunla na rongo tetek diau. La ben purum diau kusun a karabus, pa la nunung diau sur diar han masik kusun anunla hanua.

⁴⁰ Pa ning dia ka han kusun a karabus, dia han sur uting na rumai ane Lidia. Pa dia oroi la ning la tas ana tortorot tingia. Dia wunan tar la, lamur dia han kusun a hanua.

17

Tumo e Tesalonika

¹ Ning e Pol pa e Sailas dia bolos e Ampipolis pa e Apolonia, dia hanot tumo e Tesalonika. Ning a rumai lotu anuna tarai Juda kaning ia.

² Pa e Pol i kas tetek la ting na rumai lotu, larning i sira toli. Ana natol a Pukakiar Sabat ot, i warwara taum onla ana Buk Tabu.

³ I papak, pa i atong talapori mang i sot ot sur e Karisito ir mat pa ir kamtur ulak kusun a minat. Pa i atongi mange, “E Iesu ning a atai mulo onoi, i ot a Karisito.”

⁴ Dingla na tarai Juda pa galis a te Grik ning la lotu tetek e God, pa galis a ningnigo na gurarala otleng la tortorot ning la longor a warwara, pa la mur e Pol pa e Sailas.

⁵ Ika, dingla na tarai Juda la bal laulau ondiau, pa la ben pas a tarai laulaula miting na tinine hanua. La han taum, pa la tol a tnan mamahat ting na hanua. La dun kas uting na rumai ane Jeson, la seren e Pol pa e Sailas sur lar ben purum diau tetek a taraila.

⁶ Ika bel la pastek diau. La dat pas e Jeson pa dingla na tarai otleng ning la tas ana tortorot, tetek a ningnigola miting na hanua ning, pa la warwara kol mange, “A taraila ne la tol a tatatnan mamahatla ting na hananuala te na rakrakan hanua, pa onone, la hanot kale tetek dala!

⁷ Pa e Jeson i ben kas la uting na nuna rumai. La rop ne la lakai a warkuraila anuna Sisar, a king anuna tarai Rom, pa la atongi mang ning a barsan, a risana e Iesu, i ning a king.”

⁸ Ning a taraila pa ningnigola la longor a warwara ne, la loklokron kol ono.

⁹ La los mani kusun e Jeson pa la otleng ning di dat taum pas la, sur dir lou purum la ono*. Lamur la pak sen la.

17:7: 17:7 Luk 23:2; Jon 19:12 * **17:9: 17:9** E Jeson i malmaling sur gong ulak ma dia tol a mamahatla ting na hanua.

Tumo e Beria

¹⁰ Ning i morom purum, la ning la tas ana tortorot la sune e Pol pa e Sailas uto e Beria. Ning dia ka hanot tingia, dia kas uting na rumai lotu anuna tarai Juda.

¹¹ La ne la wakak tanla tumo e Tesalonika, anasa la mang kol sur lar kibas a warwara ne, pa la was wakak a warwarala miting na Buk Tabu ana pukakiarla rop, sur lar tasmani mang a warwara ane Pol i momol o bel.

¹² Pa galis a tarai Juda, pa galis a tarai Grik otleng, pa galis a gurara Grik ning a ningnigola, la tortorot.

¹³ Ning a tarai Juda mitumo e Tesalonika la longori mang e Pol i warawai ana warwara ane God tumo e Beria, la han utumo pa la akutkut a balan a kunum a tarai pa la akamtur a balanla.

¹⁴ Pa la ning la tas ana tortorot la sune kapit e Pol utumo latasi. Ika e Sailas dia ma e Timoti dia kes ot tumo e Beria.

¹⁵ A taraila ning la ben e Pol, la han taum onoi uto e Atens. Lamur i sune ulak la ana warwara tetek e Sailas pa e Timoti mang diar han kapit teteki.

Tumo e Atens

¹⁶ Ning e Pol i nanan diau tumo e Atens, i balmaris kol, ning i oroi mang a hanua ning i bukus ana manarla ning la sira lotu tetek la.

¹⁷ Pa i warwara ting na rumai lotu taum ana tarai Juda, pa dingla na tarai masak otleng ning la lotu tetek e God. Pa ana pukakiarla rop i

warwara otleng tanla ning la arsongo ting na tinine hanua.

¹⁸ A tena tastasmanla ana asaer anuna kunum Epikurian pa kunum Stoik la harum na warwara taum oe Pol.[†] Dingla na tarai la deke mang, “Asane a tena abereng wara ne i atai dala ono?” Pa dingla otleng la atongi mange, “Ngandek i atai dala ana tona godla miting na ta hanua masak.” La atongi larne, anasa e Pol i warawai oe Iesu pa ana lalaun ulak kusun a minat.

¹⁹ La ben pas e Pol usaot na kiwung di atongi mang e Areopagus, pa la atai i mange, “Mila mang sur milar tastasmai ana tona warwara ning u asaer mila ono.

²⁰ A utna ning u warwara ono, i maskana tetek mila, pa mila mang sur milar tasman a kamkamna.”

²¹ La atongi larning anasa a te Atensla pa wasirala otleng ning la kes tingia, la arnore ka ana pukakiarla ana warwara pa longlongor sur al tona asaer.

²² E Pol i tur potor a tarai a kiwung Areopagus, pa i atongi mange, “A tarai Atens, ting na titolla ning mulo toli, a oroi mang mulo na tena lotu.

²³ Anasa, ning a han taltal te, a oroi a manarla ning mulo sira lotu tetek la, pa ia ka oroi tar otleng ning a logo ning di tun a artabarla onoi, a tumtumus kaning ono i mange, ‘Tetek a god ning bel di tasmani’. Esaning mulo lotu teteki, ika bel

[†] **17:18: 17:18** A tarai Atens la sira mur a galis a asaer anuna tena tastasmanla tagun nating. A tarai miting na naur a kunum Epikurian pa e Stoik la mur naur a ngas a asaer larning. A asaer ka anuna tarai, bel i arlar ana Buk Tabu.

mulo tasmani, i ot ne, a warawai onoi tetek mulo.

²⁴ E God ot ning i tol a rakrakan hanua pa ututnala rop ning la kes tingia, ai a Leklek ana langit pa rakrakan hanua, pa bel i kes ting na rumai lotula ning a tarai la toli.

²⁵ Pa bel i kapan sur tik ir nangani, anasa i ot i tabar a taraila rop ana lalaun, pa wuwu na lalaun, pa ututnala rop.

²⁶ E God i akes tar a ningnigo na barsan. Pa tarai miting na matanitula rop la hanot taguni, pa la kes te na rakrakan hanua rop. Ting na nuknuk e God i nuki mang lar kes tahaia, pa nangse lar hanot, pa nangse lar rop ulak.

²⁷ E God i tol a ututnala ne sur a tarai lar tai suri, pa ngandek lar tai taltal suri pa lar seren pasi. Ika, e God bel i kes bakbak kusun dala rop.

²⁸ Larning di ka atong tari, 'Dala laun, dala han taltal, pa dala tong akes a lalaun, i kamkamna ot oe God.' Arlar ana numulo na tena pak saksak la atongi mange, 'Dala otleng na natnatnala ot.'

²⁹ "Ning dala na natnat e God, bel i wakak sur dalar nuki mang e God i arlar ana manar a gol, o a silwa, o a hat, ning a tarai la nuk otnan pasi pa la toli ana kunla.

³⁰ Ana raula nating, e God i noren a taraila ning bel la nuk pasi, ika onone, i atai a taraila rop ting na hananuala sur lar lingir a nuknukinla.

³¹ Anasa ka kubus tar a pukakiar, sur ir

17:24: **17:24** 1 King 8:27; Aposel 7:48 **17:25:** **17:25** Buk Song 50:12 **17:27:** **17:27** Buk Song 145:18; Jeremaia 23:23 **17:29:** **17:29** Aisaia 40:18-20; 44:10-17; Aposel 19:26 **17:31:** **17:31** Buk Song 96:13

warkurai a rakrakan hanua ana tostos a warkurai. Pa ka aslang tar ning a mainla ning ir tol a warkurai, pa i amomoli tetek a taraila rop, ning i akamtur ulak pas a barsan ning kusun a minat.”

³² Ning la longor a warwara ana lalaun ulak kusun a minat, dingla na tarai miting onla, la morot laulau onoi, ika dingla la atai i mange, “Mila mang sur ur warwara ulak tetek mila ana utna ne.”

³³ Pa e Pol i purum kusun la.

³⁴ Pa dingla na tarai la tortorot, pa la mur e Pol. La ne: E Dionisius, i miting na tarai a kiwung Areopagus, pa ning a hane, a risana e Damaris, pa dingla na tarai otleng.

18

Tumo e Korin

¹ Ning a ututnala ne ka rop, e Pol i han mitumo e Atens uto e Korin.

² Dia arsongo taum ana ning a te Juda tingia, a risana e Akuila, i mitumo e Pontus, pa nuna hane, a risana e Prisila. Nating ka dia han mitumo e Itali, anasa e Sisar Klodius i warkurai i mang a tarai Juda rop lar han mitumo e Rom, a tnan hanua tumo e Itali. Pa e Pol i han sur ir geren diau.

³ I kes taum ondiau pa ditol titol taum, anasa ditol natol a tena tol rumai a sel.

⁴ Ana Pukakiar Sabatla i warwara taum onla ting na rumai lotu, sur ir dat atur a nuknuk a

tarai Juda pa la otleng ning bel a tarai Juda sur lar tortorot oe Iesu.

⁵ Ning e Sailas pa e Timoti dia hanot mitumo na papar Masedonia, e Pol bel i manah ana warawai ana warwara ane God, pa i apuasa i tetek a tarai Juda mang e Iesu a Karisito esaning e God i sune i ute.

⁶ Ika a tarai Juda la warwara alalar ka a asaer ane Pol pa la atong saksakani. Pa e Pol i daplan anuna kaen, a asilang mang bel ma ir warwara ulak tetek la. Pa i atai la mange, “Ning mulor hirua ana warkurai ane God, mulo ot a kamkamna, pa ia ka langolango. Turpasi onone, ar han kama tetek la ning bel a tarai Juda.”

⁷ Pa i purum kusun a rumai lotu, pa i kas uting na rumai anuna ning a barsan, a risana e Titius Jastus, a tena lotu tetek e God, pa anuna rumai i tur milau a rumai lotu.

⁸ E Krispus a ningnigo miting na rumai lotu pa la rop otleng ning la kes ting na nuna rumai, la tortorot ana Leklek. Pa galis a tarai Korin, ning la longor a warawai ane Pol, la tortorot, pa di baptais la.

⁹ Ning a morom a Leklek i warwara tetek e Pol ana tatatai mange, “Gong u matmataut, ur warwara ka. Gong u kes longoroi,

¹⁰ anasa a kes taum hom, pa bel tik ir alaulau u, anasa anuk a galis a tarai kane na hanua ne.”

¹¹ Pa e Pol i kes tingia ning a rau pa diono na kalang, pa i asaer la ana warwara ane God.

¹² Ana rau ning e Galio i ningnigo tumo na papar Akaia, a tarai Juda la tur taum sur lar um e Pol, pa la beni sur ir tur ana warkurai.

¹³ Pa la atongi mange, “A barsan ne i asaer a tarai sur lar lotu tetek e God ana toltol ning bel i arlar ana Warkuraila anumila a tarai Juda.”

¹⁴ Ning e Pol i mang sur ir warwara, e Galio i atai a tarai Juda mang, “Mulo a tarai Juda, ning a utna ne i toli ir laulau, pa bel i mur a warkurai anuna matanitu, ir tostos sur ar longor mulo ono.

¹⁵ Ika ning mulo tiwi ka ana warwarala, pa ana risingla, pa ana numulo na warkuraila ot, i wakak ning mulo ot mulor warkurai i. Iau bel ar warkurai a toltolla larne.”

¹⁶ Pa i kepsen la kusun a keskes a warkurai.

¹⁷ Pa la rop la tong akes pas e Sostenes, a ningnigo miting na rumai lotu anuna tarai Juda, pa la umi na matana keskes a warkurai. Ika e Galio bel i pos balana ana utna ne.

E Pol i ulak utumo e Antiok

¹⁸ Ning e Pol ka kes bongnani tumo e Korin, i han kusun la ning la tas ana tortorot pa i han uto e Senkria. Ning i kes tingia di kumur arop a hihna, anasa ka tolsot pas anuna lele tetek e God. E Prisila pa e Akuila taum oe Pol ditol kas ana sip utumo na papar Siria.

¹⁹ Ning a sip i sot to e Epeses, e Pol i han kusun diau tingia, pa i kas uting na rumai lotu, pa i warwara taum ana tarai Juda.

²⁰ Ning la nunungi sur ir kes al siklik taum onla, bel i longor tanla.

²¹ Pa ning la han sarara, i atai la mange, “Ning a nuknuk e God, ar ulak tetek mulo.” Pa i han mitumo e Epeses ana sip.

²² Ning i sot to e Sisaria i han usaot e Jerusalem pa i oroi tar a tarai a lotu, pa lamur i han uto e Antiok.

²³ Ning ka kes pas dingla na pukakiar tingia, i han kusun la. Pa i han taltal ting na hananuala ting na naur a papar Galesia pa e Prigia, pa i arakrakai a tortorot anuna tarai a asaer rop.

E Apolos i kes to e Epeses

²⁴ Ning a te Juda mitumo e Aleksandria, a risana e Apolos, i hanot to e Epeses. I ning a wakak a tena warwara, pa i tastasman kol ana Buk Tabu.

²⁵ Di ka asaer tari ana ngas anuna Leklek, pa i gas kol sur ir warawai. I asaer wakak oe Iesu, ika i tasman ka a baptais ane Jon*.

²⁶ I han uting na rumai lotu pa i turpas a warwara pa bel i matmataut. Ning e Prisila pa e Akuila dia longori, dia ben pasi, pa dia atong talapor a ngas ane God teteki.

²⁷ Ning e Apolos i mang sur ir han utumo na papar Akaia, la ning la tas ana tortorot to e Epeses, la wunan tari, pa la tumtumus tetek a tarai a asaer tumo e Akaia, sur lar gas pasi. Pa ning ka hanot tumo na papar Akaia, ai a wakak

* **18:25: 18:25** A baptais ane Jon ona lingir a nuknukindala. E Apolos bel i tasman a baptais ane Iesu Karisito. A baptais ane Iesu Karisito ona tortorot ana minat e Iesu sur ir alaun dala.

a tena arnangai tetek la, ning e God ka lingir pas la ana tnan marmaris anunai sur lar tortorot.

²⁸ Anasa i keles rakrakai a warwara anuna tarai Juda na matana tarai ning la puai mang e Iesu bel a Karisito. Pa i amomol tari ana warwara na Buk Tabu mang e Iesu ot a Karisito.

19

E Pol i kes to e Epeses

¹ Ning e Apolos i kes ting e Korin, e Pol i mur a ngas bual pa i hanot to e Epeses, pa i pastek pas dingla na tarai a asaer tingia.

² Pa i deken la mange, “Mangasa, a Talngan Tabu i kes omulo ning mulo tortorot?” Pa la kelesi mange, “Bel. Bel di atai mila ana Talngan Tabu.”

³ Pa i deken la mange, “Di baptais mulo on esi na ngas a baptais?” Pa la kelesi mange, “A baptais ane Jon.”

⁴ Pa e Pol i atongi mange, “E Jon i baptais ana baptais na lingir a nuknuk, pa i atai a tarai, sur lar tortorot o esaning ir hanot lamur tana. I e Iesu.”

⁵ Ning la ka longor tar a warwara ane Pol, di baptais la ana risana Leklek e Iesu.

⁶ Ning e Pol i suah naur a kuna saot onla, a Talngan Tabu i kes onla, pa la warwara ana urmatana warwara, pa la warwara na propet.

⁷ Ngandek la takai a bonot pa pisir naur, pa la a taraila ka.

⁸ E Pol i sira kas uting na rumai lotu, i warwara pa bel i matmataut, pa i papak wakak ana matanitu ane God sur lar tortorot. I toli larning arlar ana natol a kalang.

⁹ Ika a balan dingla na tarai onla i rakrakai kol, pa bel la mang sur lar tortorot, pa la atong laulau a Ngas ane Karisito na matana taraila. Pa e Pol i han kusun la sur uting na rumai a asaer ane Tiranus. A tarai a asaer la muri pa la warwara taum ana pukakiarla ting na rumai ning.

¹⁰ Ana naur a rau i sira toli manglarning. Pa la rop, a tarai Juda pa tarai ning bel a tarai Juda, ning la kes ting na papar Esia, la longor a warwara anuna Leklek.

Mais a nat e Skewa

¹¹ E Pol i tol a maskan a ututnala na kulkulan ana rakrakai e God.

¹² Pa tarai la los pas anunla na diah tawolla pa didiah kaenla otleng, la suah pasi ting na palaona e Pol, lamur la suahi ana tinsamanla pa la langolango, pa motla otleng la purum kusun la.

¹³ Dingla na te Juda, la sira han taltal uting na hananuala, sur lar kepsen a motla kusun a tarai. Pa la tohoi sur lar kepsen otleng a motla taum ana risana e Iesu. La sira atongi mange, “A kepsen mulo ana risana e Iesu, ning e Pol i warawai onoi.”

¹⁴ Mais a nat e Skewa a te Juda, a tnan tena artabar tetek e God, la toli larne.

¹⁵ Ning a pukakiar a mot i keles la mange, “A tasman ot e Iesu, pa a tasman otleng e Pol. Ika mulo, esila mulo?”

¹⁶ Pa barsan ning a mot i kas tar onoi, i sirok pas la, pa i um laulau la pa i silir anunla na kaen pa la dun mengere kama utumo lapiu.

¹⁷ A warwara ana utna ne, i hanot tetek a tarai Juda pa taraila ning bel a tarai Juda ning la kes to e Epeses, pa la matmataut rop, pa la hanrawai a risan a Leklek e Iesu.

¹⁸ A galis onla ning la tortorot, la hanot pa la patuai ana laulau a gininla.

¹⁹ Pa galis otleng onla ning la wah, la los taman pas anunla na buk a wah, pa la tun la na matana taraila. Ning la was taman a matana bukla, i arlar ot ana dilima na bonot a rip (50,000) a mani.

²⁰ A warwara anuna Leklek i han sarara, pa i gomo ana rakrakai.

A mamahat to e Epeses

²¹ Ning a ututnala ne ka rop, e Pol i mang sur ir han usaot e Jerusalem, pa ir bolos ting na papar Masedonia pa papar Akaia. Pa i atongi mange, “Ning ia kar han pas saot e Jerusalem, ar han kale uto e Rom.”

²² I sune nigon e Timoti pa e Erastus utumo e Masedonia. Dia naur a halinla ning la sira nangani. Pa e Pol i kes kaba to na papar Esia.

²³ Ana pukakiarla ning, a tnan mamahat i hanot, anasa a taraila bel la mang sur a Ngas anuna Leklek.

²⁴ Ning a barsan a risana e Demetrius, a tena tol manar ana silwa. I toltol a nanatar a rumai lotu ane Artemis a hane na god, ana silwa. Pa titol ne i tol otnan a tnan mani ane Demetrius pa tarai a titol.

²⁵ I ben taum pas anuna tarai a titol, pa dingla na tarai otleng ning anunla na titol i arlar, pa i atai la mange, “Taraila, mulo tasmani mang dala sira tol otnan a tnan mani miting na titol ne.

²⁶ Te e Epeses, pa ting na hananuala rop te na papar Esia, a barsan ne, e Pol, ka ben rongon pas a galis a tarai. I atai la mang a ututnala ne dala sira toli ana kundala, bel a godla.

²⁷ Ning a utna ne ir hanot tetek dala, bel ir alaulau ka a wakak a risana nundala titol, lar nuk anatarna pas otleng a rumai lotu ane Artemis a hane na god, pa lar anatarna pas a risana. Anundala a god, ning onone a tarai Esia rop pa rakrakan hanua otleng la lotu teteki.”

²⁸ Ning la longor a utna ne, la balakut kol, pa la warwara kol mange, “Artemis anuna tarai Epeses, i itna kol!”

²⁹ Pa taraila rop miting na hanua ning la arsakai. La dun pa la tong akes pas e Gaius pa e Aristarkus, naur a te Masedonia ning ditol armuri ma e Pol, pa la kas taum ondiau uting na nunla tnan pukna na han taum.

³⁰ Ning e Pol i mang sur ir kas tetek a tarai, a tarai a asaer la sairasi.

³¹ Pa dingla na ningnigo ana matanitu ting na papar Esia, a halalna e Pol, la saran a warwara teteki sur gong i kas uting na rumai a kiwung.

³² Pa nuknuk a kunum a tarai i loklokor. Dingla na tarai la atong ning a warwara ot, pa dingla otleng la atong maskana warwara, pa galis onla bel la tasmani mang asaning la hanot suri.

³³ A tarai Juda la sugut otnan e Aleksanda tetek a kunum a tarai, pa la ben pasi usa lanigo. Pa dingla la atai i ana saning ir atongi. E Aleksanda i sairas la ana kuna, sur lar kes longoroi, pa i mang sur ir warwara alar i ot na matana tarai.

³⁴ Ika ning a tarai Epeses la tasmani mang e Aleksanda a te Juda, bel la longor, la warwara kol ana naur a awa mange, “E Artemis anuna tarai Epeses, i leklek kol!”

³⁵ Ning a tena tumtumus anuna hanua ning i sairas a tarai sur lar kes longoroi, i atai la mange, “A tarai Epeses, esi na hanua kane ning bel i tasmani mang a tarai mite e Epeses la tai alar a rumai lotu anuna tnan god Artemis, pa manarna otleng ning i punga purum misaot na langit?”

³⁶ Bel tik ir puai ana ututnala ne, i wakak ning mulor kes longoroi pa gong mulo tol oros.

³⁷ Mulo ka ben tar naur a barsan ne ute, ika bel dia kinkinau ting na rumai lotula, pa bel dia atong laulau anundala a hane na god.

³⁸ A keskes a warkurai pa a tena warkuraila kanet. Ning e Demitrius pa tena titolla ning la armuri, la mang sur lar tiu tik on ta utna, lar atai a keskes a warkurai onoi. Pa la, lar atostos a warkurai onoi.

³⁹ Ning ta utna kaning ot mulo mang sur mulor warwara ono, dir atostosi ot ting na kiwung na hanua.

⁴⁰ Sakana dir tiu dala ana mamahat ning i hanot ana pukakiar ne. Pa asa ma dalar atong alar dala ono? Anasa bel ta kamkamna.”

⁴¹ Ning ka atong tari larning, i sune sauran sen a taraila kusun a kiwung.

20

A tinan ane Pol utumo e Masedonia pa e Grik

¹ Ning a mamahat ning ka rop, e Pol i arsune pas a tarai a asaer, i wunan tar la, pa i artulai tanla, lamur i han utumo na papar Masedonia.

² Ning ka han pas ting na hananuala ning, pa ka wunan tar la ana galis a wakak a warwara, i hanot tumo na papar Grik.

³ I kes tingia natol a kalang. Ning i sang sur ir kas ana sip utumo na papar Siria, i tasmani mang a te Judala la pinpidaiwol sur lar umkoli. Pa i nuki mang i wakak sur ir han potot ting na papar Masedonia ana nuna tinan ulak.

⁴ Pa e Sopater, a nat e Pirus, mitumo e Beria, pa e Aristarkus pa e Sekundus mitumo e Tesalonika, e Gaius mitumo e Derbe, pa e Tikikus pa e Tropimus mitumo e Esia, pa e Timoti otleng, la armuri taum oe Pol.

⁵ La ne la nigo utumo e Troas, pa la kes nanan mila* tumo.

⁶ Ning ka rop a lotu na bret ning bel al is ono, mila han ana sip mito e Pilipai. Ning dilima na pukakiar ka rop, mila sot tumo e Troas tetek la ning la nigo kusun mila, pa mila kes pas mais a pukakiar tingia.

* **20:5: 20:5** E Luk i tumus “mila”, anasa i han taum oe Pol.

E Pol i alaun pas e Utikus

⁷ Ana ningnigo na pukakiar ana wik, mila kes taum sur milar hangan. E Pol i warwara tetek la, pa i dat abarah anuna warwara, tuk ana tnan morom, anasa i mang sur ir han kusun la ana pukakiar lamur.

⁸ Ting na tuka rumai tisaot ning mila kes taum ono a galis a lam kol tingia.

⁹ Ning a barman, a risana e Utikus, i kes saot na windo. Ning e Pol i warwara amon, a matana e Utikus i sulam kol, pa i borbor duman, pa i punga purum misaot na aretol a dek ana rumai ning, utumo na kabalapiu. Pa la los pasi, ka mat.

¹⁰ E Pol i purum, pa i borbor saot ono, pa i pos pasi, pa i atongi mang, “Gong mulo matmataut, ka laun.”

¹¹ Lamur e Pol i han kas ulak, i kibik pas a bret† pa i hangan. I warwara bongnani ot tetek la, tuk ning a Kamis i pusa ot, pa lamur i han kusun la.

¹² A tarai la han sarara taum oe Utikus, ka laun, pa la gas kol.

E Pol i han mito e Troas utumo e Miletus

¹³ Mila kas nigo ana sip utumo e Asos sur milar akas pas e Pol tumoia, lar i ot ka warkurai tari larning, anasa i mur a ngas.

¹⁴ Ning mila arsongo taum onoi tumo e Asos, mila akas pasi pa mila han utumo e Mitilini.

¹⁵ Ana pukakiar lamur mila han mitumo pa mila hanot milau ning a lolo, a risana e Kios. I

† **20:11: 20:11** Dingla na tena tastamai ana Buk Tabu la nuki mang e Pol i kibik a bret sur ir anuknuk a tarai ana minat e Iesu.

kabakiar ulak, mila bolos e Samos, pa ana pukakiar lamur, mila sot to e Miletus.

¹⁶ E Pol ka warkurai tari mang ir bolos sen ka e Epeses, sur gong i molot to na papar Esia, anasa i mang sur ir han kapit usaot e Jerusalem. Ning i tolsot, i mang sur ir kes tisaot ana pukakiar a Pentikos.

A ararop a warwara ane Pol tetek a ningnigola ana lotu to e Epeses

¹⁷ Ning mila hanot ting na hanua Miletus, e Pol i arsune uto e Epeses sur a ningnigola anuna tarai a lotu sur lar lamut teteki.

¹⁸ Ning la hanot teteki, i atai la mange, “Mulo tasman ot a ngas a keskes anuki ana pukakiarla ning a kes napirimulo, turpasi ana ningnigo na pukakiar ning a bot hanot te na papar Esia.

¹⁹ A tarai Juda la warwara taum sur lar alaulau iau, pa kilang a mamahat onoi. Ika, a titol ot tetek a Leklek, a anatarna pas iau pa lurus matak i punga.

²⁰ Ning a warawai pa asaer mulo, na matana tarai pa ting na numulo na rumai, bel a matmataut pa bel a bunur ta utna ning ir nangan mulo.

²¹ A warawai tetek a taraila rop, a tarai Juda pa tarai masik otleng, sur lar lingir a nuknukinla tetek e God pa lar tortorot ana nundala Leklek e Iesu.

²² “Pa onone a Talngan Tabu i angongos iau sur ar han usaot e Jerusalem, pa bel a tasman asaning ar pasteki tisaot.

²³ A tasmani ka mang ting na hananuala rop, a Talngan Tabu i atai iau mang a karabus pa mamahatla la kes pas iau.

²⁴ Ika bel a nuk pas anuk a lalaun, pa bel a maris alari. A saran tari ka sur ar tolsot pas anuk a tinan pa titol, ning a Leklek e Iesu i saran tari tak, sur ar warwara talapor ana Wakak a Warwara ana marmaris ane God.

²⁵ “A tasmani mang mulo rop, ning a han taltal tetek mulo ana warawai ana matanitu ane God, bel ma mulor oroi ulak a matak.

²⁶ Pa onone ar atai talapor mulo, ning ta halimulo ir hirua ana warkurai ane God, a sulukna bel ir tiu iau, ia ka langolango.

²⁷ Anasa, bel a matmataut pa bel a bunur ta utna ting na nuknuk e God, ning a warawai tetek mulo.

²⁸ “Mulor tai alar wakak mulo ot, pa kunum a sipsip otleng ning a Talngan Tabu i saran tari tamulo sur mulor tai alar la. Mulor tai alar a tarai a lotu ane God, ning ka lou pas la ana sulukna ot.

²⁹ A tasmani mang, ning ar han kusun mulo, al tarai lar arlar ana ngalngaliah na papla, lar kas tetek mulo, pa lar alaulau a kunum a sipsipla.

³⁰ Pa al tarai otleng omulo lar turot, pa lar lingir a momolna, sur a tarai a lotu lar mur la.

³¹ Mulor tumarang mulo! Pa mulor nuk pas natol a rau ning a kes taum omulo. Bel a manah ana warwara na atumarang tetek mulo, ana

20:23: 20:23 Aposel 9:16; 21:11 **20:24:** 20:24 Aposel 21:13; 2 Timoti 4:7 **20:28:** 20:28 1 Timoti 4:16; 1 Pita 5:2-4 **20:29:** 20:29 Matiu 7:15; Jon 10:12 **20:31:** 20:31 1 Tesalonika 2:11

moromla pa kabakiarla, pa lurus matak i punga omulo.

³² “Onone a saran tar mulo tetek e God sur ir tai alar mulo, pa saran tar mulo ana nuna warwara ning i apuasa anuna marmaris. A warwara ning i tolsot sur ir arakrakai mulo, pa ir tabar mulo ana wakak a artabarla ning e God i sira tabar anuna totoh a tarai onoi.

³³ A nuknukik bel i ram sur ta mani pa ta kaen anuna tik.

³⁴ Mulo ot mulo tasmani mang a titol ot ana naur a kuk sur a ututnala ning i to pas iau, pa la otleng ning mila armuri.

³⁵ Iau ot a pas nigon mulo ana rakrakai a titol sur mulo otleng mulor sira toli larning, pa mulor nangan la ning bel al rakrakainla, pa mulor nuk pas a warwara ning a Leklek e Iesu ka atong tari mange, ‘La ning la artabar la angis tanla ning la kibas a utna.’ ”

³⁶ Ning ka atong arop tar a warwara ne, e Pol taum ana taraila rop la kes ana bokona hanla, pa la araring.

³⁷ La rop la tangis, pa la pos pas e Pol, pa la goro a ris a pahana.

³⁸ Pa tarai la balmaris kol, anasa ka atai tar la mang bel ma lar tai taum ulak. Pa lamur la tur tulani sur ir kas ana sip.

21

A tinan ane Pol usaot e Jerusalem

¹ Ning mila ka han kusun la, mila kas ana sip sur milar han tostos utumo na lolo Kos. Pa ana pukakiar lamur, mila han utumo na lolo Rodes, mitingia mila han utumo e Patara.

² Pa mila pastek pas ning a sip tingia, ning ir han utumo na papar Ponisia. Mila kas ono, pa mila han.

³ Mila oroi a lolo Saiprus i kes ting na ris a kair imila, mila bolosi. Pa mila han utumo na papar Siria, pa mila sot tumo e Tair, sur a sip ir asirok a ututnala.

⁴ Ning mila pastek pas a tarai a asaer tingia mila kes pas mais a pukakiar taum onla. Pa Talngan Tabu i anuknuk la ana warwara mang, e Pol gong i han usaot e Jerusalem.

⁵ Ika ning ka rop anumila na pukakiar na keskes tingia, mila ulak, pa tarai a asaer rop taum ana nunla na gurara pa na natnatunla la tur tulan mila miting na hanua utumo latasi. Lamur mila tur ana bokona hamila, pa mila araring.

⁶ Ning mila ka artulai tar, mila kas ana sip, pa la, la ulak sur uting na nunla na rumai.

⁷ Mila han mitumo e Tair pa mila sot to e Tolemes, pa mila gas pas la ning la tas ana tortorot, pa mila kes taum onla ning a pukakiar.

⁸ Ana pukakiar lamur, mila han ulak, pa mila hanot to e Sisaria, pa mila kes ting na rumai ane Pilip, a tena warawai ana Wakak a Warwara, i ning a hala mais a barsan, ning a aposella la ka aslang pas la.

⁹ A barsan ne, diat a natna hane, ning bel la taulai pa la sira warwara na propet.

¹⁰ Ning mila ka kes tingia a galis a pukakiar, ning a propet, a risana e Agabus, i hanot misaot na papar Judia.

¹¹ I han tetek mila, i los pas a let ane Pol, pa i dot pas naur a hana pa naur a kuna ot ono, pa i atongi mange, “A Talngan Tabu i atongi mange, a tarai Juda saot e Jerusalem lar dot a barsan ning anuna let ne larotne a toli, pa lar sarani uting na kuna tarai ning bel a tarai Juda.”

¹² Ning mila longor a warwara ne, mila taum ana tarai miting na hanua ning, mila sairasi e Pol sur gong i han usaot e Jerusalem.

¹³ Ika e Pol i keles la mange, “Sur asaning mulo domos, pa mulo abalmaris iau? Ia ka saran tar iau sur lar dot iau pa dir umkol iau otleng saot e Jerusalem, anasa ana risana Leklek e Iesu.”

¹⁴ Ning mila tol panai sur milar sairasi, mila noreni kama, pa mila atongi mange, “I wakak ning dir tolsot pas a nuknuk a Leklek.”

¹⁵ Pa lamur, mila sang pas, pa mila han usaot e Jerusalem.

¹⁶ Mila armuri taum ana tarai a asaer mitumo e Sisaria. La tulan tar mila tetek ning a barsan, a risana e Nason, a te Saiprus, sur milar kes napirna. I ning a hala tarai a asaer tagun nating.

E Pol i hanot saot e Jerusalem

21:10: 21:10 Aposel 11:28

21:11: 21:11 Aposel 20:23; 21:33

21:13: 21:13 Aposel 20:24

17 Ning mila hanot saot e Jerusalem, na tastasimila ana tortorot la ben pas mila ana gasgas.

18 Ana pukakiar lamur, mila ma e Pol, mila han sur milar oroi e Jems. Pa ningnigola rop miting na lotu la kaning ma.

19 Ning e Pol ka warwara na gasgas pas la, i atai la ana taktakai utna ning ka tol tari ana rakrakai e God ana nuna titol tetek la ning bel a tarai Juda.

20 Ning la longori, la rakan aleklek pas e God. La atai e Pol mange, “Tasimila, u tasmani mang a galis a rip ondala a tarai Juda, la ka tortorot, pa la rop la rakrakai sur lar mur a Warkuraila ane Moses.

21 La ka longor a اساسongo na warwara hom, mang u asaer a tarai Juda rop ning la kes napir a tarai ning bel a tarai Juda, sur lar suah sen a Warkuraila ane Moses, pa u atai la otleng mang gong la kot talilis a natnatunla, pa gong la mur a toltolla ana lotu Juda.

22 Lar longori ot mang u ka hanot ute. Pa asa ma dalar toli?

23 Ur tol a utna ne mila atai u ono: Diat a barsan omila, la ka lele tar tetek e God.

24 Ur ben pas la, pa mulor atotoh pas mulo arlar ana warwara na warkurai, pa u, ur lou a ututnala na artabar ning lar artabar ono, sur dir bot kokor arop a hihinla. Ning ur toli larne, a taraila rop lar tasmani mang a warwarala ning la longori, bel i momol, pa u otleng u mur ot a

warkurai.

²⁵ Pa tetek a tena tortorotla miting onla ning bel a tarai Juda, dala ka tumtumus tar tetek la mange: Gong la ien ta utna ning di artabar ono tetek a asasongo na godla. Gong la ien ta utna ning bel di gos wakak sen a suluk kusuni, pa ta inagoi ning di pos koli ka, anasa a suluk kaning ot ono. Pa gong la tol a pamuk a toltol.”

²⁶ Ana pukakiar lamur, e Pol i ben pas diat a barsan ning, pa la taum la atotoh la. E Pol i kas uting na rumai artabar, sur ir atong tar a pukakiar ning a titol na atotoh ir rop ono, pa dir tun otleng a artabar anunla taktakai.

Di tong akes pas e Pol ting na rumai artabar

²⁷ Ning a mais a pukakiar na atotoh milau ir rarop, dingla na tarai Juda mitumo na papar Esia, la oroi e Pol ting na rumai artabar. Pa la angangas a tarai sur lar balakut e Pol pa la tong akesi.

²⁸ Pa la warwara kol mange, “A tarai Israel, mulor nangan mila. A barsan ne, i asaer a taraila rop te na rakrakan hanua sur lar nget dala, pa Warkuraila ane Moses, pa rumai artabar. Pa ka ben kas pas otleng a te Grikla ute na rumai artabar pa ka adur tar a rumai ning e God i atotoh tari sur anunai. ”

²⁹ La atongi larne anasa nating, la ka oroi tar diau ma e Tropimus, a te Epeses, tumo na hanua, pa la nuki mang e Pol i ben kas pasi uting na rumai artabar.

³⁰ A taraila rop la arlak pa la dun taum, la tong akes pas e Pol, pa la dat purum pasi kusun a rumai artabar, pa la tagar kapit a tamanla.

³¹ Ning la mang sur lar umkoli, a warwara i kibas a tnan ningnigo anuna tarai a harum mitumo e Rom, mang a tarai Jerusalem rop la arlak pa la tol a tnan mamahat.

³² I ben taum kapit pas a tarai a harum pa nunla ningnigola, pa la dun purum tetek la. Ning a tarai la oroi a tnan ningnigo pa tarai a harum, la manah ana um e Pol.

³³ A tnan ningnigo i han tetek e Pol, pa i tong akes pasi, pa i arsune sur dir dot akesi ana naur a sen. Pa i deken la mange, “Esi na barsan ne? Asaning i tol rongon tari?”

³⁴ Dingla na tarai miting na kunum, la atong ning a warwara, pa dingla otleng la atong ning a warwara masik. A tnan ningnigo bel i kibas sot pas a momolna, anasa ana tnan arlak, pa i arsune sur dir ben e Pol uting na rumai anuna tarai a harum.

³⁵ Ning e Pol i hanot ting na leta na rumai, a tarai a harum la losi, anasa a kunum a tarai la ngalngaliah kol.

³⁶ Pa kunum a tarai ning la mur la, bel la manah na arkabah mange, “Sai koli!”

E Pol i awara a taraila

³⁷ Ning la mang sur lar kas taum oe Pol uting na rumai anuna tarai a harum, i deken a tnan ningnigo mange, “I wakak ka ning ar atong ta utna tam?” Pa tnan ningnigo i dekeni mang, “Ai, u tasman ot a warwara Grik?”

³⁸ A nuki mang u a te Ijip, esaning nating i akamtur a harum taum ana matanitu, pa i ben diat a rip a tena tol arlak usaot na hanua bel.”

³⁹ Pa e Pol i kelesi mange, “Tau a te Juda mitumo e Taso, ting na papar Silisia, iau bel miting na ta hanua oros ka. Lak, ur malmaling sen iau, sur ar awara a taraila ne.”

⁴⁰ Ning a tnan ningnigo ka malmaling tar e Pol, i tur ting na leta na rumai, pa i sairas la ana kuna. Ning la tur longoroi, i atai la ana warwara Hibru mange,

22

¹ “Na tastasik, pa na tamtamang mulor longor a warwara ning ar atalapor iau ono.”

² Ning la longori ning i warwara ana warwara Hibru tetek la, la rop la tur longoroi. Pa i atongi mange,

³ “Iau a te Juda, di agon iau tumo e Taso ting na papar Silisia. A barman tar ot te e Jerusalem, pa iau a kaklik a asaer ot ane Gamaliel, pa i asaer wakak iau ana Warkuraila anuna tumtubundala, pa titol rakrakai tetek e God larotne mulo toli.

⁴ Pa alaulau a tarai ning la mur a Ngas ane Karisito. A umkol dingla na tarai, pa dat pas dingla na tarai pa dingla na gurara otleng, pa akas la uting na karabus.

⁵ A ningnigo na tena artabar tetek e God pa tarai a kiwung rop la talapor ana utna ne sur lar warwara talapor ono, pa los pas a bukla kusun

la ning la tumusi tetek na tastasinla a te Judala tumo e Demaskas. Manglarning ia ka han pas uto, sur ar tong akes pas a taraila, pa ar dot akes la, pa ar ben la, sur dir alaulau la saot e Jerusalem.

*E Pol i warwara talapor ona pukakiar ning i lingir a nuknukna
(Aposel 9:1-19; 26:12-18)*

⁶ “Ning a han milau e Demaskas, ana tnan kamis, a tnan talapor misaot na langit i hanot kulkulan pa i pil talilis pas iau.

⁷ A punga purum ting lapiu, pa a longor a elngena mainla i atai iau mange, ‘Sol, Sol, sur asa u alaulau iau?’

⁸ Pa dekeni mange, ‘Leklek, esi u?’ Pa i keles iau mange, ‘Tau e Iesu, a te Nasaret, ning u alaulau iau.’

⁹ Pa tarai ning mila armuri, la oroi a talapor, ika bel la longor a elngena mainla ning i warwara tetek iau.

¹⁰ Pa dekeni, ‘Leklek, asaning ar toli?’ Pa Leklek i keles iau mange, ‘Ur tur pa ur han utumo e Demaskas, pa dir atai u ana ututnala ning di ka aslang tari sur ur toli.’

¹¹ La ning mila armuri la tong benben otnan iau utumo e Demaskas, anasa a matak i kut ana rakrakai a talapor.

¹² “Ning a barsan, a risana e Ananias, a tena lotu momol ning i sira mur asot a Warkuraila, pa tarai Juda rop ning la kes tingia, la hanrawai koli. I hanot tetek iau,

¹³ pa i tur milau iau, i atongi mange, ‘Sol, a tasiklik, ur tai ulak.’ Pa ono otning, a matak i tapalas pa a oroi e Ananias.

¹⁴ Pa e Ananias i atai iau mange, ‘E God anuna tumtubundala nating ka aslang tar u, sur ur tasman a nuknukna, pa ur oroi a Tena Tostos, pa ur longor anuna warwara miting na pahana.

¹⁵ Pa ur tena warwara talapor anunai tetek a taraila rop ana ututnala ne ning u ka oroi tari pa u ka longor tari.

¹⁶ U kes pas asa? Ur tur, pa dir baptais u, pa ur araring ana risana, sur dir kepsen anum na toltol laulau.’

A arkabah tetek e Pol sur ir warawai tetek a tarai ning bel a tarai Juda

¹⁷⁻¹⁸ “Ning a ulak usaot e Jerusalem, pa araring ting na rumai artabar, a oroi a Leklek ana tatatai, i atai iau mange, ‘Tur kapit! Ur han kapit mite e Jerusalem, anasa bel lar kibas anum a warwara talapor hok.’

¹⁹ Pa kelesi mange, ‘Leklek, la tasmani mang a sira kas uting na rumai lotula rop, pa akas la ning la tortorot hom uting na karabus, pa dapis la.

²⁰ Pa ning di umkol e Stiwen, esaning i warwara talapor hom, iau otleng a tur tingia, a malmaling taum onla, pa tai alar a kaenla anunla ning la umkoli.’

²¹ Pa Leklek i atai iau mange, ‘Ur han, ar sune bakkak u tetek a tarai ning bel a tarai Juda.’ ”

²² A tarai la longor a warwara ane Pol tuk ot ana warwara ne. Lamur la kukuk ana tnan elngenla mange, “A barsan ne ir rarop mite na rakrakan hanua, bel i tostos sur ir laun.”

²³ Ning la kukuk larne, la kepsen anunla na kaen ning la polpol alar anunla na mermer ono, pa la migen sarara a kubus usaot.

²⁴ Pa tnan ningnigo i arsune sur dir ben e Pol uting na rumai anuna tena harumla, pa dir dapisi pa dir dekeni sur dir tasman asa a kamkamna ning a tarai la kukuk larne ono.

²⁵ Ning la dot tari taum ana senla, sur lar dapisi, e Pol i atai a ningnigo anuna tena harumla ning i tur milau mang, “Mangasa, i tostos ka ning mulor dapis ta te Rom, ning belot di warkurai i?”

²⁶ Ning a ningnigo anuna tarai a harum i longori, i han tetek anuna ningnigo, pa i atai i mange, “Asaning u mang sur ur toli? A barsan ne a te Rom.”

²⁷ A tnan ningnigo i han tetek e Pol pa i dekeni mange, “Atai iau. U a te Rom?” Pa i kelesi mange, “Momol. Iau a te Rom.”

²⁸ Pa tnan ningnigo i atai i mange, “Iau a arlou ana tnan mani sur ar hanot a te Rom.” Pa e Pol i kelesi mange, “Ika iau, di agon iau ot a te Rom.”

²⁹ Pa la ning la mang sur lar dekeni, la tur sarara kapit kusuni. Ning a tnan ningnigo i tasmani mang e Pol a te Rom, i matmataut, anasa ka dot tari ana sen.

E Pol i tur na matana tarai a kiwung

³⁰ Ana pukakiar lamur, ning a tnan ningnigo i mang sur ir tasman wakak asaning a tarai Juda la tiu e Pol onoi, i pak sen a sen, pa i arsune sur a leklek a tena artabarla tetek e God, pa tarai a kiwung rop sur lar han taum. Pa i ben purum pas e Pol, pa i aturi na matanla.

23

¹ E Pol i tai tostos sur a tarai a kiwung, pa i atai la mange, “Na tastasik, anuk a lalaun ka tostos na matana e God, pa balak bel i tiu iau ana ta utna.”

² Pa e Ananias a ningnigo na tena artabar tetek e God, i sune la ning la tur milau e Pol sur lar pasar a pahana.

³ Pa e Pol i atai i mange, “E God ir pasar u, u arlar ana ris a rumai ning di sabar tari ana kokok, ika tingui i laulau kol. U kes sur ur warkurai iau arlar ana Warkuraila, ika u kutus a Warkuraila ning u arsune sur dir pasar iau.”

⁴ La ning la tur milau i la atongi mange, “Mangasa, u asa u, sur ur atong laulau a ningnigo na tena artabar tetek e God?”

⁵ E Pol i keles la mange, “Na tastasik, bel a tasmani mang ai a ningnigo na tena artabar tetek e God. Ning ar tasmani, bel ar toli larning, anasa di ka tumus tari ting na Buk Tabu mange, ‘Gong u atong laulau ta ningnigo ana num a taraila.’ ” *Kisim Bek 22:28*

⁶ Ning e Pol i tasmani mang dingla na tarai tagun la, a Sadusila, pa dingla otleng a

Parisaiola, i kukuk ting na kiwung mange, “Na tastasik, iau a Parisaio, pa nat a Parisaio, onone di tiu iau kamna ana nuk a tortorot ana lalaun ulak kusun a minat.”

⁷ Ning ka atong tari larning, a Parisaiola pa Sadusila la turpas a arlak, pa kiwung i taptapagal.

⁸ Anasa a Sadusila bel la tortorot ana lalaun ulak kusun a minat, pa angelola, pa motla, ika a Parisaiola la tortorot onditol rop.

⁹ Pa la turpas a tnan arbalakut, pa dingla na Parisaio, la ning a tena asaerla tagun a warkurai, la tur, pa la arlak kol, pa la atongi mange, “Bel mila pastek ta laulau a utna ning a barsan ne i rongo ono. Sakana ta mot, o ta angelo kar awarwara tari.”

¹⁰ Ning a arlak ka itna pa la turpas a harum, a tnan ningnigo anuna tena harumla i matmataut, sakana lar dat kakahal e Pol. I sune a tarai a harum, sur lar han pa lar dat pasi kusun a taraila, pa lar beni usaot na rumai anuna tarai a harum.

¹¹ Ana morom ning, a Leklek i hanot tetek e Pol, pa i atai i mange, “Gong u matmataut, ur tur rakrakai. U ka warwara talapor tar hok te e Jerusalem, mangotleng larning ur warwara talapor hok tumo e Rom.”

La pinpidaiwol sur lar umkol e Pol

¹²⁻¹³ Ana kabakiar kobot ulak, dingla na te Judala, i arlar ona diat a bonot pa i apapisir, ning la warwara taum sur lar lele, mang bel lar

hangan, pa bel lar gang, tuk ot ning lar umkol tar e Pol.

¹⁴ La han tetek a lekkek a tena artabarla tetek e God, pa ningnigola miting na lotu, pa la atongi mange, “Mila ka lele tar mang bel milar ien ta utna tuk ot ning milar umkol tar e Pol.

¹⁵ Mila mang sur mulo pa tarai a kiwung, mulor saran a warwara tetek a tnan ningnigo anuna tena harumla pa mulor asongo pas e Pol kusuni, sur ir sune i tetek mulo. Mulor atongi mang mulo mang sur mulor longor ta warwara talapor ulak tana. Pa mila ka sang sur milar umkoli ting na ngas ning belot ir hanot tetek mulo.”

¹⁶ Ning a etna ane Pol i longor a pinpidaiwol ne, i han uting na rumai anuna tena harumla, pa i atai e Pol ono.

¹⁷ Pa e Pol i kabah pas ning a ningnigo ana tena harumla, pa i atai i mange, “Ur ben a barman ne tetek anumulo a tnan ningnigo, anasa i mang sur ir atai i ana ning a warwara.”

¹⁸ Pa i beni tetek a tnan ningnigo, pa i atai i mange, “E Pol, ning i karabus, i arsune sur iau, pa i nunung iau sur ar ben tar a barman ne tetek u, anasa i mang sur ir atai u ana ning a warwara.”

¹⁹ A tnan ningnigo i tong pas a kuna pa i ben masik pasi, pa i dekeni mange, “Asaning u mang ur atai iau ono?”

²⁰ Pa i atongi mange, “A tarai Juda la ka pinpidaiwol pas sur lar asongo pas e Pol kusun u, sur ur tulani latu tetek a tarai a kiwung, sur

lar longor ta warwara talapor ulak tana.

²¹ Gong u longor tanla, anasa diat a bonot pa i apapisir, la mumun suri. La ka lele tar mang, bel lar hangan pa bel lar gang, tuk ot ning lar umkol tar e Pol. Pa la harnanai kama sur ur malmaling.”

²² Pa tnan ningnigo i atumarangi mang, “Gong u atai tar tik mang u ka atai tar iau ana utna ne.” Pa lamur i sune seni.

Di ben pas e Pol tetek e Feliks

²³ A tnan ningnigo anuna tena harumla, i kabah pas naur a ningnigo teteki pa i atai diau mange, “Mur sang naur a mar a tena harum, pa mais a bonot a tena harum ning la kas ana hosla, pa naur a mar a tena harum ning la los a turaila, pa mulor han ana 9 kilok onone na morom uto e Sisaria.

²⁴ Mur ben ir naur a hos, sur e Pol ir han ono. Mulor tai alar wakaki tuk mulor hanot onoi tetek e Feliks, a tnan ningnigo ana matanitu.”

²⁵ Pa i tumus a pas teteki mange:

²⁶ Iau e Klodius Lisia, a tumtumus tetek u Feliks, a tnan ningnigo ana matanitu.

A marmaris tetek u.

²⁷ A barsan ne a sune i tetek u, a tarai Juda la tong akes pasi, pa milau lar umkoli. Ika mila ma na tena harum, mila hanot, pa mila alaun pasi, anasa ia ka tasman tari mang ai a te Rom.

²⁸ Pa mang sur ar tasman asaning di tiwi ono, pa ben tari uting na nunla kiwung.

²⁹ Onone a talapor onoi mang di tiu orosi ka ana toltol ana warkuraila miting na nunla na lotu, ika bel i tol ta laulau a utna sur ir karabus ono, pa dir umkoli ono.

³⁰ Ning di atai iau ana pinpidaiwol sur a barsan ne mang lar umkoli, a sune kapiti tetek u. Pa atai la ning la tiwi, sur lar atalapor anunla na artitiu tetek u. Ai ka i ning. Ka rop.

³¹ Pa tarai a harum la ben pas e Pol ana morom uto e Antipatris, larning di atai tar la.

³² Ana pukakiar lamur, a tarai a harum ning la kas ana hosla, la bolos taum oe Pol, pa tarai a harum otleng la ulak usaot e Jerusalem.

³³ Ning la hanot ting e Sisaria, la saran tar a pas tetek e Feliks, a tnan ningnigo miting na matanitu, pa la saran tar e Pol uting na kuna.

³⁴ Ning e Feliks ka was tar a pas, i deken e Pol mange, “U miting na si na papar?” Pa ning ka tasman tari mang e Pol a te Silisia,

³⁵ i atai i mange, “Ning a tarai a artitiu lar hanot ute, ar longor a utna ning lar tiu u ono.” Pa i arsune sur dir tai alari ting na rumai ane Herot.

24

A tarai Juda la tiu e Pol

¹ Dilima na pukakiar lamur, e Ananias, a ningnigo na tena artabar tetek e God pa dingla na ningnigola miting na lotu, pa e Tertulus, a tena tastasmai ana Warkuraila, la hanot tumo e Sisaria, pa la atalapor anunla a warwara na

artitiu oe Pol tetek e Feliks a tnan ningnigo ana matanitu.

² Ning di ka kabah pas e Pol, e Tertulus i turpas a warwara teteki mange,

“Feliks, u lekkek kol. Mila kes bongnan mila ana balmolmol nahai a warkurai anumi. A galis a utna i hanot ting na nundala papar anasa anum a tai alar i wakak kol.

³ Mila taum ana tarai miting na hananuala rop, mila gas ana num a warkuraila pa mila atong wakak kol tetek u ono.

⁴ Pa bel ar angoro u anal warwara. A nunung u sur ur maris mila pa ur longor anumila al siklik warwara.

⁵ “Mila oroi a barsan ne a tena tol arsakai, pa i akamtur a arsakai na arpotor a tarai Juda te na rakrakan hanua rop. Pa ai a ningnigo ana asasongo na lotu di atongi mang a lotu Nasaret.

⁶⁻⁸ Pa i mang sur ir tol adur a rumai artabar sur ir dur na matana e God. Ika mila tong akes pasi.* Ning u ot ur dekeni, ur tasman a momolna ana saning mila tiwi ono.”

⁹ Ning e Tertulus ka warwara rop, dingla na tarai Juda otleng la arnangai ana artitiu, la atongi mang i momol ot a artitiula ne.

24:5: **24:5** Aposel 17:6 **24:6-8:** **24:6-8** Aposel 21:28-30

* **24:6-8:** **24:6-8** Dingla na tena tastasmai ana Buk Tabu la nuki mang dingla na warwara otleng i kes te na vesla ne. I manglarne: *Pa mila nuki mang milar warkurai i arlar ana numila na warkurai. Ika e Lisia, a tnan ningnigo anuna tena harumla, i kas pa i dat maskan pasi kusun a kumila ana rakrakai. Pa i arsune mang mila ning mila tiu a barsan ne, milar han tetek u pa milar tur na matam.*

E Pol i warwara talapor na matana e Feliks

¹⁰ Ning e Feliks, a tnan ningnigo ana matanitu, i amaler a pukulna tetek e Pol sur ir warwara, e Pol i atai i mange, “A gas ning ar atalapor iau kusun u, anasa a tasmani mang u ka warkurai a galis a rau sur a papar ne.

¹¹ Ning ur deke, ur tasmani mang ning a bonot pa pisir naur a pukakiar alar tari ka, a hanot saot e Jerusalem, sur ar lotu.

¹² Pa bel la oroi tar tik ning mia arlak taum ting na rumai artabar, pa bel la oroi tar iau otleng mang a akamtur ta arsakai ting na rumai lotula, pa ting na tinine hanua.

¹³ Pa bel lar amomol sot pas anunla na artituu tetek u ana saning la tiu iau ono.

¹⁴ “Ar atai talapor u mang, iau a mur a Ngas ane Karisito, ning la atongi ana asasongo na lotu. Ika ana lotu ne, a lotu ot tetek a God anuna tumtubumila tagun nating, pa tortorot ana ututnala rop ning di ka tumus tari ting na Warkuraila pa ting na bukla anuna propetla.

¹⁵ Anuk a tortorot oe God i arlar ana tarai ne. Iau otleng a harnanai ana tortorot mang e God ir akamtur ulak pas a wakak a tarai pa laulau a tarai kusun a minat.

¹⁶ Ine a kamkamna ning a sira rakrakai sur anuk a lalaun ir kes talapor na matana e God, pa na matana taraila otleng.

¹⁷ “A galis a rau bel a kes saot e Jerusalem, pa lamur a ulak usaot sur ar abaran a mani na artabar tetek a kapan a taraila, pa ar saran

otleng a artabarla ning dir tuni sur a artabar tetek e God.

¹⁸ Lanigo ning belot a kas uting na woroh na rumai artabar ia ka tol arop tar a warkuraila sur ar totoh na matana e God. Ning a kas sur ar tol a titol a artabar, bel la pastetek iau taum ana galis a tarai, pa bel a arsakai taum ana tik.

¹⁹ Ika dingla na tarai Juda mitumo na papar Esia la kes tingia ana pukakiar ning la tong akes pas iau. Ning ta utna lar tiu iau ono, i wakak sur la ot lar han ute pa lar tiu iau na matam.

²⁰ Pa i wakak sur la ning kane, lar warwara talapor anal laulau a utna ning la pasteteki hok, ning a tur na matana tarai a kiwung saot e Jerusalem.

²¹ Ngandek la tiu iau ana ning a warwara ka. Ning a tur na matanla, a warwara kol mange, ‘A tur ana warkurai na matamulo onone, anasa a tortorot ana lalaun ulak kusun a minat.’ ”

²² E Feliks i talapor wakak ot ana lotu ning di atongi a Ngas ane Karisito, pa i amanah tar kaba a warkurai, pa i atongi mange, “Ning e Lisia, a tnan ningnigo anuna tarai a harum ir hanot, ar bot suah ta warkurai a artitieu ne.”

²³ Pa i atai a ningnigo anuna tena harumla mange, “E Pol ir kes na karabus ana num a warkurai. Ur noreni, pa gong u sairas na halalnala ning lar nangani.”

E Pol i warwara tetek e Feliks pa e Darusila

²⁴ Dingla na pukakiar lamur, e Feliks i hanot ulak taum ana nuna hane e Darusila, a hane

Juda. I arsune sur e Pol, pa i longor anuna warwara ana tortorot oe Karisito Iesu.

²⁵ Ning e Pol i warwara ana tostos a toltol, pa a toltol ning tik ir warkurai tostos pas anuna lalaun, pa pukakiar a warkurai ning ir hanot, e Feliks i matmataut, pa i atongi mange, “Pol, ur han kaba. Ning ar langolango, ar arsune ulak sur u.”

²⁶ Pa i mang otleng sur e Pol ir bing kuna on ta mani, sur ir pak seni. Pa i tikai arsune ot suri, pa dia warwara taum.

²⁷ Ning naur a rau ka rop, e Porsius Festus i keles e Feliks. Ika e Feliks belot i pak sen e Pol, anasa i mang sur ir agasgas a tarai Juda.

25

E Pol i tur na matana e Festus

¹ Ning ka natol a pukakiar alar a tinan ot ane Festus ting na hanua Sisaria ting na papar ning ir warkurai i, i han usaot e Jerusalem.

² Pa leklek a tena artabarla tetek e God pa ningnigola anuna tarai Juda, la hanot teteki pa la warwara na artituu oe Pol.

³ Pa la nunung e Festus sur ir longor tanla, pa la atai i mange, “Ur maris mila pa ur sune e Pol ute e Jerusalem.” Anasa la ka pinpidaiwol pas sur lar umkoli na arpotor ana nuna tinan.

⁴ Pa e Festus i keles la mange, “E Pol i karabus ot tumo e Sisaria, pa iau otleng ka milau sur ar ulak utumo.

⁵ I wakak ning al ningnigo omulo lar han taum hok utumo, pa ning ta utna a barsan ne i rongo ono, mulor tiwi ono tumo.”

⁶ Ning e Festus ka kes taum pas onla ngandek siwal o ning a bonot a pukakiar, i ulak utumo e Sisaria. Pa ana pukakiar lamur tana, i turpas a warkurai, pa i arsune sur dir ben e Pol teteki.

⁷ Ning e Pol i hanot, a tarai Juda misaot e Jerusalem la tur talilis pasi, pa la tiwi ana galis a rakrakai a warwara na artitui, ika bel la atong pas ta utna ning ir amomol tari.

⁸ Pa e Pol i atalaporu mange, “Bel a tol ta rongo ana warkurai anuna tarai Juda, pa ana rumai artabar, pa tetek a Sisar.”

⁹ E Festus i mang sur ir agasgas pas a tarai Juda, pa i deken e Pol mange, “Mangasa, ur malmaling ka sur ur han usaot e Jerusalem, sur ar warkurai u ana artitui ne tisaot?”

¹⁰ Pa e Pol i kelesi mange, “Onone a tur ana warkurai ana Sisar, pa i tostos ning dir warkurai iau ot te. Bel a tol ta rongo tetek a tarai Juda, pa u otleng u tasmani.

¹¹ Ning ia ka tol ta laulauna ning i arlar sur ar hirua ono, i wakak ka ning ar hirua. Ika ning a warwara na artitui ne la tiu iau onoi bel i momol, bel i tostos sur tik ir saran tar iau tetek la. A nunung sur a Sisar ot ir longor a warkurai hok.”

¹² Ning e Festus ka warwara taum tar ana nuna tena arnangai na warwara, i atongi mang, “U ka nunung sur ur han tetek a Sisar, par sune sen u uto e Rom tetek a Sisar.”

E Agripa pa e Bernaisi dia mang sur diar longor e Pol

¹³ Dingla na pukakiar lamur, King Agripa ditas ma e Bernaisi a hane, dia hanot tumo e Sisaria, sur diar saran a hanrawai tetek e Festus ana nuna keskes na ningnigo.

¹⁴ Ning dia ka kes a galis a pukakiar tingia, e Festus i atai a king oe Pol, pa i atongi mange, “E Feliks ka manah kusun anuna titol, ika i noren tar ning a barsan kanet na karabus.

¹⁵ Pa ning a han usaot e Jerusalem, a leklek na tena artabar tetek e God pa ningnigola anuna tarai Juda la atai iau ana warwara na artituu onoi, pa la nunung iau sur ar warkurai i sur dir umkoli.

¹⁶ Pa a atai la mange, ‘Bel a toltol anuna tarai Rom mang dir saran tar ta barsan sur dir warkurai i sur ir mat, ning belot i tur na matan la ning la tiwi, sur ir atalaporu ana nunla na artitiula.’

¹⁷ “Ning mila hanot taum te, bel a harnanai sur ar longor a warkurai. A pukakiar lamur ka tana, a tol a warkurai, pa arsune sur dir ben pas a barsan ning.

¹⁸ Ning a tarai a artituu la tur sur lar warwara, bel la tiwi ana ta laulau a utna larning a nuki.

¹⁹ Ika la tiwi ana ututnala ana lotu anunla, pa ana ning a barsan ning ka mat, a risana e Iesu, ning e Pol i atongi mang ka laun ulak.

²⁰ Bel a tasmani mang ar tikin mangmangasa a ututnala ne. A nunungi sur ir han usaot e

Jerusalem pa dir warkurai i ana warwara na artitiu tisaot.

²¹ Ika, ning e Pol i nunung sur a Sisar ir warkurai i, a arsune sur ir kes kaba ting na karabus, tuk ning ar tulani utumo e Rom tetek a Sisar.”

²² Lamur e Agripa i atai e Festus mange, “Iau ot, a mang sur ar longor a barsan ne.” E Festus i kelesi mange, “Latu ur longori.”

²³ Ana pukakiar lamur, e Agripa pa e Bernaisi dia hanot pa di amermer diau ana urmatana minmar anuna leklek a tarai. Pa diau taum ana ningnigola anuna tarai a harum, pa dingla na ningnigola miting na hanua ning, la kas uting na rumai a kiwung. E Festus i arsune sur e Pol, pa di ben pasi.

²⁴ Pa e Festus i atongi mange, “King Agripa, pa mulo otleng a tarai ning dala keskes taum te, mulo oroi a barsan ne. A tarai Juda rop saot e Jerusalem pa te Sisaria otleng, la nunung iau sur ar warkurai i, pa la kukuk mang bel ma i tostos sur ir laun.

²⁵ Ika bel a pastek pas ta utna ning dir umkoli ono. Pa ning i nunung sur a Sisar ir warkurai i, a nuki mang ar sune i utumo e Rom.

²⁶ Bel a tasman ta momolna ning ar tumus akesi onoi tetek a Sisar. I maining a ben otnani tetek mulo rop pa tetek u, King Agripa, sur dalar deken tari sur ar tasman asaning ar tumusi.

²⁷ Anasa a nuki mang bel i sot sur ar sune tik ning i karabus tetek a Sisar, pa bel di tumus akes asaning di tiwi ono.”

26

E Pol i warwara talapor na matana King Agripa

¹ E Agripa i atai e Pol mange, “A malmaling sur u ot ur warwara talapor hom.” Pa e Pol i kodos kas a kuna pa i turpasi sur ir atalapor i mange,

² “King Agripa, a angis kol sur ar tur te lanigo tam, par atalapor iau ana ututnala rop ning a tarai Juda la tiu iau onoi.

³ Anasa u tasman wakak a toltol anuna tarai Juda pa utna otleng ning la arlak ono. Mang larning, a nunung u sur ur kes longoroi pa ur longor iau.

⁴ “A tarai Juda rop la tasman anuk a ngas a lalaun turpasi ot ning a kaklik, ting na nuk a hanua, pa saot otleng e Jerusalem.

⁵ La tasman iau tagun nating, ning la mang, lar warwara talapor mang a mur ot a toltolla anuna Parisaiola. Mila ning a kunum miting na tarai Juda ning mila mur sot pas a Warkuraila ana numila lotu.

⁶ Pa onone a tur ana warkurai anasa a tortorot ana lele ning e God ka tol tari tetek na tumtubumila tagun nating.

⁷ Anumila ning a bonot pa pisir naur a mangis a tarai la harnanai ana tortorot sur dir tolsot pas a lele ning tetek la, pa la lotlotu tetek e God ana kabakiarla pa ana moromla rop. King, a tarai Juda la tiu iau, anasa a tortorot ana lele ning.

⁸ Sur asaning tik ta halimulo i nuki mang e God bel i tolsot sur ir akamtur ulak a minatla?

⁹ “Iau otleng, nating a nuki mang i wakak ning ar toh arop tar a rakrakai a ngasla sur ar sairasa taraila mang gong la tortorot ana risana e Iesu, a te Nasaret.

¹⁰ Pa tol a titolla ne saot e Jerusalem. Ana malmaling anuna leklek a tena artabarla tetek e God, a han pa akas a galis a tena tortorot ting na karabus. Pa ning di umkol la, iau otleng, a malmaling sur lar mat.

¹¹ A galis a taim a kas ting na rumai lotula sur ar alaulau la, pa angongos la sur lar warwara laulau oe Iesu. A sira balakut rakrakai tetek la, pa han otleng ting na dingla na hananuala masik, sur ar tai pas la par alaulau la.

*E Pol i warwara talapor ana pukakiar ning i lingir a nuknukna
(Aposel 9:1-19; 22:6-16)*

¹² “Ona ning a tinan anuki, a han ulak utumo e Demaskas ana malmaling pa arsune anuna leklek a tena artabarla tetek e God.

¹³ King, ning a Kamis i kes tostos, a han ting na ngas pa a oroi a tnan talapor misaot na langit, i tapgar kol tana talapor a Kamis, pa i sasai talilis iau taum onla ning mila armuri.

¹⁴ Mila rop mila punga purum uting lapiu, pa a longor a elngen takai i warwara tetek iau ana warwara Hibru mange, ‘Sol, Sol, sur asa u alaulau iau? U ot u alaulau pas u ana mamahatla ning u toli hok.’

¹⁵ Pa deke mange, ‘Leklek, esi u?’ Pa Leklek i keles iau mange, ‘Tau e Iesu, ning u alaulau iau.’

16 Ur kamtur. A hanot tetek u, anasa a aslang pas u, sur ur tol anuk a titol pa ur warwara talapor ana ututnala, ning u ka oroi tari tak, pa ututnala otleng ning ar asangani tam.

17 Par alaun u kusun anum a tarai, pa tarai otleng ning bel a tarai Juda, la ning ar sune u tetek la.

18 Ur apalpalas a matanla sur lar talingir kusun a mormorom sur a talapor, pa kusun a rakrakai ane Satan tetek e God, sur dir kepsen anunla na toltol laulau, pa lar kes taum onla ning a aslang pas la sur anuk a tostos a tarai, la ning la tortorot hok.'

E Pol i warwara talapor ana nuna titol

19 "King Agripa, bel a longor orsan a tatatai ne misaot na langit.

20 A warawai nigo tumo e Demaskas pa e Jerusalem pa ting na hananuala ting na papar Judia rop, pa lamur tetek la ning bel a tarai Juda, mang lar lingir a nuknukinla, pa lar talingir tetek e God, pa lar tol a titolla, sur ir asangani mang la ka lingir a nuknukinla.

21 Ine a kamkamna ning a tarai Juda la tong akes pas iau ting na woroh na rumai artabar, pa la tohi sur lar umkol iau.

22 Ika, tuk onone, e God i nangan iau pa tur te na matam pa warwara talapor tetek la ning bel al risanla pa la ning la leklek. Bel a atong ta tona utna, a warwara ka ana utna ning e Moses pa propetla la ka warwara tar ono ning ir hanot.

²³ La atongi mang e Karisito ir mat, pa ai a ningnigona ning ir kamtur kusun a minat pa ir warwara ana talapor tetek a tarai Juda pa tarai masak otleng.”

²⁴ Ning kaning ot i atalapori, e Festus i warwara kol teteki mange, “Pol, u talar. Anum a tnan asaer ka atalar pas u.”

²⁵ E Pol i kelesi mange, “Festus, u u leklek, bel a talar. Asaning a warwara onoi i momol, pa kamkamna ot.

²⁶ A king i tasman wakak a ututnala ne, pa langolango sur ar warwara talapor onoi. A tasmani mang bel ta utna i mumun na matana pa ana longlongor anuna i, anasa a ututnala ne i hanot, bel di tol kumnani.

²⁷ King Agripa, mangasa, u tortorot ana warwarala ana propetla? A tasmani mang u tortorot.”

²⁸ E Agripa i deken e Pol mange, “Mangasa, u nuki mang bel ir bongnani ur lingir pas a nuknukik, sur iau otleng ar te Karisito?”

²⁹ E Pol i kelesi mange, “Ning i bongnani o bel i bongnani, ar araring tetek e God sur u. Ika bel sur u ka, sur mulo rop ning mulo longor iau onone, sur mulor arlar hok, ika gong di dot akes mulo.”

³⁰ Pa king i kamtur, taum oe Festus pa e Bernaisi, pa la otleng ning la kes taum.

³¹ Ning la han purum, la warwara pa la atongi mange, “A barsan ne bel i tol ta utna ning i laulau sur ir hirua onoi, pa ir karabus ono.”

³² Pa e Agripa i atai e Festus mange, “Ning a barsan ne bel i nunung sur a Sisar ir warkurai i, i wakak ka sur dir pak seni.”

27

E Pol i kas ana sip utumo e Rom

¹ Ning di ka kubus tari sur milar * kas ana sip utumo na papar Itali, di saran tar e Pol, pa dingla otleng ning la karabus, tetek a ningnigo, a risana e Julius, miting na tarai a harum ana Sisar.

² Mila kas ana ning a sip misaot e Adramitium, ning ir han sur ir sot amon ting na hananuala ting na papar Esia. Ning mila ka kas tar, a sip i dun. Mila armuri taum oe Aristarkus misaot e Tesalonika ting na papar Masedonia.

³ Ana pukakiar lamur mila sot te e Saidon. E Julius i maris e Pol, i malmaling seni sur ir han pas tetek na halalna, sur lar tabari ana saning i kapan suri.

⁴ Ning a sip i dun ulak, mila dun rait a lolo Saiprus, anasa a wuwu i um mila misalanigo.

⁵ Lamur, mila kutus milau naur a papar Silisia pa e Pampilia, pa mila sot tumo e Maira, ting na papar Lisia.

⁶ Tingia, e Julius i pastek ning a sip mitumo e Aleksandria, ning ir han utumo e Itali, pa i akas tar mila onoi.

⁷ Pa galis a pukakiar mila dun wowon ka, anasa i rakrakai kol anumila tinan utumo e Nidus. A wuwu i rakrakai, pa bel mila tolsot sur

* **27:1: 27:1** E Luk i tumus “mila”, anasa i han taum oe Pol.
27:2: 27:2 Aposel 19:29

milan dun tostos, pa milan dun rait a lolo Krit milan e Salmone.

⁸ Milan rarar tumokorot, anasa a wuwu i rakrakai, pa milan hanot ting na ning a pukna, di atongi A Wakak a Mulukun, milan a hanua Lasea.

⁹ Milan ka kes a galis a pukakiar, pa tinan salatasi ka laulau, anasa a Pukakiar na Tamai ka rop pa milan na kalangla na wuwu ir hanot. † Pa e Pol i atumarang la mange,

¹⁰ “A taraila! A oroi mang, ning dalar han ka, a sip ir hirua taum ana ututnala, pa dala otleng dalar hirua.”

¹¹ Ika e Julius bel i longor ana warwara ane Pol, i longor pas ka a warwara anuna kipten pa tamana sip.

¹² A mulukun ning la kes ia, bel i wakak sur lar nanan sen a kalangla na wuwu tingia, pa galis onla, la malmaling mang, i wakak ning lar dun bolos ka utumo e Poniks, sur lar nanan sen a kalangla na wuwu tingia. E Poniks a wakak a mulukun tumo na lolo Krit, ning i tai sur a pukna ning a kamis i sup ia.

A tnan wuwu i hanot

¹³ Ning a wakak a wuwu na tobar i hanot, la nuki mang i wakak ka sur a tinan. La dat kas a aga, pa la rarar amon tumokorot na lolo Krit.

¹⁴ Pa bel i bongnani, a rakrakai a wuwu i hanot, di atongi mang e Urakilon. I harum purum misa na lolo.

† **27:9: 27:9** A kalangla lamur tana Pukakiar na Tamai i sira wuwu tumo.

15 Ning a wuwu i tong kes ana sip, bel i tolsot sur ir dun, pa mila lingir seni sur ir mur a wuwu.

16 Ning mila dun rait ting na natar a lolo Kauda, i rakrakai kol tetek mila sur milar dat kas a gigi.

17 Ning la dat kas pasi usaot, la rau rakrakai a sip ana inaula. La matmataut sakana lar dun tar na palai a puka woio ning i masmasa milau Sirtis, pa la dat purum sen a sel, pa sip i saler kama, a wuwu i wus amoni.

18 A pukakiar lamur, a sip milau ir tarege ana tnan wuwu, pa la migen parung a ututnala.

19 Pa ana pukakiar lamur, a boskurula la migen parung a ututnala miting na sip.

20 Pa galis a pukakiar a Kamis pa nangnangla bel la sasai, pa rakrakai a wuwu bel i manah, pa bel ma mila nuki mang milar laun.

21 A galis a pukakiar bel la hangan. Lamur e Pol i tur na matanla pa i atai la mange, "A taraila! Ning mulo ka longor tar anuk a warwara pa bel dala han mitumo e Krit, bel ta utna larne ir kibas dala, a sip pa ututnala bel ir laulau.

22 Pa onone, a nunung mulo mang, gong mulo matmataut, anasa bel tik ta halimulo ir hirua, a sip ka ir hirua.

23 Nangana morom, ning a angelo ane God i hanot tetek iau, a God ning a titol teteki, pa iau anunai.

24 Pa angelo i atongi mange, 'Pol, gong u matmataut, ur turot ana warkurai na matana Sisar. Pa e God ir alaun la rop ning mulo han taum ting na sip.'

²⁵ Pa tastasikla, gong mulo matmataut, anasa a tortorot oe God mang ir tolsot asaning ka atai tar iau onoi.

²⁶ Ika a sip ir kes ot na palai a masmasa milau ta lolo.”

²⁷ Ana ning a bonot pa pisir diat a pukakiar ana morom, a wuwu kaning ot i wus amon mila ting na tasi Adria. Ana tnan morom, a boskurula la nuki mang mila ka saler milau ta hanua.

²⁸ Pa la toho a laman ana tasi, pa la pasteki mang i diat a bonot a mita. Lamur siklik ka, la toho ulaki, pa la pasteki mang natol a bonot a mita kama.

²⁹ Pa la matmataut sakana milar saler tar ting na ta masmasa, pa la migen purum diat a aga tumo lamur ana sip, pa la araring sur ir kabakiar kapit.

³⁰ A boskurula la mang sur lar liu kumna kusun a sip ana gigi. La alorong purumi uting na tasi, pa la asongo mang lar suah a agala salanigo na sip.

³¹ E Pol i atai e Julius pa nuna tarai a harum mange, “Ning la ne lar liu kusun tar a sip, bel mulor laun.”

³² Pa tena harumla la kutus sen a inaula kusun a gigi, pa i saler masik.

³³ Ana lar, e Pol i atai la rop mange, “Mulor hangan, anasa ka ning a bonot pa pisir diat a pukakiar ning mulo kes taum ana matmataut, pa bel mulo ien ta utna.

³⁴ Pa nunung pas mulo sur mulor hangan, sur mulor laun. Pa bel tik ta halimulo ir hirua.”

³⁵ Ning e Pol i atong tari larne, i los pas a bret, i atong wakak pas ono tetek e God na matanla rop, i kibiki, pa i hangan.

³⁶ Ning la oroi, la rop la gas, pa la otleng la hangan.

³⁷ Mila rop ting na sip, mila arlar ana naur a mar pa mais a bonot pa pisir diono (276) mila.

³⁸ Ning la ka masur, la migen parung a utna na hanganla usa latasi, sur a sip ir halala.

A sip i hirua pa tarai la laun

³⁹ Ning ka kabakiar, la oroi ning a hanua, ika bel la oroi lalani. La oroi pas ning a mulukun a woio tumokorot, pa la atongi mang ngandek i wakak ning lar akes masmasa a sip tingia.

⁴⁰ Lamur la kot sen a agala, pa la dun kusun la tisa latasi, pa ono otning la pak sen otleng a inaula kusun naur a woso na stia, pa la dat pak sen a sel salanigo na sip sur a wuwu ir wus purumi utumo na masmasa.

⁴¹ Ika a sip i kes masmasa na palai a woio, a patar a sip i kes kas tingia, bel i tolsot sur ir susur. Lamur a tatatnan top la dapis pagal a kabala sip pa i tarege.

⁴² Pa tena harumla la mang sur lar umkol a taraila ning la karabus, sakana halala onla, lar iel purum, pa lar liu.

⁴³ Ika e Julius, a ningnigo anuna tena harumla i mang sur ir alaun e Pol, pa i sairas la. Pa i arsune sur la ning la tasman a iel, lar sirok parung, pa lar iel nigo utumo na masmasa.

⁴⁴ Pa la ning bel la tasman a iel, lar saler murmur ana palangla pa ana didiah sip.

Manglarning, la rop la sot purum utumo na masmasa pa la laun.

28

Tumo e Malta

¹ Ning mila ka sot tar tumo na masmasa, mila bot tasmani mang a lolo ning di atongi e Malta.

² A taraila mitingia la maris kol mila, la atna tar a iah, pa la ben pas mila rop, anasa a kiar pa i kotkoto.

³ Ning e Pol i los pas a buta na rakai, pa i suahiting na iah, a laplapang a iah i lapang sen a soi laulau miting na buta na rakai, pa i hararat tar ana kuna pa i kulam kes ono.

⁴ Ning a taraila miting na lolo la oroi mang a soi i kulam kes ana kuna e Pol, la awara artalai la mange, “Ngandek a barsan ne, a tena umkol a tarai. Pa i laun ot miting latasi, ika a god na arkeles bel i malmaling sur ir laun.”

⁵ Ika e Pol i lakran sen a soi kusun a kuna usaot na iah, pa bel i alaulau i.

⁶ La nuki mang a palaona ir surung, o ir punga purum pa aiap ka ir mat. Ika, ning la harnanai kol pa bel ta laulau a utna i han tar ono, la lingir ulak a nuknukinla, pa la atongi mang e Pol ning a god.

⁷ E Publius, a leklek a ningnigo mite na lolo ne, anuna kabalapiula i kes milau. I ben pas mila uting na nuna rumai, pa i gas pas mila. Pa mila kes pas natol a pukakiar ting na nuna rumai.

⁸ E tamana e Publius i kurah ana laplapang pa i balsal, pa i borbor. Pa e Pol i kas teteki, pa i araring, pa i suah naur a kuna saot ono, pa i alangolango pasi.

⁹ Ning i toli larne, la rop ning la kurah ting na lolo la hanot pa di alangolango la.

¹⁰ Pa la asangan anunla hanrawai tetek mila ana galis a wakak a titol. Ning mila kas ulak ana sip sur milar han ma, la tabar mila ana ututnala rop ning mila kapan suri.

Mitumo e Malta uto e Rom

¹¹ Lamur tana natol a kalang, mila kas ana ning a sip ning i nanan sen a kalang a wuwu ting na lolo. A sip ning, mitumo e Aleksandria pa salanigo ono di ka kot tar a manar ana naur a kasang, naur a nat a god Sus.

¹² Mila sot pas ting e Sirakus, pa mila kes pas natol a pukakiar.

¹³ Mila han mitingia pa mila sot tumo e Regium. Pa ana pukakiar lamur, a tobar i hanot. Pa ana ning a pukakiar ulak lamur tana, mila sot ting e Puteoli.

¹⁴ Mila pastek pas dingla na tastasimila ana tortorot tingia, pa la ben mila sur milar kes pas ta wik napirinla. Lamur, mila han utumo e Rom.

¹⁵ La ning la tas ana tortorot tingia, la longor a warwara omila, pa la han barat mila tumo na hanua na sisiurai di atongi e Apius, pa tumo na hanua di atongi Natol a Rumai a Borbor. Ning e Pol i oroi pas la, i atong wakak tetek e God, pa a ututnala ning i arakrakai anuna lalaun.

E Pol i kes to e Rom

16 Ning mila hanot uto e Rom, di malmaling tar e Pol sur i ka masik ir kes ting na ta rumai, pa ta tena harum ir tai alari.

17 Natol a pukakiar lamur, e Pol i kabah taum a ningnigola anuna tarai Juda. Pa ning la hanot taum, i atai la mange, “Na tastasik, bel a alaulau anundala na tarai, pa toltol anuna tumtubundala tagun nating. Ika la tong akes pas iau, pa la saran tar iau tana tarai Rom saot e Jerusalem.

18 Pa ning a tarai Rom la ka longor tar a warwara ning a alar iau ono, la mang sur lar pak sen iau, anasa bel la pastek ta utna ning ar hirua ono.

19 A tarai Juda bel la malmaling, pa bel a pastek pas ta ngas ning ar langolango onoi, pa nunung sur a Sisar ir warkurai iau. Ika bel ta laulau a utna ning ar tiu anuk a tarai ono.

20 Ine a kamkamna ning a arsune sur mulo, sur ar oroi mulo, pa dalar warwara taum. Di sen akes tar iau anasa a harnanai ana tortorot sur esaning a tarai Israel otleng la harnanai suri.”

21 Pa la kelesi mange, “Bel ta pas mitumo e Judia i hanot tetek mila hom, pa bel ta tasimila mitumo ning i hanot te i ususrai hom pa i warwara talapor hom anal laulauna ning u tol tari.

22 Mila mang sur milar longor anum al warwara, anasa mila ka longor tari mang, di atong laulau a tona lotu ne ting na hananuala.”

²³ La kubus pas ning a pukakiar sur lar warwara taum oe Pol. A kunum a tarai kol la hanot teteki ting na rumai ning i kes ia. Turpasi ana kobot tuk ana rah, i papak tetek la ana matanitu ane God, pa i atai talapor la oe Iesu, tagun a Warkuraila ane Moses pa buk anuna propetla sur lar tortorot.

²⁴ Dingla na tarai onla, la tortorot ana saning e Pol i atongi, ika dingla bel la tortorot.

²⁵ La arlak na arpotor inla. Ning la tur sur lar han, e Pol i atong a ararop a warwara tetek la mange, “A momolna ot ning a Talngan Tabu i atongi ana pahana propet Aisaia, tetek na tumtubumulo tagun nating mange,

²⁶ ‘Ur han tetek a taraila ne pa ur atai la mange,

Mulor longor pa mulor longor, ika bel mulor longor lalani,

mulor tai pa mulor tai, ika bel mulor oroi lalani.

²⁷ Anasa a taraila ne na balanla i rakrakai na taltalnganla i kutkut, pa na matmatanla i kut.

Sakana lar oroi lalani ana matmatanla, pa lar longor lalani ana taltalnganla, pa lar tastasman ana nuknukinla,

pa lar talingir, par alaun pas la.’ *Aisaia 6:9-10*

²⁸⁻²⁹ “Onone mulor tasmani mang, a titol ane God ning i alaun pas a tarai, ka han tetek a tarai ning bel a tarai Juda. Pa la, lar kibasi.”*

* **28:28-29: 28:28-29** Dingla na tena tastasmai ana Buk Tabu la nuki mang ning a warwara otleng i kes te na ves ne, mange: *Lamur tan anuna warwara, a tarai Juda la han, pa la arlak rakrakai na arpotor inla.*

³⁰ Pa e Pol i kes pas naur a kidol a rau ting na rumai ning i ot i loulou i, pa i gasgas pas a taraila rop ning la hanan teteki.

³¹ I warawai ana matanitu ane God, pa i asaer a tarai ona Leklek e Iesu Karisito, pa bel i matmataut, pa bel tik otleng i sairasi.

cxxxi

A Wakak a Warwara ane God
The New Testament in the Label language of Papua
New Guinea
Nupela Testamen long tokples Label long Niugini

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94